

17855/B

K

L XIII

18/c



DOMINICI CYRILLI

M. D. ET IN NEAPOLITANO GYMNASIO

MEDICINÆ PROF. &c.

MATERIA MEDICA


R E G N I

MINERALIS.

Audendo agendoque.



NEAPOLI:



M D C C X C I I.

THE MEDICAL LIBRARY


OF THE UNIVERSITY OF CHICAGO

CHICAGO, ILL.

1910



NEW YORK



NEW YORK

1910

ADDITIONAL

MEDICINÆ STUDIOSIS

DOMINICUS CYRILLUS.



DE materia medica Regni mineralis disserere, elementa hujus disciplinæ medicinæ studiosis proponere in splendidissima scientiarum nostri temporis luce, satis arduum, ac multiplici difficultate plenum opus existimari debet. Et profecto dum perspicua veritate monstrante viam, hinc Historiæ naturalis necessitatem in multiplicitium substantiarum intelligentiâ, hinc chemiæ profundam reconditamque scientiam, (hæc enim oportet ut omnino ad manus sit), aliarumque utilium quoque doctrinarum opportunam notitiâ, intuemur, tanto oneri sustinendo tenues ingenii vires nullo modo pares esse manifeste apparebit. Sunt deinde & novi generis difficultates, quarum accessione priores in immensam crescunt. Nam I. Materia medica non solum medicamentosas diversorum corporum qualitates descriptione accurata persequitur, & præcipuam illorum actionem in corpore humano investigare conatur, verum cur, quomodo, quando, quibusve in morbis varia possint ac debeant aptari remedia indicare debet. Hinc si uberrimo fundamentalium doctrinarum apparatu indiget pro remedium historia; statim ac de usu adversus immensam egritudinum cohortem, serio agitur, simplex materiæ medicæ intelligentiâ, cum diagnosi, mutationum & accidentium morbosorum signis, atque

cum obscurissimis sanæ œconomiae perturbationibus intime conjungenda. Etenim quamvis medicamento indoles perspecta sit, & tamen natura morbi aut ex parte, aut penitus ignoratur in principio, siue eruditate remedia, quæ cœctionis & remissionis tempore opportuna sunt, inopportune propinantur. Hoc certe in loco apprimè adnotanda magni Hippocratis sententia, in qua medico jubet, ut a quocumque remedio, immo & a clystere etiam abstineat, si æger simplici utitur piisana. Naturæ motus, & salutare perturbationes, quæ in morbis eveniunt, nunquam medicamentis retardari aut prohiberi debent. Igitur practico tantum accuratissimo, qui materiam medicam diligenter persequutus est, remediorum administratio tuto & absolute permittenda. Qui deinde hac nostra ætate ad scientiam medicamentorum enucleandam accedunt, novis deterriti difficultatibus ab opere abstinent. Nam ut recentiorum chemicorum doctrinas se rectè intelligere ostendant, nova nomina adhibere, nova addiscere vocabula, recentissimæque theoriæ dogmata in medium afferre debent. Hoc scribentibus ingratum, ingratisimum legentibus est. Sed de hoc argumento mox breviter disputabimus. Nil denique adeo in hac provincia arduum, quam post doctissima excellentium virorum scripta, & una cum laudatissimis Europæ medicis in scenam prodire. Quomodo enim cum Murrayo, Cullenio, cum Edinburgensibus & Londinensibus materiæ medicæ scriptoribus, Italus ultimi subseclii, infimæque classis medicus poterit comparari?

In tanta rerum difficultate, atque in utillimo studio, ut artis salutaris obscuritas, densissimæque te-

nebræ, quæ curationi morborum opponuntur, quantum fieri poterit dissipentur, nil præstantius nihilque expeditius, quam junctis viribus, cumulatoque labore rem tanti momenti suscipere. Fortasse practîcorum accuratiores observationes, chemicorum inventis innixæ, & in solidam massam redactæ, generi humano emolumentum asserre facillime poterunt. Nostri vero in hoc opere suscipiendo conatus non adeo levibus innituntur fundamentis; nam materiæ medicæ elementa primi in hoc Gymnasio tradidimus, atque incognitam prorsus pharmaceuticam eruditionem, pathologiæ copulatam publice ex hoc loco illustravimus; medicamenta quæ e vegetabilibus medicina mutuatur, & dogmata pharmaceutica typis mandare curavimus: oportebat modo & alteram operis partem pertractare, ut incobatum opus minime negligeretur. Superest & postrema hujus disciplinæ particula, nempe remediorum ab animalium classe depromptorum historia, quæ proximo anno lucem videbit.

In celerrimo chemicarum doctrinam progressu, & post stupendas admodum chemiæ pneumaticæ observationes, quæ a Cel. Black inventis, usque ad Priestley experimenta, junctis immortalis Bergman, ingeniosissimi Sheele, Fontana aliorumque laboribus, multum disputarunt doctiores scientiæ cultores, atque observando investigandoque, quæ erronea atque dubia emendatione atque illustratione indigebant ad examen revocarunt viri de chemica disciplina optime meriti. Investigationum fructus profecto uberrimi, non solum in soliditate doctrinarum versantur, sed fundamenta theoretica novam formam assumpserunt, novisque nominibus modo designantur. Celeberrimus inter Pa-

visienses chemiæ philosophicæ cultores D. Lavoisier, qui principii inflammabilis, sive phlogisti theoriā a Sthalio propositā reliquisque subsequentium temporum observatoribus confirmatā, falsam esse existimavit, atque imaginarias phlogisti proprietates omnino contemnendas esse credidit, nova excogitavit nomina rerum & objectorum naturæ, juxta propriam theoriā, magis convenientiā. Lavoisierii dogmata sequuti sunt omnes in Gallia chemici novarum rerum amatores Fourcroy, Morveau, aliique, Cl. La Metherie excepto. Multi inter Italos nova nomina probarunt, improbarunt alii. Angliæ doctissimi Philosophi, acerrime primum, D. Kirwan ducente agmine, pro phlogisto pugnaverunt. Sed a recentissimis scriptis modo eruitur invictos phlogisti propugnatores, atque tamen divinæ veritatis vindices, more magnorum virorum, (ut Celsus de Hippocrate, qui se deceptum fuisse ingenue declaravit, eleganter scriptum reliquit), inter quos ipse Kirwan ipseque Black numerantur, proselytorum numerum auxerunt. Atque ut res tanti momenti, brevi accurataque narratione oculis vestris subiiciatur, operæpretum duxi historiam novæ theoriæ, quæ in ultima Pharmacopœiæ Edinburgensis editone exstat, in latinum sermonem versam hoc in loco, eruditionis gratia, apponere. Diligentissimus itaque D. Duncan in hujusce operis introductione hæc habet.

E P I T O M E

NOVARUM CHEMICARUM DOCTRINARUM.

Quemadmodum novæ doctrinæ chemicæ, nomine theoriæ antiphlogisticæ, magnam celebritatem adeptæ sunt, atque pro ever-tenda phlogisti theoria a chemicis philosophis per longum tempus exculta, rapidissime progrediuntur; procul dubio existimandum, quod generalis prospectus principiorum novæ doctrinæ, majori lectorum numero acceptus esse poterit; & quod horum principiorum explicatio, recte poterit partem introductionis pro tractatu artis, quæ a scientia chemica absolute pendet, constituere.

Generalis historia chemiæ philosophicæ, nulla alia ratione melius assequi poterit, quam proponendo epitomen elementorum chemiæ, a D L AVOISIER recenter editorum; regularem enim continent novarum doctrinarum historiam. Systema majori ex parte proprium est; formam suam & integram compositionem propriæ investigationi accuratisque observationibus debet; atque quoad maximam partem propriis Auctoris inventis innititur. Quamvis ob inventorum celebritatem, novæ hujusmodi doctrinæ celeriter per Europam propagatæ sunt, tamen rapidus illarum progressus in Angliâ adjuvabatur elegantissima versione D. Kerr in anglicam linguam; hic enim ob perfectam argumenti intelligentiam quidquid laudis a traductore poterat, operi D. LAVOISIER conciliavit.

Princeps differentia , quæ interest inter D.LA-VOISIER philosophiam chemicam , & theoriam Stahlianam in hoc præsertim versatur, quod a D.LA-VOISIER hypotheticum elementum phlogiston dictum integre refutatur, tamquam nullo innixum fundamento, & tamquam factis & observationibus oppositum; quum contra phænomena omnia, quæ vulgo phlogistica appellantur, manifeste pendere ostenduntur, ab absorptione vel evolutione aëris vitalis, aut solidæ ejus basis, quæ in nova nomenclatura dicitur *Oxygene*. Valde singulare, sed simul aptissimum est, quod omnes fere phænomenorum chemicorum explicationes, quæ a veteris theoriæ fautoribus proponuntur, in novas doctrinas mutari possunt, posthabito tantum vocabulo phlogiston, atque assumpto elemento oxygenes, levissima tantum idiomatis inversione. Ubi-
cumque corpus aliquod a Stahlianis phlogisticatum esse dicitur, vel mutatis vocabulis, cum imaginario phlogisti elemento combinatum, D.LA-VOISIER ejusque sequaces manifeste ostendunt oxygenis, vel baseos aëris vitalis evolutionem evenisse; contra vero ubi corpus phlogiston amisisse supponitur, vel dephlogisticatum esse, revera hoc accidit ob absorptionem & combinationem aëris vitalis.

D. LAVOISIER in explicatione suarum idearum circa compositionem fluidorum aërisformium elasticorum, qui *gas* dicuntur, auspicatur demonstrando, vel saltem solidis argumentis probare nititur, quod consistit solida basi, combinata cum materia caloris, quæ in recenti nomenclatura

tura appellatur, *caloricum*. Hanc hypothesim effectibus generaliter observatis, temperiei incremento in corporibus superstruere nititur; peculiariter vero hæc probatur doctrina a constanti illo effectu, nempe quia horum corporum dimensiones in quamcumque directionem augentur, statim ac temperies crescit. Atque ab analogia concludit, quod omnia corpora sunt vel *solida*, *fluida*, aut *aëri-formia*, juxta proportionem, quæ reperitur inter vires attractivas, quæ illorum particulis inhærent, & vim expulsivam quam, ut illas separet, *caloricum* exeritur. Sequitur ab hac theoria, corpora omnia naturaliter solida esse si calor, sive *caloricum*, nempe causa caloris fecedit; ac proinde liquida omnia, & fluida aëriiformia constant basi peculiari naturaliter solida, sive *principio proprio*, cujus particulæ ob combinationem cum calórico, tamquam principio communi prohibentur ut generali attractionis legi obsequantur. Hac hypothesi & certis observationibus absorptionis aëris vitalis, explicat apparentiam caloris in combustionem, demonstrando quod vitalis aër, qui ab ipso appellatur *gas oxygenum* quemadmodum componitur a basi solida, nempe ab oxygene, cum calórico conjuncto, procul dubio *caloricum* dimittere debet, dum formam aëris relinquit, ut combinetur cum corpore solido combustibili, atque ubi transire debet a statu rarioris, in statum densioris aggregationis; ac proinde quod hæc phenomena pendent a variis attractionibus electivis calóricos, quantum caloris in hac operatione partes sunt. Ait deinde quod *caloricum* ubi chemice

micē combinatur cum quocumque corpore, hujus substantiæ aggregationem in majoris raritatis statum mutat, a solido in liquidum, vel a liquido in aëriformem, juxta præcedentes proportionēs; & quod ubi a combinatione liberatur, gignit incrementum temperiei, cum flamma vel igne conjunctum, juxta varium concentrationis gradum.

Nonnulli reperiuntur simpliciter elastici aëri-formes vapores, qui in omni cognita temperie in statu *gas* permanent, verum cum aliis corporibus combinantur, & solidam vel liquidam formam aggregationis assument. Facilioris intelligentiæ gratia distinctionem instituit, inter basim solidam, quæ has efformat combinationes, & *gas*, in quo combinantur cum calorico. Princeps *gas*, a longo jam tempore appellatur aër vitalis: verum D.LAVOISIER existimat melius esse vocabulum aër fluido tantum atmosphærico designando inserviat, qui diversorum *gas* mixtura est; atque ut species distinguantur, addit genericæ voci *gas* nomen specificum depromptum ab eminenti aliqua proprietate solidæ basis, quæ præcipuum elementum efformat. Hinc aëri vitali *gas oxygenis* nomen tribuit, ab essentiali baseos proprietate, quam *oxygenum* appellat, quia est causa universalis aciditatis.

Manifeste ostendit omnia combustionis exempla certe nihil aliud esse nisi hujus oxygenis combinationem cum corpore combustibili, atque in majori horum casuum parte hanc combinationem evenire posse juxta varios saturationis gradus. In genere ubi hæc saturatio completa est,

com-

compositum a combinatione corpus , est acidum ;
 atque juxta novum idioma , substantiam combu-
 stibilem oxygenatam esse dicitur . Hinc quo ad
 majorem partem corpora combustibilia sunt bases
 acidificabiles , vel substantiæ , quæ mediante com-
 binatione cum oxygene , in acida mutari possunt.
 Ubi saturatio corporis combustibilis minor est ac
 requiritur pro compositione acidi , compositum
 appellatur *oxydes* . Processus in primo casu ap-
 pellatur oxygenatio , & basis *oxygenata* esse
 dicitur ; in secundo casu basis *oxydata* di-
 citur , atque actus operationis appellatur *oxydatio* .
 Hujusmodi nomina arbitraria sunt ; sed quemad-
 modum chemico idiomati perspicuitatem insi-
 gnem communicant , absque longa explicatione ,
 ideo magni usus sunt .

Unicum vero reperitur exemplum corporis
 combustibilis , qui combinatur cum oxygene &
 tamen numquam efformat acidum aut oxydem
 acido proximam . Aër inflammabilis ; uti antea
 appellabatur est gas simplex qui mediante com-
 bustione cum oxygene uniri potest ; ambo gas
 caloricum deponunt , qui apparet in igne , vel
 calore & lumine ; atque substantia , quæ ab hac
 unionem oritur est aqua . Ab hac circumstantia ba-
 sis solida gas combustibilis *hydrogenis* nomen in
 nova nomenclatura accepit ; atque in statu suo
 aëriiformi , cum calórico combinata , appellatur
gas hydrogenæ .

Una aëriiformium fluidorum species , qua com-
 ponitur mixtura aër atmosphæricus dicta , vitæ
 animali lethalis est , atque flammam exstinguit .

Hæc

Hæc diversa antea obtinuit nomina, juxta diversorum philosophorum imaginationem, quemadmodum mephitis atmosphærica, noxius aër, aër phlogisticatus, &c. In nova nomenclatura appellatur *gas azoticum*, & basis sua, a mortifera qualitate, *azotes*. Hæc basis ad varium diversumque saturationis gradum cum oxygene conjungitur & oxydes vel acida efformat juxta proportionem oxygenis, quo compositum saturatur. In minimo saturationis gradu cum oxygene, compositum adhuc aëriformem statum retinet; atque in aqua non dissolvitur: Hoc compositum, secundum principia generalia novæ nomenclaturæ, appellari deberet *gas azoticum oxydatum*; verum quemadmodum vetus appellatio, *gas nitrosum*, admodum communis est, neque ullam contradictionem aut ambiguitatem gignit, ideo retinetur. Ulteriori saturatione cum oxygene, gas nitrosum mutatur in acidum, atque si per se existit aëriformem aggregationem retinet; verum ad magnam quantitatem solvitur, mediante aqua. Pro hoc acido antiquum nomen acidi nitrosi retinetur ob easdem rationes, quæ gas nitrosum respiciunt; verum status duo hujus acidi a longo jam tempore cogniti distinguuntur variando terminationem nominis specifici: Acidum valde coloratum, rubrum & fumans, antea, phlogisticatum dictum, nunc appellatur acidum *nitrosum*, atque pallidum vehementius acidum, qui rubros vapores non emit- tit, & qui antea dicebatur acidum nitrosum dephlogisticatum, dicitur modo acidum *nitricum*. Differentia inter duos hujus acidi status pendet a

dif-

differenti quantitate oxygenis saturantis, cum eadem basi acidificante conjuncta; nam secunda species, nempe acidum nitricum magis perfectum integre saturata est cum oxygene, dum in priori, acido scilicet nitri fumante, adest superabundans proportio azotis. Acida hujusmodi mutuo converti vel mutari ab uno in alterum possunt; nitricum in nitrosum, vel additione azotis, vel detractiōne, oxygenis; & *vice versa*.

AZOTES & hydrogene, si simul combinantur, efformant alcali volatile causticum, *vel ammonia*, uti appellatur in nova nomenclatura. Ratio mutati nominis hujus substantiæ est ad vitandam superfluum periphrasin in idiomate chemico, atque ut, quantum possibile erit singulis peculiaribus substantiis perspicua & unica vox tribuatur. Magnæ utilitates generalis hujus principii in nomenclatura, apparebunt, si comparantur nova nomina salium neutrorum, cum vetustis arbitrariis denominationibus.

NONNULLÆ substantiæ combustibiles simplices, persistente combustionē, combinantur cum oxygene, atque oxydes nempe acida efformant, uti azotes. Sulphur dum lente comburitur, cum minori quantitate oxygenis saturantis conjungitur atque efformat acidum volatile debile & insigniter odorum, acidum vitriolicum phlogisticatum, vel sulphureum antea dictum, & qui modo appellatur acidum sulphureum. Ubi celerius comburitur, majori quantitate oxygenis saturatur, & compositum inde proveniens est acidum ponderosum, fortius & inodorum atque appellatur acidum sulphuricum, antea vitriolicum. Mutari

tari similiter inter se possunt, addendo oxygenem sulphureo, vel detrahendo ab acido sulphurico.

PHOSPHORUS simplex est combustibilis substantia, quæ, uti sulphur, combinatur cum oxygene ad duos saturationis gradus; combinatio minus oxygenata appellatur phosphorus, perfectius vero oxygenata, acidum phosphoricum. Carbo, vel potius ipsius elementaris & simplex, pars combustibilis, quæ appellatur *carbon* vel *char*, quo distinguatur a miscela impura *carbonis* nomine dicta, conjungitur cum oxygene combustionis, atque efformat acidum *carbonicum* vel *charicum*, antea distinctum nomine aeris fixi, aeris fixabilis, acidi ærei &c.

MULTA etiam reperiuntur cognita acida, quæ adhuc non fuerunt decomposita, ipsorumque ideo basis acidificabilis incognita remanet. Hæc sunt *acidum muriaticum*, *acidum boracinum*, & *acidum fluoricum*; sed a generali analogia, supponi potest componi acida hæc peculiaribus basibus combustilibus, quæ combinantur cum oxygene, tanquam peculiari illarum acidificante elemento. Quamvis acidum muriaticum in actuali statu chemicæ scientiæ, nequeat adeo decomponi, ut ejus basis detegatur, potest vero copulari cum insigni superabundanti quantitate oxygenis, & hac ratione proprietates assumit ab illis, quas in statu communi possidebat, valde diversas. In novo hoc statu, juxta novam nomenclaturam appellatur, *acidum muriaticum oxygenatum*. Fortasse

se aptius appellari posset acidum muriaticum superoxygenatum.

PRÆTER acida hæc simplicia, sive acida basi simplici, multa acida bases habent compositas, sive duas vel ultra, bases acidificabiles simul junctas, atque hujusmodi radicalia composita in acida mutantur, vel oxygenantur combinatione cum oxygene. Acidum compositum a longo jam tempore nomine *Aqua Regia* cognitum, hujus generis est, atque manifestum est, ab attractionibus electivis aliisque phænomenis, quod acidum nitricum & muriaticum, a quibus efformatur, simul chemice sunt combinata; nempe, horum acidorum bases acidificabiles conjunguntur ad efformandum compositum radicalem, pro cuius acidificatione utriusque acidi oxygene in usum revocatur. Aliæ acidificabiles & oxydabiles compositæ bases a vegetabilibus & animalibus substantiis obtinentur, & constant variis proportionibus carbonis & hydrogenis, simul junctis, aliquando cum additione azotis, vel phosphori, aut utriusque. In statu oxydarum, composita hæc radicalia ab oxygene habent additionem in gradu tamen minori, quam requiritur pro acidi perfecti compositione: saccharum, amyllum, gummi, mucus, gluten, oleum, resina, alk. hol., æther &c. sunt bases acidificabiles compositæ, tantum cum proportionem oxydante oxygenis conjunctæ. Acida hujus ordinis sunt.

*Acidum Tartareum**Acidum Malicum**Acidum Citricum**Acidum Pyro-lignicum**Acidum Pyro-mucosum**Acidum Tartari**Recente cognitum.**Acidum Limonum**Acidum Empyreumaticum ligni.**Acidum Empy. sacchari.**Acidum Pyro-tartarofum**Acidum Empyr. tartari.**Acidum Oxalinum**Acidum Acetosæ.**Acidum Acetosum**Acetum, vel acidum Aceti**Acidum Aceticum**Acetum radicale**Acidum Succinicum**Sal volatile succini**Acidum Benzoticum**Flores benzoini**Acidum Camphoricum.**Recente detectum.**Acidum Gallicum**Principium adstringens vegetabilium.**Acidum Lacticum**Acidum feri acefcantis**Acidum Saccholacticum**Antea incognitum.**Acidum Formicum**Acidum Formicarum**Acidum Bombicum**Antea incognitum.**Acidum Sebaticum**Idem.**Acidum Lithicum**Calculus Urinarius**Acidum Prussicum**Materia coloranserulei Berolinensis.*

NEQUIT certe contendere, quod hæc acida efformari possint combinando elementa simplicia basium & addendo oxygenem composito radicali, atque ita syntheticum de illorum natura & constitutione argumentum exhibere: verum mediante destructiva distillatione in vase clauso, atque aliis accuratis analyticis operationibus, varia illorum elementa a se invicem separari possunt, & peculiares proportionēs tolerabili certitudine assignari.

METALLA aliam constituunt seriem basium oxydabilium vel acidificabilium; atque adnotatione dignum est, quod in statu oxydarum, omnino conveniunt cum generalibus phænomenis corporum alcalinorum; nam multa inter metalla ulteriori oxygenis additione in acida mutantur. Omnia sunt corpora combustibilia, & quoad maximam partem excessivum temperiei gradum requirunt, ut via sicca combinentur cum oxygene; omnia vero combinari possunt cum oxygene via humida, adhibitis attractionibus electivis. Quod antea appellabatur forma regulina metallorum, est simplicissimus illorum status, in quo cum nulla adhuc cognita substantia combinantur; contra vero status calcis, in quo tanquam genuina corpora elementaria esse credebantur, ille est in quo addendo quantitatem, saturantem oxygenis, minus quam requiritur pro statu acidi, convertuntur in oxydes metallicas, quæ antea calces denominabantur. Hujus status oxydationis, in multis metallis, reperiuntur multi diversi gradus, atque in nova nomenclatura hujusmodi di-

versi oxydationis gradus a colore distinguuntur, vel a peculiaribus circumstantiis in quibus oxydatio producitur.

ABSOLUTE necessarium est pro solutione metalli in aliquo acido, ut metallum in statu oxydis reperiatur, ante æctum solutionis, vel ut durante processu oxydatum reddatur, aut decomponendo partem acidi pro solutione adhiberi, aut aquæ cum qua acidum dilutum est. Hinc semper accidit, quod ubi metalla non prius oxydata dissolvuntur in acido nitrico, aut in acido sulphurico concentrato, acidi pars decomponitur; quia azotes vel gas nitrosum, vel ambo amittunt partem oxygenis acidificantis, quæ detrahitur a basi oxydis metallicæ: vel acidum sulphureum, aut ipsum etiam sulphur evoluitur, a simili decompositione perfecti acidi sulphurici, ubi hoc acidum pro solutione fuit adhibitum. Quando acidum sulphuricum dilutum adhibetur, aqua solutionis decomponitur pro oxydatione metalli, quia elementa acidi simul retinentur a fortiori attractione electiva, quam est illa quæ exeritur inter particulas aquam constituentes; sequitur ideo, quod in hoc casu, gas hydrogenæ liberum evadit, & metallum dum in acido dissolvitur, oxydatur a parte oxygenis ipsius aquæ.

HÆC magna ex parte est summa novarum doctrinarum chemicarum; quod superest, fere nihil aliud est quam nomenclaturæ mutatio, pro simplici proprietate & accurata methodo, ad vitandam ambiguitatem, vel uti auctori videtur, ad

errores in phænomenis & factis chemicis eliminandos.

NOMINA omnia metallorum latine terminantur genere neutro; & singula vox usurpatur ad indicandum singulum metallum, in perfectissimo puritatis statu, quantum licet in actuali chemicæ intelligentiæ statu. Hinc Platium, Aurum, Argentum, &c. denotant perfectum metallicum aut regulinum statum Platinæ, Auri, Argenti &c. Alcalina & terræ sequenti ratione denominantur:

*Nomina nova.**Nomina vetusta.*

Potassa	Alcali vegetabile fixum purum, vel causticum.
---------	---

Soda	— — — idem minerale.
------	----------------------

Ammoniaca	{ Alcali volatile ex calce viva paratum.
-----------	--

Calx	Terra calcarea pura.
------	----------------------

Magnesia	Magnesia calcinata.
----------	---------------------

Barytes	Terra ponderosa pura.
---------	-----------------------

Creta	Terra argillacea pura.
-------	------------------------

Terra silicea	Terra silicea pura.
---------------	---------------------

COMBINATIONES alcalinorum, terrarum & oxydarum metallicarum cum acidis, quemadmodum efformant sales neutros, medios, terreos & metallicos, ideo in genera dividuntur juxta acidum a quo pars constitutionis componitur; & que basis peculiaris, cum qua acidum combinatur in singulo peculiari sale, compositi nomen

specificum constituit. Hac ratione antiqua intelligibilia, vel falsa nomina horum salium delentur, atque vocabula adhibentur, quæ non solum indicant salern, qui peculiariter designari debet, verumetiam enumerant ingredientia, atque denotant statum substantiarum, quæ in composito reperiuntur. Hinc sales omnes, in quibus acidum sulphuricum combinatur cum basi alcalina, terrea aut metallica, appellantur *sulfata*; dum illi, in quibus acidum sulphureum cum iisdem basibus combinatur, *sulfites* denominantur: atque ita de alijs acidis, ut in sequenti tabula

*Nomina nova,**Nomina vetusta.*

Sulfas barytis

Spatum ponderosum, vitriolum terræ ponderosæ.

Potassa

Tartarum vitriolatum, sal de duobus, arcanum duplicatum.

Calcareus

Selenite, gypsum, vitriolum calcareum.

Magnesiæ

Sal epsomienſe, sal ſedlitz, vitriolum magnesiæ.

Ammonia calis

Sal ammoniacum ſecretum Glauberi.

Argillæ

Alumen.

Zinci

Vitriolum album, vitriolum goslar, *copperas* alba, vitriolum zinci.*No-*

*Nomina nova.**Nomina vetusta.*

Sulfas Ferri	{	Copperas viridis, vitriolum viride, vitriolum martia- le, vitriolum ferri.
Mangnesii		Vitriolum mangnese.
Cobalti		Vitriolum cobalti.
Niccoli		Vitriolum nickeli.
Plumbi		Vitriolum plumbi.
Stanni		Vitriolum stanni.
Cupri	{	Copperas cærulea, vitriolum cæruleum, vitriolum Ro- manum, vitriolum cupri.
Bismuthi		Vitriolum bismuthi.
Antimonii		Vitriolum antimonii.
Arsenici		Vitriolum arsenici.
Mercurii		Vitriolum mercurii.
Argenti		Vitriolum argenti.
Auri		Vitriolum auri.
Platini		Vitriolum platinae.

IN nonnullis casibus, hujusmodi sales efforma-
ri possunt cum fixa & permanenti semper pro-
portione acidi supersaturante, vel cum opposito
excessu terræ alcalinæ, vel metallicæ basis: in
duplici hoc casu peculiaris saturationis status de-
signatur præmissis prioribus nominibus vocabulo
acidulum vel *alcalinum*. Ita cremor, vel crystallæ
tartari, quæ compositio uti notissimum est con-
stat *potash*, vel alcali vegetabili fixo, cum ex-
cessu acidi tartarei, appellatur *Tartaris potassæ aci-
dulus* atque ita de reliquis.

HÆC est ampla satis historia doctrinarum & nomenclaturæ novæ philosophiæ chemicæ, quantum a præstationis limitibus permitti potest; ad reliqua magis peculiaria quod attinet, lectores adire debent elementa D. LAVOISIER, in quibus uberes distinctæque proponuntur explicationes præcipuarum systematis partium; atque ubi principes difficultates a veteris theoriæ sectatoribus propositæ dissipantur & explanantur.

CERTE non parum confert ad confirmandam probabilitatem, majoremque evidentiam novæ chemicæ philosophiæ, quod D. BLACK, qui per longum tempus chemiam in hac universitate docuit, cum maxima meritisque debita æstimatione, & qui ipsemet chemicas magni momenti doctrinas detexit, fatetur phlogisti theoriā, qua duce omnes ipse doctrinas proposuit cum primum lectiones tradidit, admodum obscuram evasisse post numerosas observationes recentius factas; atque explicationes non adeo planas manifestasque, chemicorum experimentorum suppeditare, quam theoria LAVOISIERII, quæ simplicior est, facilius assequi potest, atque strictius cum novis chemicis factis connectitur.

D. KIRWAN quoque, qui per longum tempus strenue pugnavit pro doctrina Stahlianā, atque etiam, ut hanc tueretur doctrinā, tractatum evulgavit adversus D. LAVOISIERII opiniones, recte & admodum ingenue, quod rarum in majori hominum parte est, sincere atque aperte proprium fassus est errorem, atque veritatibus quas
pu-

publice postremo admodum tempore improbare conatus est assentire non dubitavit.

Quid sentiendum sit de nova chemicorum theoria, longum profecto esset in præsentia disputare. Multum certe recentiores observatores receptis antea doctrinis addiicerunt, & potius essentielles disciplinæ utilitates, quam nova nomina a philosophis respicienda sunt. In præsenti tractatu veterum nomenclaturam, cognitamque phlogisti theoriam adhibuimus, nam perspicuitati non novitati consulendum, & priusquam novis vocabulis novisque doctrinis mens & animus, auresque juvenum assuescant, melius erit debilem lucem incommodo splendore præponere, turpe enim esset in magna luce cæcutire.

MATERIA MEDICA

REGNI MINERALIS.

Quemadmodum ab Anatome corporis humani fabrica accurate describitur; sanas integrasque functiones Physiologia persequitur, & a Pathologia sanitatis perturbatio nes designantur; ita opportuniora aduersus morbos præsidia a Materia Medica declarantur. Hoc itaque nomine intelligitur peculiaris illa disciplina, in qua remediorum præsidiiorumque omnium Historia, natura, præparata, præcipuæque facultates diligenter illustrantur. Tanti momenti scientia, quæ a medicis omnibus pro Artis salutaris fundamento haberi debet varias, ab universis corporibus naturalibus substantias mutuatur, ac modo plantis, modo mineralibus fossilibus & metallicis, modo animalibus utitur. Hinc a triplici naturæ Regno triplex materiæ medicæ divisio desumitur. Primam partem medicamenta vegetabilia, secundam mineralia, tertiam denique animalia componunt. Plantarum vires, actionem, usum sive administrationem in peculiari tractatu nuperrime evulgavimus. Nunc majori diligentia, fusiùsque ad præsidia e Regno minerali depromenda deveniemus; quod certe annis superioribus desiderabatur.

A

tur.

tur. Animalium medicamentosas qualitates potestremo loco enucleare conabimur, hac præsertim ætate, in qua & ipsæ lacertarum carnes recentes inter specifica adversus gravissimos morbos auxilia collocantur.

Ad materiam vero medicinalem Regni mineralis quod attinet, chemiæ Pharmaceuticæ elementa in ipso limine illustranda sunt, ideoque corpora omnia in sex generales classes distinguere oportet. Primum tenent locum Sales, secundum Inflammabilia; sequuntur Metallica, Terrea, Aquosa, Aërea. A prioribus quinque vetustiores medici non pauca desumebant præsidia; at recentiores substantias aëriiformes summa etiam cum utilitate adhibere solent, uti evincitur acidi aërei, aërisque dephlogisticati administratione in gravissimis etiam morbis. Aëris ideo atmospherici, sive respirabilis proprietates in hac quoque materiæ medicæ parte accurate sunt considerandæ.

P A R S I.

DE SUBSTANTIS SALINIS.

Corpora naturalia, quæ determinata, unifor- Substantiæ
mi, regularique structura vel penitus ca- salinæ.
rent, vel tantum organica gaudent levi appa-
rentia Fossilia, vulgariorque vocabulo Minera-
lia nuncupantur. *Fossilium* in tellure obvio-
rum complexus vulgo Regnum audit fossile, vel
minerale juxta cel. Bergman definitionem, qui
hæc addit, ut fundamentalis fossilium natura
intelligatur. In hoc tertia regno naturæ, gene-
ratio longe aliter peragitur, ac in organicis. Nul-
lum ovum vel semen, fossile futurum in mini-
mum coarctatum complicatumque spatium fovet;
nulla fecundatio, nullus humorum nutrientium sta-
bilis motus, nulla evolutio heic locum ha-
bet. Moleculæ sibi invicem occurrentes, sola
attractione coalescunt. Fossilium facultates, live
mineralium vires medicamentosæ dignosci neque-
unt, nisi prius, characteres externi & interni
horum corporum perfecte innotescant. Quemad-
modum vero recepto ab omnibus scriptoribus
ordine incedendum, ideo a salium descriptione
ordiendum.

Sales dicuntur substantiæ illæ fossiles, quæ Sales.
in lingua plus minus saporis exerant, & subri-
lissime pulverati, aqua ebulliente milles ponde-

rosiore solvuntur . Igne liquefcunt , & plerique mutantur vel deftruuntur . Salinam vero qualitatem , quæ in determinata fapiditate verfatür a phlogifto , mediante materia caloris attenuato mutantur; folubilitatem vero a calore omnino pendere multa fuadent . Corpora omnia phlogifto deftituta in calcem abeunt penitus infipidam, & phlogifto proprie dictum ope caloris omnino amittunt . Refinofa , omnia quæ falinam naturam habent , calore attenuatâ faporis intensitatem declarant . Caloris activitate calx ufta falinam folubilitatem adipifcitur ; nam ignis actione lapides calcari non modo folubilitatem acquirunt fed fimul in calcem tranfeunt penitus caufticam . Sed in hoc cafu quæ eveniunt mutationes magni momenti doctrinam alio magis opportuno tempore enucleandam includunt . Salinæ rûrfum particulæ , five falium moleculæ primitivæ , in omnium fere corporum fundamentali compofitione commixtæ reperiuntur . Sed fapor præcipuus falinis elementis primario inhærens , acidum vel alcali pro fundamento agnofcit , quandoquidem hoc principio quamvis diverfimode modificato , fales proprie dicti componuntur . Quamvis enim duas fimpliciorum falium fpecies generales exiftant , atque acidi primam , alcalini fecundam component , falinum proprium acidum dici meretur ; alcalinum enim potius acre eft & acutum . In majori corporum naturalium numero falinum & præcipue acidum exiftit elementum , quamvis modo magis , modo minus evolutum fit , prout a diverfis aliis fubftantiis occultatur & abfconditur . Ita acidum

fac-

sacchari in vegetabilibus copiosissimum ; a quo fructuum & plantarum sapor repetendus est, cum glutine mucilaginosisque elementis adeo stricte combinatur, ut acido nitroso opus sit pro integra absolutaque separatione. Insuper admodum substantiæ salinum sive acidum elementum habent admixtum ; a subere enim siccissimo omnique saporis experte, nuperrimi chemici acidum peculiaris naturæ obtinuerunt.

Præcipui characteres salibus simplicioribus proprii duas suppeditant harum substantiarum Classēs. Nam uti accuratiores Chemici existimant, *characteres specifici inter sales simplices, quos ars nondum ex suis principiis componere valet, ab indolis diversitate unice sunt petendi*. Horum duo innotuerunt distincta genera ; Acidum nempe & Alkali. Ad acidum enim quod attinet, etsi hæc substantia, ubi de fossilibus agitur, triplici generis antea esse existimabatur, veteres enim descripserunt tantummodo Acidum Vitriolicum, Nitrosum & Muriaticum ; recentiores contra addiderunt Acidum Fluoratum, Boracinum, Arsenicale, Sideri, Molybdænæ, & lapidis ponderosi. Regnum vegetabile majorem acidorum varietatem exhibet ; vix tamen crederem inter species omnium distinctas collocari debere, acidum Sacchari, Acetosellæ, Tartari, Benzoinum, Citrinum, Succineum & alia hujusmodi. Regnum animale suppeditat Acidum Formicale, Sebaceum ; immo reperitur etiam peculiare acidum Larvæ phalenæ Vinulæ, peculiari volatilitate præditum. Denique acidum Phosphoreum,

Salium characteres generales.

& aëreum continent etiam animalia & vegetabilia corpora. Cl. Bergman non solum de descriptis modo genuinis ac manifestis acidis loquitur, verum metalla probabiliter suis etiam constare radicalibus acidis existimat, ignotaque etiam diversi generis acida in animalibus non adhuc detecta reperiri suspicatur, ait enim: *Metalla in statu completo sunt acida metallica phlogisto satiata, vel sulphuris metallici species, quæ interdum distincte inflammari possunt, ut zincum & arsenicum. Vestigia quoque flammæ sed magis obscure sub fusione prævent aurum & cuprum, nimbo virescente; ferrum candescētia scintillas evibrat, & stannum quoque idonea encheiresi, accendi potest. Demum nonnulla corpora phlogistica, & fortasse omnia cum acidis intime combinantur; quod de sulphureis & resinosis certissimum est. Acidorum in omnibus fere corporibus naturalibus existentia magnam hujus principii necessitatem utilitatemque in universali œconomia naturæ declarat. Quænam sit acidorum activitas in œconomia animali inferius patebit. Plantæ quæ in genere acido copiosissimo sunt referræ, si hoc privantur elemento, statim corrumpuntur; atque vegetabilium exhalationes, quæ corruptelam affrunt, tenuissimo acido componuntur. Transpirationem animale, quam alcali phlogificato magna ex parte compositam esse Pathologi contendunt, acidum satis copiosum, acido aëreo simillimum, semper adjunctum habere, nostræ evincunt luculentissimæ observationes. Hinc morbi omnes corruptorii*

ab acidi defectu pendentes; acidorum medicamentorum administratione curantur. Sed de his fusius suo loco.

Sales nativi, qui scilicet a natura ipsa componuntur, sunt vel acidi vel alcalini, vel neutrales, vel medii terrestres, vel denique metallici. Sales acidi, & alcalini.
Acida proprio distinguuntur sapore acuto, & in statu puritatis minime ingrato; amara dein redduntur, magisque adstringentia dum aut simplici phlogisto scatent aut metallicis elementis, quod idem fere est, saturantur; quamadmodum observatur in acido muriatico, phlogisti tenacissimo, atque in vitriolo martis. Secundo loco acida, cum insigni effervescentia solvunt alcalia aërata, nempe alcalia quæ acido aëreo abundant, ideoque aërata dicuntur. Hoc autem accidit, quia acida omnia majorem cum alcalinis affinitatem habent, quam acidum aëreum, hinc alcalina relicto acido aëreo cum reliquis acidis conjunguntur. Interim acidum aëreum summa volatilitate præditum celeriter aëreoque excitato crepitu in auras dissipatur. Alkali vero causticum, nempe acido aëreo spoliatum nullam cum acidis quibuscumque effervescentiam gignit. Tercio loco acida tincturas cæruleas vegetabilium rufas reddunt, præsertim vero tincturam Heliotropii cæruleam in rubrum colorem mutant. Juxta variam tamen acidi speciem, vario modo tinctura Heliotropii mutatur. Ab acidis enim mineralibus dilute tantum rufa redditur, & contra ab acido aëreo in elegantissimum purpureum colorem vertitur. Hac profecto diversi-

tate accurati observatores; primo intuitu de acidi aërei in aliquo corpore existentia judicare possunt. Cæterum acida omnia concentrata cum oleis combinantur; aquæ tenacissima sunt, quam ab aëre utcumque sicco attrahunt; corpora animalia ac vegetabilia dissolvunt; cum aqua calorem, cum glacie frigus producunt; fluida animalia & vegetabilia, quæ coagulabilia sunt, coagulant. Difficillimum tamen semper erit hujus mutationis causam determinare. Hisce addendum, quod acida multa aqua dilutâ si a corpore humano suscipiuntur sitim extinguunt, calorem imminuunt, æstum compescunt, ideoque motum sanguinis circulatorium retardant; & urinx secretionem adaugent. Contra vero acida concentrata, nempe aquosis particulis spoliata sitim, calorem, ariditatem adaugent, pulsum durissimum, & insigniter vibratum reddunt, urinamque parciorem rufamque efficiunt. In primo etenim casu acidorum particulæ magnopere divisæ, atque ob aquæ interpositionem multum a se invicem sejunctæ, caloris sensibilis magnam copiam attrahunt, adeoque frigoris sensationem inducunt. At in secundo casu ob concentrationem peculiarem a phlogisto acceptam acuriam sive præcipuam causticitatem exercent. Hujusmodi qualitates generales magis ad materiam medicam accedentes, hoc in loco collocari debebant.

DE ACIDO VITRIOLICO.

ACida nativa etsi raro in maximo puritatis statu in terræ sinu occurrunt, quia cum variis substantiis combinata reperiuntur, in peculiare tamen species dividi consueverunt. Primum tenet locum acidum vitriolicum, cujus synonymia sunt *Acidum primigenium*, *catholicum*, *æthereum*, *sulphureum*, *aluminosum*, *oleum vitrioli*, *spiritus vitrioli*, *spiritus sulphuris per campanam*.

Acidum vitriolicum.

Præter qualitates, quas cum reliquis acidis communes possidet, acidum vitriolicum purum odore & colore caret. Rarissime in formam solidam frigore concrevit, sed aëre nitroso coagulari potest, e connubiis optime dignoscendum, uti alia acida. *Berg. Scia.* Acidum vitriolicum cum spiritibus ardentibus unitum, aciditatem deponit, unde oritur æther vitriolicus, usitatissima illa præparatio, cui insignis antispasmodica facultas tribuitur. Vetustioribus chemicis æther tantum vitriolicus innotuit; nostra vero ætate a reliquis etiam acidis æther paratur. Acidum vitrioli Ferrum, Zincum & Cuprum dissolvit. Per caloris gradum ebullientem cum metallis omnibus uniri potest. Corpora animalia, aut vegetabilia corrodit. Fermentationem prohibet. Cum alcalinis neutra facit, inferius describenda. Acidum deinde vitriolicum principio inflammabili copulatum

&c.

Acidum vi-
triolicum
phlogistica-
tum.

& calore attenuatum in vapores attollitur, & acidi vitriolici volatilis vel phlogificati nomen acquirit. Acidum vitrioli phlogificatum non raro eructant Vulcanorum voragine, odore instructum penetrantissimo, suffocante. Phlogiston inquinans, & caloris ligata materia aëream impertiunt formam, quæ tamen aquæ conubium non impediunt. *Berg. Sciagr.* Dum in hoc reperitur statu, difficulter concentratur; aliquid alienum, nempe phlogiston adjunctum habet. Majori proportionē alcalia saturat, ut & terras quoque absorbentes, quamvis minus acidi continet; nam ob summam particularum tenuitatem, majorem penetrabilitatem assumit. Corpora animalia ac vegetabilia minus afficit, metallica vero magis, quia corpora humida tenues acidi volatilis particulas absumunt, contra vero metallicorum corporum soliditas facilius a volatili, quam a densiori crassiorique acido penetratur. Affinitatem habet cum alcalicis minorem, servat enim primariam, quam cum phlogisto habet. Minus generat caloris cum aqua, & frigoris nive commixtum. Vaporem denique sulphureum emittit. Acidi vitriolici volatilis, sive vaporis sulphurei magnam profecto copiam suppeditant montes ignivomi, vel loca ab antiquissimis vulcanis quondam conflagrata. In sudatoriis calidissimis agri Neapolitani acidum vitriolicum valde volatile exhalat, atque ubi frigidioris aëris actionem experitur, generat purissimos flores sulphuris; ubi vicinam subjacentemque terram argillaceam offendit alumen gignit. Tincturam cæruleam Helio-

liotropii rubram reddit; ob copiosum phlogi-
 sum aërem respirabilem inertissimum reddit, &
 suffocationem affert. Lapides vulcanicos durissi-
 mos in Argillam vertit; unde in nostris vulca-
 nica verustioribus regionibus, colles terræque
 omnes argillaceæ sunt. Ideo etiam loca vaporibus
 sulphureis referta valde insalubria sunt, quia
 acidum sulphureum volatile phlogificationem aë-
 ris atmosphærici valde periculosam efficit.

Corpora nativa in quibus acidum vitriolicum
 reperitur sunt sal Glauberi natus, quemadmo-
 dum species illa, quæ abundanter occurrit in no-
 stra Calabria, atque sal Seliæ nuncupatur. Vi-
 trioli acidum continent etiam sales Metallici,
 qui Ferrum, Cuprum & Zincum pro basi ha-
 bent, uti sunt vitriolum martis nempe viride,
 vitriolum veneris, sive cæruleum, & Zinci, scili-
 cet album. Adest quoque in salibus terreis, qui
 vel alumine, vel terra calcarea sunt uniti; quem-
 admodum in alumine & sale cathartico ama-
 ro. In aquis variis, in atmosphæra, in aura
 electrica detegitur quoque acidum vitrioli. A-
 quæ aluminosæ omnes hoc acido abundant, &
 procul dubio acidi vestigia in scintilla electrica
 deprehenduntur. Inter omnia vero corpora, quæ
 acidum vitrioli suppeditant, non modo pro me-
 dicina sed maxime pro civili œconomia sunt
 vitriolum & sulphur; in decompositione enim
 harum substantiarum obtinetur, atque ejus pu-
 ritas per specificam gravitatem & pellucidita-
 tem determinatur. De acido vitriolico libero lo-
 quitur *Cl. Bergm.* in *Sciagraphia R. Mineralis*, Acidum vi-
tr. liberum.
 ubi

Acidi vitr.
usus.

ubi ait: In viciniis Senarum & Viterbii aqua dilutum inter collium lapides nonnunquam effluere narrat D. Vandelli, igne subterraneo sine dubio excussum, sed alias fere semper nuptum alcali, terræ, metallo, vel phlogisto. Hæc ad historiam acidi vitriolici generalem valde necessaria, dum hujus substantiæ naturam nobis aperiant, præcipuas quoque medicas facultates declarant. Recentiores itaque Prædici, utilissimis chemiæ principiis imbuti acida omnia per se, & præsertim acidum vitriolicum purissimum inter præsidia antiseptica, nempe corruptioni opposita, antiscorbutica, antiphlogistica, sive inflammationi contraria collocare consueverunt. Et quemadmodum ubi acidum vitrioli inflammationem avertit, acutissimas simul inflammatorias febres, nempe necessarios essentialis causæ effectus tollit, ideo huic substantiæ antifebrilem quoque facultatem Medici tribuerunt. Gravissimi rursus pectoris morbi, uti sanguinis sputus, ulcera pulmonum, hydro-thoracis periculosa initia, vomiciæ pulmonales, acidi vitriolici administratione magnopere sublevantur. In quocumque demum sanguinis fluxu hoc præsidio utiliter utimur. Sed sigillatim de propositis modo doctrinis differendum. Et primo quidem merito acidum vitriolicum antisepticum & antiscorbuticum esse existimandum est, quandoquidem in morbis febrilibus cum magna virium prostratione, cum lividis pectus, & atri sanguinis eruptione per varia corporis emunctoria, nihil utilius acido vitriolico, multa aqua diluto & copiosius ingurgitato. In ipsis
etiam

etiam sanguineis lethalibus variolis, in quibus omnia incassum præsidia administrantur, juvat ad acidum vitriolicum confugere. Vidimus sæpe extremum scorbuti venerei statum, in quo & gingivæ copiosum foetidumque sanguinem emittabant, & dentes decidebant, non modo acido aëreo, sed vitriolico etiam eradicative sanatum. In pustulis venereis pravæ indolis, admodum profundis, & quæ foetidum ichorem emittunt, uti nunquam medicamenta mercurialia sunt adhibenda, sic contra acidum vitriolicum, cum infuso vel pulvere corticis peruviani copulatum, curationem absolvit. In hisce casibus, uti & in reliquis omnibus spiritu vitrioli tenui, potius quam spiritu dulci utendum, juxta formulas inferius adnotandas. Ubicumque agitur de ulcere aliquo externo admodum sordido, ac corrupto pure referto, nil acido vitriolico interne usurpato utilius reperiri potest. Sæpissime in Erysipelate maligno, quæ superveniunt suppurationes profundæ sinuolæque sunt, quia a tenui acerrimoque pure proveniunt. Hic morbus diuturnus nec raro periculosus, sæpe eodem præsidio debellatur. Idem dicendum de gangræna externa, ab interna corruptoria causa proveniente. His positis antiseptica acidi vitriolici facultas solido admodum innititur fundamento. Sed unde nam vis antiseptica acidi hujus repetenda est? In septicis sive corruptoriis affectibus debita ac naturalis solidorum ac fluidorum componentium cohesio imminuitur, atque lethalis resolutio sequitur. Hinc acida quæ adstringentem primo facultatem possunt

possident, huic degenerationi opponuntur, quia coagulandi atque inspissandi proprietatem possident. Rursum in scorbutico affectu, in Lue Venerea diuturna, in confirmatis inflammationibus causa morbosæ densitatis, quæ præcipuam ægritudinem efficiebat, in eodem semper statu manere nequit, ideoque vitæ ipsius activitate in motum cietur; & quemadmodum causa hæc neque vitam communem vivere potest, neque peculiari motu propriaque uti in statu sanitatis œconomia fruitur, in corruptionem vergit. Generales illæ causæ morbificæ, quæ attenuari sive corrumpi debent, si nulla actione nullaque aut naturæ, aut artis operatione corriguntur, propriam degenerationem & corruptelam sanis partibus, sanisque etiam humoribus communicant. Acidum itaque vitriolicum nullo modo concentratum, immo contra valde dilutum, copiosaque aqua attenuatum morbosam dissolutionem mitigat, particulisque jam separatis naturalem cohesionem denuo restituit. Putrescentia rursus, corruptio & colliquatio in corpore humano semper alcaliscentia sive alcali caustico, vel juxta nostram doctrinam, phlogistio salino componitur. Igitur acidum vitriolicum propria affinitate cum memorato principio conjungitur & vehementissimam corruptionem, hæc ratione avertit. Hoc in loco magni facienda difficultas illa, qua contenditur acida omnia primariam actionem in prius viis exercere, atque vehementem tantummodo corrugationem gignere. A ventriculo etiam penitus mutari acida multi contendunt. Prima

vero difficultas respicit acida valde concentrata, quæ nullum internum usum habere debent, quia insigniter styptica sunt. Verum acida magnopere attenuata primarum viarum immediatam perfectamque actionem effugiunt, internalque sedes facile subeunt; urinæ enim profusissimæ obtinentur post acidi administrationem, atque immediata inde utilitas in morbis deprehenditur, uti inferius patebit. Scio acque in praxi observavi, immoderatum acidi concentrati usum vomitum lethalem, insuperabilem alvi stypticitatem, & cachexiam attulisse. Sed acidi concentrati urens, stimulus, & caustica efficacia a mitissima, refrigeratoria, & antiseptica acidi attenuati actione magnopere differt. Huic denique observationi adiciendum, quod fortasse acidum ærcum magnum scorbuticis emolumentum ideo affert, quia particulis constat tenuissimis, copiosæ aquæ immixtis, ut alibi etiam a nobis adnotatum fuit. In inflammatoriis rursum morbis, in quibus universi corporis calor sensibilis ultra modum augetur, & cutis accenditur, & lingua ruberrima statim arefcit, & sitis oritur intolerabilis, ac urinæ rufæ excernuntur, & caput vehementer dolet, nil acido hoc utilius; etiam si memorata accidentia in aliqua tantum peculiari externa sede deprehenduntur: in hisce etenim morbis acidum dilutum principio inflammabili opponitur, & caloris diffusionem prohibet. Sæpe etiam universalis inflammationis symptomata ab essentiali organi alicujus inflammatione ortum ducunt, uti accidit in Pleuritide, Hepatide, aliisque hujusmodi. Ef-

fense

Inflamma-
tionis causa

sentia genuini morbi inflammatorii duplici constat præcipuo effectu, caloris nempe sensibilibis superabundanti evolutione ac dissipatione, atque tenacissimarum substantiarum generatione celerique incremento. Causa etenim quæcumque stimulandi, irritandique activitate prædita, si universo corpori applicatur, & per vasa fertur, vel si peculiari aliquo adhæret organo, statim corrugationis, rigiditatis ac proinde doloris signa affert. Naturæ tunc vires adversus causam morbosam insurgunt, & calore, nempe vitalitatis instrumento armatæ, ægritudinis incommoda superare nituntur. Sæpe tanta est causæ irritantis validitas, ac rursus sæpe tanta cum celeritate fluida inspissantur, ut caloris primo sensibilis, deinde etiam latentis magna eveniente jactura, simplices inflammationes, in genuinos phlogisticos morbos transeant; unde Pleuritis inflammatoria in veram Peripneumoniam mutatur. Causæ quoque generales inflammationum ut plurimum acerrimis, urentibus & salinis particulis, sive potius alcali phlogificato componuntur. E. g. insensibilis perspirationis & sudoris materia, insigniter acris, dum a frigore externo intropellitur, dolores rheumaticos, nempe acutissimam articulorum inflammationem gignit. Bilis acrior facta & ad summum phlogisticata, inflammationem erysipelaceam affert. Frigida tempestate pulmones facilius quam reliquæ partes inflammantur, non solum quia prohibita perspirationis moleculæ facile ad pulmones feruntur; verum etiam quia magna phlogificari

are-

aëris quantitas in pulmonibus accumulatur, mor-
bique inflammatorii generationem accelerat. Si
igitur in inflammationibus generalis calor ani-
madvertitur, si acre phlogisticum abundanter
generatur, nil mirum si acido vitriolico, & ni-
troso etiam, aut vegetabili inflammatoriis affe-
ctibus occurritur. Non Pleuritides modo & Pe-
ripneumoniarum notharum acido vitriolico feliciter
tractantur, verum & Hydro-thorax & vomicae
pulmonales & sanguinis sputus periculosissimi,
hoc praesidio magna ex parte mitigantur, & sae-
penumero etiam eradicative curantur. Ulcera
profundissima in cruribus hominis hydrope pul-
monali affecti, cum immani artuum oedemate,
penitus sanata fuere urinae profluvio copiosissimo,
ab acido vitriolico procurato. Sanguinis sputum
brevis in foetidissimi puris sputum transeuntem
sanavit assidua ejusdem praesidii administratio.
Hisce in casibus, quemadmodum etiam in hæ-
morrhagiis omnibus, acida mineralia valde at-
tenuata magnum afferunt emolumentum, quia
dum phlogisticationem humorum emendant, len-
tis congestionibus, syderationibus & gangraenis
opponuntur. Hæmoptoycos vero, reliquosque æ-
grotos præternaturali sanguinis fluxu laborantes,
phlogisticam sanguinis, nempe densam satisque
tenacem diathesim possidere probat crusta illa in-
flammatoria, qua horum ægrotantium sanguis
obducitur. Immo ubicumque sanguis a va-
sis pulmonalibus laceratis egreditur phlogisticam
indolem habere procul dubio debet. Etenim
dum per longum tempus vel in vase varicoso,

vel in tuberculari congestione retinetur, phlogisticam qualitatem acquirit, quia aëris respirabilis sive dephlogisticati commercio privatur. In morbis pectoris ab ulcere pulmonum pendentibus, ob respirationis brevitatem, ob impeditam pulmonis naturalem expansionem phlogiston accumulatur, & contra respirabilis & dephlogisticati aëris absorptio imminuitur. En quare in sanguinis sputo, in catarrho diuturno, in vomica pulmonali & ipsa phthisi magnam affert utilitatem acidum vitriolicum dilutum, quia principii phlogistici vim frangit, & morbozæ tenacitati opponitur. In uterino vero sanguinis fluxu immoderato, in quo morbus ab acri pungentique muliebri sanguine sustinetur, nil præstantius acido nitroso. Acidum enim nitri cum acri alcalino, sive alcali phlogistico facillime combinatur, unde morbus statim compescitur, uti mox ostendemus.

Ratio administrandi acidum vitr.

Methodus propinandi acidum vitrioli purum in diversis morbis ita profecto se habet. In acutis inflammatoriis guttæ decem aut quindecim omni bihorio, cum largioribus aquæ dosibus propinantur, usque ad sitis extinctionem, & febris imminutionem. In Pleuritide, in morbis hepatis inflammatoriis aliisque, eadem ratione hoc remedio utimur. Verum si tussis post sanguinis sputum persistens, & cum expectoratione conjuncta, tractanda est, spiritus vitrioli uncia dimidia, aut integra propinanda est, ne scilicet puris moleculæ, quæ jugiter sanguini communicantur generalem corruptionem afferant. Hæc

vero acidi quantitas quotidie administrata nullum certe damnum inducit, uti vulgus existimat; immo contra phthisim pulmonalem incipientem unico hoc præsidio curatam vidimus. Sunt qui in morbis pectoris utuntur non modo simplici spiritu vitrioli tenui, aut spiritu sulphuris per campanam, sed adhibent etiam composita ex acido vitriolico, uti sunt vitriolum viride, liquor anodynus mineralis dictus, & æther. Qui vomitus utilitatem in Phthisi pulmonali experti sunt, drachmam unam vitrioli viridis sive martis, frequenter exhibent, & hac ratione vomitum excitant. Sed nulla adeo vehemēti operatione hoc in casu opus est, ideoque potius Tartarum emeticum ad grani dimidium exhiberi potest; nam mitissime hoc emetico stomachus evacuatur, & pulmones repurgantur. Hanc methodum felicissimam semper in praxi expertus sum. Sunt & alii qui magis refractam actionem vitrioli martis phthisicis commendant, & ideo sequenti formula, magna cum utilitate utuntur:

℞. Vitrioli Martis &

Terebinth. Venet. singulorum drachmam unam;

Terantur simul in mortar. marmor. & dein diss. in aqu. lib. quinque. Post dissolut. aqua per chartam traicienda & usui servanda est.

Aqua hæc vitriolata pro potu communi ab ægroto adhibenda. Ab acidi antiseptica facultate, atque a tonica ferri activitate non mediocris certe utilitas expectanda. Nam martialia præsidia in mor-

bis pectoris confirmatis, fere semper cum aliquo emolumento adhibentur. De usu acidi vitriolici in pustularum venerearum & bubonum curatione, aliquid superius innuimus. Cerrissimum etenim est hoc præsidio corrupto pure refertas pustulas sanari, ac proinde ad drachmam unam aut alteram propinari debet, una cum decocto Corticis Peruviani admodum attenuato. Dosis hæc quotidie usurpata eradicativæ curationis fundamentum constituit. Eadem ratione incedendum ubi Bubones venerei inopportuna damnosaque chirurgica operatione admodum irritati, acutissimæ febris originem sive occasionem suppeditant. Tunc uberrimæ acidi vitriolici doses, utpote trium vel quatuor drachmarum quotidie cum cortice antiseptico administrandæ sunt; constanterque etiam ad balneum tepidiusculum deveniendum est. Præparata salina, quæ acidum vitrioli probasi habent in tractatu de salium neutrorum & terreorum proprietatibus illustranda sunt.

DE ACIDO NITROSO.

Acidum Nitrosum non esse Regni fossilis Acidum ni-
 substantiam nonnulli contendunt, atque a trosium.
 corruptione & decompositione corporum organi-
 eorum ortum ducere existimant. Sed ipsa hæc
 corpora in fossilium etiam compositione repe-
 riuntur, unde potius de promiscua origine dubitan-
 dum. Certissimum tamen est substantiam nitri
 purioris, sive salis neutri cujus basim constituit aci-
 dum nitrosum in terræ tantum superficie reperiri,
 quandoquidem pro nitri generatione aër atmos-
 phæricus admodum necessarius evadit. Acidum
 nitrosum appellatur quoque *spiritus nitri*, *aqua*
fortis, & *spiritus nitri Glauberi*. Obtinetur ex
 salibus nativis nitrosis, vel a terris animali &
 vegetabili materia saturatis. Huic œconomix
 innixi, qui nitri præparationem suscipiunt sem-
 per corpora nitrosis elementis referta aëri expo-
 nunt, pluviam tantum vitantes. Proprietates
 acidi nitrosi generales diversæ a reliquis sunt.
 Acidum enim nitri primum omnium volatile
 est, atque rubri coloris; color vero pendet a
 phlogisto, nam quo magis hoc principio satura-
 tur, magis rufum colorem assumit. Maximam
 post acidum vitriolicum volatilitatem habet.
 Cum oleis & spiritibus vinosis violenter effe-
 vescit, quia principium inflammabile summa
 cum aviditate attrahit. Ob eandem rationem

corpora plurima metallica dissolvit, atque stannum & antimonium peculiariter corrodit. Ubi cum metallis conjungitur & inflammabili principio saturatur, in vapores vitæ admodum inimicos dividitur, & aërem componit respiratori valde noxium. Hoc fluido aëiformi, cui nomen aëris nitrosi tribuerunt chemici; aëris respirabilis sive dephlogisticati quantitas facile determinatur, quo enim major aëris imminutio accidit cum aëre nitroso & major erit semper aëris respirabilis copia. Acidum deinde nitrosum minus generat caloris cum aqua, sed plus frigoris si cum glacie miscetur. Phlogisti avidissimum est, hinc inflammationem majorem reddere existimatur. Sed in vapore nitri purioris, qui combustionis & detonationis opera obtrinetur, vis peculiaris impurum & respiratori ineptum aërem corrigendi reperitur. Saluberrimum inde chemicum processum instituit D. Achar, quo mediante noxii Nosocomiorum vapores, nitri conflagratione & fusione corriguntur. Magnam etenim purissimi ac penitus dephlogisticati aëris copiam continet nitrum; atque hæc ignis, sive potius caloris opera educitur. Hoc autem accidit, quia in conflagratione acidum nitri omne phlogistum ad se attrahit, unde aër dephlogisticatus, quod idem est ac aër ignis, sive materia caloris, abundanter evolvitur, & vitalem aërem constituit. Hanc doctrinam evidenter probant experimenta Pryestliana, in quibus calces plumbi acido nitroso madefactæ & campana vitrea inclusæ, dum lente ustoria comburuntur plumbi regene-

Usus Acidi
Nitrosi.

rationem efficiunt; & magnam purissimi respirabilis aëris copiam suppeditant. In hoc certe experimento acidum nitrosum cum phlogisto solari conjunctum calcem, nempe terram metallicam plumbi in genuinum plumbum vertit; materia vero caloris, nempe aër vitalis, omni phlogistica coinquinatione spoliatus suam respirabilitatem manifestam reddit. Si igitur acidum nitrosum principium inflammabile concretum adeo violenter attrahit, poterit certe in multis morbis mere phlogisticis magnam utilitatem asferre. Verum non idem est in inflammatione, aut in phlogistico morbo acidum nitri adhibere; in inflammatione enim prodest, quia caloris imminutionem gignit, sed uberrimæ doses acidi semper vitandæ sunt, ne scilicet hoc præsidio phlogisti quantitas augeatur. Rursum si de calore morbofo ad summum aucto, & acidi nitrosi activitate dissipando agitur, distinguendæ etiam sunt variæ morbofi caloris species. Et sane simplicissimi caloris vitiosa evolutio, quæ œconomiz animali valde incommoda est, ab acido nitroso copiosius assumto imminuitur. Sed contra urentissimus calor putridorum morborum, & qui a principio inflammabili, acerrimo & fere caustico penderet, raro compescitur ab acido nitri purissimo & urentissimo. Specificam deinde facultatem exercet acidum nitrosum in sanguinis fluxu & præsertim in hæmorrhagia uterina, quæ aut post partum laboriosum, & lochiorum suppressionem accidit, aut deficiente menstrua evacuatione in mulieribus proVectioris ætatis observatur. Incommoda

hæc & sæpe etiam periculosa ægritudo sapissimè vincitur spiritu nitri tenui ad guttas decem conservæ Rosarum incompletarum immixto, & omni trihorio propinato. Sunt qui loco simplicis spiritus nitri, utuntur elixire nitri acido, cujus compositio in formulis medicamentorum extat. Acido deinde nitroso facultas diuretica præstantissima tribuitur, & ideo in leucophlegmatia, calculo, œdemate aliisque a colluvie serosa pendentibus morbis commendatur, & spatio 24 horarum ad drachmas duas, cum decocto aliquo diuretico administratur. Verum in hisce casibus mera nitri aciditas, sive principium acidum tanti momenti efficaciam non habet; siquidem diuresis potius augetur salibus alcalinis, quam omnino acidis. Immo acidum nitrosum inter præstantiora diuretica collocatur, quia nitrum depuratum urinas abundanter educit. Sed in nitro sive sale neutro alcalinæ copiosissimæ particulæ, quæ attenuantes, stimulantæque sunt, & certum resolutionis sive corruptionis gradum in fluidis inducunt, principes diureticas vires possident. Hoc ulterius probatur exemplo nitri fixi, & cremoris tartari. Etenim nitrum fixum, nempe substantia salina ab alcalica nitri basi composita, magni momenti, diureticum acido nitri procul dubio anteferendum præbet. Diuretica cremoris tartari facultas alcalinis elementis omnino debetur; hinc acidi nitrosi vires diureticæ nullam primariam hujus acidi proprietatem constituunt.

DE ACIDO MURIATICO.

Tertia acidi mineralis species, nempe Acidum muriaticum, diversa obtinuit nomina; dicitur enim *spiritus salis marini*, *spiritus salis gemmæ*, *spiritus acidus salis ammoniaci*, & *spiritus salis Glauberi*. Juxta descriptionem el. Bergman; in cortice Telluris uberrime hospitatur. Acerrimum est, admodum volatile, atque peculiari nauseoso odore gaudet. Præter aciditatem insigniter stypticam, summam quoque tenacitatem habet; hanc vero mutuatur a principio inflammabili, cum quo intime conjunctum est. Superflua spoliatum aqua, æream induit formam; nam phlogiston instar principii compagem intrat. Liberum nunquam fortasse occurrit, nisi in aquis meteoricis; Obtinetur vero ex animalibus, vegetabilibus, fossilibus: a fuligine, sale gemmæ vel sale communi. Concentrationis suæ signa sunt, color flavus, & particulæ oleosæ supernatantes. Ad proprietates vero generales hujus acidi, quod attinet: I. unc. 22. alcali vegetabilis unc. 1. saturat: II. oleis difficillime jungitur, cum spiritibus vinosis facillime. In corpora metalla promte agit. Cum aqua & glacie eisdem, ac alia acida, gradu tamen minori, producit effectus.

Recentiores practici, qui de viribus medicinalibus acidi muriatici loquuntur, illius qualitates refrigeratorias, temperantes, diureticas, le-

viter

Acidum muriaticum.

Usus acidi muriatici.

viter laxativas, & antisepticas commendant. Hinc in febribus malignis, ac biliosis, in renum ac vesicæ morbis, cum urinæ difficultate conjunctis, exhibent guttas aliquot, ab octo usque ad 20 in jusculo aliquo, vel julapio dulci. Verum tanta est hujus acidi difficillime mitiganda phlogisticatio, ut sæpe caustici, sive corrosivi medicamenti vices gerat. Febricitantes enim, qui acido muriatico simplici utuntur molestam sitim, nimiumque calorem experiuntur. Ab hoc vehementi stimulo pendent emolumenta, quæ obtinetur ab acido muriatico cum melle Rosaceo, aut decocto hordei, gargarismatis forma usurpato in maligna sive ulcerosa angina, atque in sordidis faucium & oris ulceribus. Cum aqua mixtum vesiculas oris sanat, & cum spiritu vini concentratissimo confert ad ulcera cancrosa. Hic vero insanabilis morbus non sine magno celerioris mortis periculo, hoc medicamento externe tractatur. Spiritus salis communis dulcis, sive acidum muriaticum dulcificatum aut vinosum, ex spiritu salis & spiritu vini rectificatissimo, destillationis opera paratum, acido muriatico simplici semper anteferri debet, atque in morbis putridis summo cum emolumento usurpatur. Utilitatem quoque summam affert in alvi fluxu, dysenteria, nephritide, omnibusque ventriculi atque intestinorum affectibus, qui a debilitate & laxitate partium, aut a facili humorum corruptione oriuntur. Dosis variat juxta morbi indolem, ægrotantium constitutionem, ac reliqua accidentia; potest vero adhi-

beri

beri ab uno usque ad duos scrupulos , sive ad drachmam unam spatio 24. horarum . De aëre ^{Aer muriaticus.} muriatico , sive de acido muriatico volatili loquuntur nuperrimi formularum medicinalium scriptores . Fluidum hoc aërisforme ait D. Reuss expellitur a sale culinari , ope acidi vitriolici concentrati cum odore croceo . Vis antiseptica aërem corrigens putridis effluviis impletum ; phlogisti autem accessu corruptum nequaquam emendat . Usus in statu putrido humorum corporis humani . Nos vero qui acido aëreo & vitriolico specificam vim antisepticam inesse , observationibus innixi contendere possumus , de aëre muriatico antiseptico minime solliciti sumus .

DE RELIQUIS ACIDIS MINERALIBUS .

DE reliquis peculiaribus Regni mineralis acidis ^{Nova acidorum species.} vel imperfecte cognitis , vel noviter tantum detectis breviter modo differendum est . Acidum primo fluoris mineralisatum , sive fluoratum valde volatile est . Vapores emittit calidos , qui vitrum corrodunt , & humido occurrentes terram filiceam generant , vel saltem deponunt . Superflua separatim aqua hoc acidum aëream adipiscitur formam . Sponte liberum adhuc invenit nemo , sed calci nuptum adest in fluore minerali & ni fallor , omne quoque filiceum intrat . Hæc e chemicorum libris deprompta naturam , hujus acidi declarant . A medicis vero non adhuc usur-

usurpatur, noxiasque potius qualitates possidere videtur.

Acidum arsenicale.

Majoris momenti est intelligentia acidum Arsenicis; oportet enim ut medicus non medicamentosas modo & salutare, sed noxias quoque & venenatas substantias perspectas habeat. Acidum itaque Arsenici siccum arte paratur, igne fusibile & fixum, donec materiae caloris tantum abstulerit phlogisti, ut formam acquirat arsenici albi. In aëre humido deliquescit. Liberum sponte non occurrit, sed ligatum invenitur calce cobalti, & praesertim phlogisto in arsenico metallo fragili ejusdemque calce. Deleteria & indubitata mortem afferens arsenici activitas ab acido pendet; nam adeo strictum cum phlogisto connubium habet, atque adeo abundanter hoc principio saturatur, ut nihil cum ipsius corrosiva activitate, comparari possit. Fuerunt tamen & Praetici, qui tenues arsenici doses in diuturnis intermittentibus & obstinatis viscerum naturalium obstructionibus commendarunt. Nec desunt nonnulli inter nostrates, qui in pertinaci quartana arsenici granum semis quotidie propinare audent, atque de salutari tanti veneni effectu summa impudentia gloriantur. Accidentia vero gravissima sunt vel febres lentæ, lethales, vel sanguinis sputus irreparabiles, vel horrida ventriculi ulcera. Ab acido itaque arsenicali, tamquam a lethali veneno abstinendum.

De acido Molybdendico, de acido calcis ponderosæ, atque acido phosphorico nihil adjiciam, nullum enim præcipuum in medicina usum habent.

bent. Acidum tamen phosphoricum a limatura cornu cervi eductum vel potius terram absorbentem in compositione pulveris antifebrilis *D. James* reperiri multi existimant. Contra vero de acido Boracis nonnulla accuratius sunt adnotanda. Hæc acidi fossilis species, juxta chemicorum definitionem vulgo salis sedativi nomine distinguitur: In lacu prope Senas in magno Hetruriæ Ducatu liberum invenit *D. Hoefer* an. 1778., & in Borace nativo ligatum alcali minerali, longe antea cognitum fuit. Instar acidi agit, sed admodum debilis. Igne funditur, & aqua volatilifari potest. Obituratur facile ope acidi vitriolici, quo alcali fossile separatur ab acido boracis. Substantia hæc salina passim dignoscitur in officinis nomine salis sedativi *D. Hombergii*, atque in omnibus convulsivis morbis, passione præsertim hysterica, & hypochondriaca administratur. In febribus etiam, convulsionibus existentibus, commendatur. Dosis est a granis quinque usque ad quindecim aut viginti. Quamvis vero multa de sale sedativo a practicis soleant prædicari, nullam tamen essentialem ab hoc medicamento utilitatem expertum. Et sane qua ratione acidum concretum & valde debile magnam in nervos actionem exercere valeat ignoro!

Acidum æreum, æris fixi nomine antea insignitum, aquis mineralibus acidulis, & martialibus magna satis proportionem continetur; pluribus fossilibus, præsertim alcalibus & terris inhæret. In atmosphæra liberum adest, atque ab animantibus.

malibus & vegetabilibus jugiter emittitur . Acidum deinde aëreum est causa immediata effervescentiæ inter acida reliqua cum alcalicis combinata ; nam ob levissimam quam cum alcalinis affinitatem habet , ab acidis omnibus suam basim relinquere cogitur . Ubi cum calcareis , & alcalinis jungitur, substantias quas occupat dulces reddit ; & contra si illas deserit causticitatem gignit . A præsentia igitur & absentia hujus acidi alcali mite , vel causticum redditur ; immo corporum cohesio secedente acido aëreo amittitur . Ob hanc rationem marmora calcarea , durissima dulcis saporis terra composita , dum ignis actione acido aëreo privantur , in friabilem & causticam calcem vertuntur . Substantiarum animalium & vegetabilium corruptio , a dissipatione acidi aërei primario oritur . Ideo quia restituto hoc principio putrescentia emendatur , acidum aëreum inter antiseptica præsidia collocari meretur ; atque ideo nos peculiari diligentia aeris fixi qualitates , quarum intelligentia medico valde necessaria est , hoc in loco adnotavimus . Reliqua ad chemiam tantummodo spectantia libenter prætermittimus . Acidi aërei existentiam indicarunt veteres obscure , Helmontius perspicue , nomine *Gas sylvestris* . Accuratus descripsit Leonardus a Capua , dum de aëre mephitico sermonem instituit . Integram vero doctrinam primus chemice demonstravit Black in Dissertatione de magnesia , ulterius illustravit Priestleyus , atque ad umbilicum perduxit Bergman in peculiari dissertatione , atque nomen acidi aërei primus imposuit . Reliqui ,

qui

qui de eodem argumento scripserunt imitatorum tantummodo, non inventorum nomine sunt designandi. Pharmaciam hoc auxerunt præsidio, imperfecte Pringle, felicissimo vero cum successu cl. Percival & reliqui scholæ Anglicæ sectatores. Ipse primus inter nostrates aëre fixo eradicatorum multorum morborum curationes institui, & in fundamentorum Botanicorum secunda parte adnotavi. Methodus exhibitionis simplicissimus est, quandoquidem sales omnes alcalini mites, & qui ob magnam quam continent acidi aërei copiam aëratī dicuntur, cum acido quocumque conjuncti, & tempore sive ipso effervescentiæ momento propinati, magnam acidi aërei copiam corpori suppeditant. Iterato igitur ægrotantibus exhibentur grana decem salis tartari, vel absinthii, dum substantiæ hujusmodi salinæ cum succo limonum, aut acido quocumque fossili conjunctæ insignem effervescentiam generant.

Diversæ modo indicandæ sunt formulæ acidum aëreum exhibendi in morbis superius adnotatis. A cl. enim Priestleyo præscribitur sequens mixtura:

Rx. Sal. Tartar. scrup. j.

Aqu. font. unc. sem.

Sacchari alb. scrup. j.

M. cum succ. limon. unc. sem. incipiente ebullitione propinetur, & omni hora repetatur.

Secundo loco adicienda est aqua aëris fixa ex Dispensatorio universali D. Reuss excerpta: nempe:

Rx.

R. Aqu. fluvialis quantum libet, quæ probe est saturanda aëre fixo, e solutione Cretæ in acido vitrioli prodeunte, aut alia simili, vel cum aëre fixo e fermentantibus liquoribus prodeunte. Vis acidum involvens. Usus in saburra acida humorum inprimis viarum primarum, asthmate, dispnoea.

Huic præparationi adnectitur aqua aëris fixi martialis dicta, quæ non mediocrem utilitatem asserere potest in morbis a debilitate ortum ducentibus. Aquis martialibus nativis præparatio ferri in acido aëreo soluti procul dubio anteferenda est, quandoquidem aquæ naturales ferro saturatæ non mediocrem quoque alicujus salinæ substantiæ quantitatem continent. Nequeunt ideo corroborantem simpliciter qualitatem a cathartica sejunctam exercere. Ob hanc igitur rationem sequentem formulam adjungendam censui; eo magis quia non raro hoc medicamento indigent ægrotantes a fontibus martialibus longe diffiti.

In aqua aeris fixi

Fila ferrea suspenduntur, donec

Aqua a soluto ferro saturetur;

Hæc dupla, aut ubi exigitur, tripla portione simplicis aquæ aëris fixi diluitur.

Vis fortior, magis roborans, tonica. Usus in debilitate partium, & præsertim viscerum abdominalium. Clysteres etiam ex aquis acido aëreo saturatis parati magnopere commendantur in putridis ac revera dissolutoriis morbis; verum incerto huic, ac sæpe inefficaci præsidio usus internus ejusdem substantiæ antefendus.

Pauca demum de acido succini, juxta chemi-
 corum nuperrimas observationes apponam. Acidum itaque succini, uti loquitur Cl. Bergman vocari potest *sal concretus ab electro elicitus*, nam instar acidi debilis se gerit. Num regno vegetabili ortum debeat succinum, adhuc disceptatur, interea fossiliis adnumerant haud pauci. Rursum ubi de Petroleo loquitur hæc de succino scribit: *Petroleum acido succini adunatum, idem est ac succinum. Multi e regno vegetabilium ortum contendunt; interea quum inter fossilia reperiatur, & origo nondum satis sit illustrata, hoc refero.* Petroleum vero sequentibus principiis constare certum est. Phlogiston in nexu oleoso etiam inter fossilia occurrit, sed e Regno vegetabili illud haud pauci derivant: hæc est Petrolei definitio. His positis facillimum erit intelligere naturam olei & tincturæ spirituosæ succini; hæc enim præparata passim administrantur externe aut interne in morbis omnibus convulsivis, & præsertim in mulierum passione hysterica, & motibus convulsivis puerorum: confriantur etiam tinctura succini loca contusa, aut lymphaticis congestionibus affecta. Quoad notissimam qualitatem antispasmodicam tincturæ succini, hanc ab oleosis phlogisticis elementis pendere procul dubio existimandum, principium enim phlogisticum præternaturalem, nimiam & ideo morbosam succi nervei activitatem valde imminuit. Hinc hystericae mulieres tempore paroxysmi, simplici odore memoratæ tincturæ, aut a moderatis dosibus intus assumtis mirifice sublevantur; excepto tantum casu illo, in quo convuls-

vulſiones hyſtericæ cum vehementi capitis dolore, validoque capitali pulſu copulantur. Tunc enim tinctura ſuccini noxia potius deprehenditur. Doſis pro uſu interno eſt a guttis decem, uſque ad triginta. Sunt qui eodem remedio utuntur in menſtruationis defectu, dum de mulieribus agitur admodum valido corporis habitu præditis; tunc enim juvat debilitando nervorum actionem, admodum neceſſariam vaſorum uteri relaxationem procurare. Oleum ſuccini ad guttas tantum tres vel quatuor adultis mulieribus propinatur, atque infantes motibus convulſivis correpti ſupra articulationes, & circa nares eodem oleo inunguntur. Præparata igitur ex ſuccino vim antiſpaſmodicam non ab acido ſuccini, ſed a principio oleoſo mutuuntur, nunquam ideo in morbis phlogiſticis adhibenda. Longam uſque adhuc acidorum hiftoriam chemico-medicam perſequuti ſumus, non ſolum quia acida ſimpliciſſima per ſe inſignes poſſident vires, ſed etiam quia aliarum compoſitarum ſubſtantiarum baſim conſtituunt.

DE SALIBUS ALCALINIS .

DEfinitio alcalinorum ex Sciagraphia Regni Sales alcali-
 mineralis deprompta , ita se habet : *Alca-* ni.
lia sapore lixivioso proprio , acidorum vehementi at-
tractione & cæruleos vegetabilium succos virescendi
facultate dignoscuntur . De illis solitariis alioquin il-
lud fere valet , quod de acidis antea notavi , eorum
nempe tantam esse attractionis virtutem , ut diu vi-
dua esse nequeant . Ambiens atmosphaera acidum
saltim aereum exhibet , si aliud potentius desideratur .
Hinc semper nupta occurrunt , nisi arte præparata .
 Connubium acidi aërei cum alcali præbet alcali
 mite , sive aëratum ; atque ab hac combinatione ,
 uti supra dictum est , effervescendi facultas , ubi cum
 aliis acidis conjungitur , essentialiter pendet .
 Si alcali acido aëreo spoliatum atmosphææ , nempe
 aëri libero exponitur , summa rapiditate acidum
 attrahit & causticitate amissa mite redditur . Sa-
 les igitur alcalini in statu solido sunt mites , a
 combinatione cum aëre mephitico , sive acido
 aëreo . Mites effervescentiam cum acidis cient ,
 caustici nullam . Cum oleis saponem , cum sul-
 phure hepar sulphuris formant . Cum acidis ca-
 lorem generant , itemque cum aqua , si sicca
 & caustica sint , & crystallisati frigus . Alcalia
 usque adhuc cognita tria sunt . Alkali vegeta-
 bile , fossile & volatile . Alcalini vegetabilis
 synonyma sunt , cineres clavellati , cineres rus-

fici, *sal tartari*, *sal absinthii*, *nitrum fixum*, *fluxum fixum*, *lapis infernalis*. Obtinetur a calcinatione vegetabilium integrorum. Alkali fixum vegetabile omni orbatum acido, telluris crusta non promit, interdum vero ligatum fovet vel vitriolico, vel muriatico; sæpissime nitroso, rarissime aëreo. Neque alcali fixum minerale viduum prostat, sed semper maritatum acido, rarius vitriolico vel nitroso, plerumque muriatico vel aëreo. Alkali vegetabile in statu causticitatis aquam ab aëre avidissime attrahit & deliquescit. Causticum & mite, eadem producunt neutra. Causticum cum spiritibus vinosis se se conjungit, in quibus tamen si sit aqua, eam attrahit & fundum petit. Phlogistico conjunctum, corporum metallicorum fusionem promovet, & plurima eorum dissolvit. Cum terris in universum vitrescit. Causticum corpora animalia & vegetabilia dissolvit.

Altera alcali species alcali fossile dicitur, ac verum nitrum vel natrum antiquorum esse existimatur, est productio naturalis, quæ in Asia & Africa ut plurimum invenitur. Obtinetur a sale marino, sale Glauberi, Borace; ex aquis mineralibus & plantis marinis; etiam a quadam efflorescentia, quæ super muros cryptarum subterranearum sæpe apparet: Ab alcali vegetabili parum discrepat, præter quod, aquam ab aëre minime attrahit, & acidis commixtum, alia producit neutra. Tertio denique loco alcali volatile argillis sæpe inhæret, sine dubio aëratum; nam causticum, artis auxilium postulat. Præterea &
mu-

muriatico unitum reperitur. Obtinetur per distillationem ex omnibus corporibus animalibus & vegetabilibus; ex his tamen parce, nisi post putrefactionem, a sale etiam ammoniaco. Aquam avidissime attrahit; hinc plerumque in forma crystallina est, ergo mite, namque ubi causticum sit, semper fluit. Cum sulphure distillatum dat Tincturam sulphuris Hoffmanni. Mite cum spiritibus vinosis, dat offam Helmontii; cum oleis essentialibus & spiritibus vinosis sallem volatilem oleosum: causticum, cum sulphure, tincturam volatilem: causticum cum oleis essentialibus, & oleo succini in spiritu vini solutis, dat *eau de luce*. Causticum calculum humanum dissolvit. Alcalinorum indoles præcipua versatur in diuretica, attenuante, ac resolutoria activitate, quæ dum intra certos continetur limites multorum morborum curationem efficit. Sed alcali suam actionem ab acutis, urentibus igneisque particulis desumit, hinc inter substantias stimulantibus & quidem vehementiores collocari meretur. Majorem semper, at fere semper noxium effectum gignit alcali causticum, quia igneis activissimis elementis magna ex parte componitur. Mea quidem sententia alcali substantia est phlogistica, quæ si acido aëreo saturata reperitur minimam exercebit actionem; sed acido suo viduata & igneis elementis per superabundantiam combinata causticandi vim adipiscitur. Hanc doctrinam multis observationibus superstructam, in materia medica Regni vegetabilis illustrare conati sumus. Alcalina omnia

Alcalinorum
 usus.

etiam mirissima saporem habent acutum, im-
mo urentem, ideoque stimulantia & irritantia
esse debent. Nil itaque mirum si multæ se-
cretiones a morbosa aliqua causa interruptæ, al-
calinorum usu statim abundanter eveniunt.
Et sane natura ipsa indolem stimulantem, cer-
to gradu corruptoriam, ac proinde resol-
ventem manifeste ostendit. Nam ut variæ ex-
crementiæ substantiæ, vel naturaliter evacuan-
dæ, vel post morborum subtractionem pro sanita-
tis incolumitate eliminandæ sunt omnes aut in
alcalinum mutatæ, aut cum acuto tenuique alca-
lino principio conjunctæ emittuntur. Hoc proba-
tur odore alcalino sæcum alvinarum, sensibilis at-
que insensibilis transpirationis, urinæ, sanguinis
menstrui, aliorumque excretorum. Uteri ac pe-
nis glandulæ acerrimum effundunt alcali, ut ex-
quisito sensu percellantur partes venereis usibus
dicatæ. Saliva quæ digestionis, nempe comminu-
tioni & dissolutioni ciborum inferuit, & quæ
corruptionis speciem in alimentis inducit, alca-
linis abundat particulis; neque succus gastricus
eodem principio destituitur; nam præter salis
marini non spernendam, quam continet copiam,
acidum verum nunquam fere in ventriculo re-
peritur. Immo aciditates vulgo dictæ nullum aci-
di, sed contra alcalini saporem præferunt.
Hoc etiam confirmatur specifica fere acidorum
activitate adversus imaginarias aciditates prima-
rum viarum. Alcalinum itaque in corpore abun-
dat, pro actione & motu, ac pro secretionibus
admodum necessarium; atque eodem principio cor-

pus indiget ne acidum valde tenax & immeabile cum magno œconomix animalis incremento augeatur. Multi deinde sunt morbi, qui alcalinis, semper tamen mitioribus, nempe aëratiss tractari debent, quia a nimia humorum tenacitate, atque ab adaucta cohærentia ortum ducunt. Hujus classis sunt lentæ & diuturnæ organorum abdominalium, Hepatis scilicet, Lienis, Mesenterii, Uterique obstructions; præsertim illæ, quæ febribus intermittentibus superveniunt. Colluvies serosa non solum illa, quæ adnotatis obstructionibus adjungi consuevit, verum & illa, quæ a tenacibus, lentis, viscidisque humoribus gignitur, alcalinis copiosissimas urinas stimulo excitato educentibus, facile superatur. Sanguinis menstrui defectus alcalinis vincitur, atque non modo regulares menstruationes hac methodo obtinentur, verum etiam si lochiorum repurgatio in puerperis ab accidentali aliqua causa intercipitur, alcalinis restituitur. Quo pacto insignis ab alcalinorum usu obtineatur utilitas ignorant qui attenuantem stimulantemque illorum qualitatem minime intelligunt. Simplissima methodus exhibendi alcalinum præsidium se se offert in administratione Cremoris tartari, quo cum insigni emolumento utimur in colluvie serosa, & præsertim in Anasarca & Ascite. Primi omnium Itali, Academix Bononiensis socii uberiores cremoris tartari doses hydropicis propinarunt, atque eradicativam inde curationem obtinuerunt. Passim modo utimur tribus vel quatuor hujus medicamenti drachmis

quotidie una cum decocto chamæmeli, aut infuso vel aqua distillata florum verbasci. Urinæ hac ratione copiosissimæ & sedimentosæ evacuantur, atque alvus etiam mediocriter subducitur. Utilitas cremoris tartari in colluvie serosa non modo pendet a stimulo illo alcalinis substantiis inhærente, quo renes sollicitantur & vesica stimulatur, sed etiam in hoc casu ab acido tartari non mediocriter corrigitur calefaciens, urens & caustica alcalini facultas. Contrarium enim accidit ubi alcalina simpliciora, quæ non modo acido peculiari privantur, sed ob parcissimam acidi etiam ærei quantitatem, ad causticorum naturam propius accedunt. Non mirum ideo si plantæ diureticiæ, ut plurimum, internum generant ardorem, linguam inflammant, & urinas valde rufas educunt. Hoc fere semper accidit, dum imprudenter medici largiores pulveris radicis scillæ doses exhibent. Eiusdem naturæ damna deprehenduntur in administratione extracti cicutæ, a quo juxta recentissimas observationes non convulsiones modo, sed lethales syderationes ortæ sunt. Alkali etenim phlogificato procul dubio hæc planta saturatur. Tutissimum itaque erit cremorem tartari cum infuso memoratarum plantarum, aut cum decocto *solani officinalis*, vel *S. sodomæi* exhibere, mane & vespere. Alterum alcali quo feliciter in praxi utimur est nitrum fixum, sive pars alcalina nitri, quæ contra net alcalinum vegetabile, fortasse cum tenuissimo post detonationem superstito acido nitroso conjunctum; unde majorem quoque activitatem adi-

adipiscitur. Immo non raro hydropicis nitrum fixum cum nitro depurato propinare soleo, ut alcali semper cum tenui quamvis acidi quantitate copulatum mitissimo stimulo operetur. Duæ nitri fixi drachmæ spatio 24. horarum per intervalla administrantur in lochiorum defectu; atque eadem dosi uti possimus pro evocanda menstruatione. Sunt qui inter emmenagoga primi ordinis boracem Venetum collocare solent; & quidem merito, nam borax alcali fossili abundantissimo & sale sedativo, nempe acido Boracis componitur. Non spernenda ideo formula illa communis, quæ simul conjungit boracis scrupulum unum cum semidrachma myrrhæ lucidæ. Hoc remedio quotide administrato in chloroticis sanguis menstruus educitur. In eadem formula adiicitur non raro extractum cicutæ sed admodum parce; nam si ultra dosim granorum quindecim aut viginti propinatur, molestum ventris fluxum inducit. Oculi, ita dicti, cancerorum, terræ absorbentes, magnesia alba, pulveres diversi aëratī, & alia ejusdem naturæ alealina mitiora commendantur in stomachi aciditate, in morbis renum & vesicæ, ac præsertim adversus calculum summis laudibus extolluntur; quia lithontripticam facultatem, juxta medicorum sententiam, possidere creduntur. Celebratissimum Dominæ Stephens remedium pro calculi dissolutione calce ostrearum, aliorumque testaceorum componebatur. Sed decantati adeo specifiçi activitas a sua inventrice proposita omnino deinde frustrabatur successu. De sale absinthii aliis.

que

que similibus alcalinis nihil profecto adiiciam, quandoquidem in quotidiana praxi, non ob alcalinam intrinsecam qualitatem, sed ob acidum æereum, cuius insignem continent copiam, variis in casibus usurpantur. Quod vero attinet ad uberio rem salis tartari alcalini usum, ab hoc remedio semper abstinendum esse censerem, nam ob præcipuam causticitatem suam, periculosa accidentia, & quæ nullo modo superari possunt, afferre consuevit. Et sane ægotantes qui duas aut tres huiusce salis drachmas ingurgitarunt, gravissimis correpti convulsionibus, brevi obierunt. Alcalina enim caustica tanquam venena sunt a nobis considerata. Sed frequenter a Medicis in morbis diuturnis magnopere commendatur aqua calcis vivæ, quæ ob suam causticitatem œconomix animali infesta esse deberet; videndum ideo cur, quomodo, quando præsidium hoc possit adhiberi.

Calcis vivæ sive causticæ determinata dosis, Aqua calcis. utpote unius vel duarum unciarum, aquæ libris puta tribus immittitur, ibique per 24. horas detinetur. Postea per chartam traiecitur & pro usu servatur, in vase bene clauso. Hæc præparatio exhibet genuinam aquam calcis, amaram, stypticam, nauseolam & certo causticitatis gradu præditam. Sed medici nostrates primæ infusionis activitatem reformidant, hinc priori rejecta novam affundunt aquam, atque post secundam tertiam quoque infusionem componunt. Tertiam infusionem passim interne adhibent in morbis pectoris diuturnis, præsertim ubi febris hæctica

nocturnos affert sudores & maciem extremam gignit. Eodem utuntur remedio in Diabete, gravissimo illo morbo, in quo semper urinæ inconcoctæ profluvium ab hepatis duritie oritur. Tertio loco aqua calcis inter specifica præsidia adversus nephritidem calculosam, & vesicæ ipsius calculum collocatur. In omnibus vero modo adnotatis affectibus fere semper aqua calcis cum lacte copulatur, quia juxta communem sententiam causticitas calcis a dulcibus glutinosisque lactis particulis corrigitur. Fortasse hoc verum est, sed animadvertendum quoque quod si aqua calcis cum lacte miscetur, lac per plures dies a corruptione immunis servabitur. Hæc summa est doctrinæ Neapolitanorum circa administrationem & efficaciam aquæ calcis, si nonnullos excipias qui tonicam quoque, huic præsidio facultatem tribuunt, ac proinde tres vel quatuor uncias aquæ calcis statim ante prandium haustas commendare solent. Nos vero nonnulla primum, quæ ad præparationem hujus remedii pertinent, deinde quæ usum medicum respiciunt, breviter adnotabimus. Et sane si aqua calcis adhibenda, & inter remedia recensenda est, non secunda tertia aut quarta infusio, ex eadem calce elicitæ administranda est, quandoquidem hæc substantia post certum tempus aëri atmospherico exposita omnem amittit causticitatem; nam magna acidi aërei copia saturatur ac proinde in mitissimum alcali transit. Prima igitur infusio reliquis semper anteferenda, atque si debilissima aqua calcis requiritur satis erit par-

vam

vam calcis proportionem, copiosæ aquæ immittere; hac ratione aquæ qualitates immutatae servantur, ac simul nullum a vehementiori actione medicamento damnum oritur. Rursum chirurgi maxime huic regulæ inhærere debent, quia si pro celeriori ulcerum curatione hoc præsidio utuntur, necesse est ut aquam calcis causticam & detergendi ideo qualitate præditam, non vero inertissimum alcali adhibeant. Aquam calcis & nos quoque in praxi sæpissime ægrotantibus commendare assueti, nunquam magni momenti utilitates observavimus. Hinc remedii vires ad examen serio revocare conati sumus. In Phthi- si itaque pulmonali, si copiosus sudor nocturno tempore remittente febre oboritur & insignem virium prostrationem gignit, aqua calcis ad uncias quatuor vel quinque una cum lacte quotidie propinatur. Hac ratione lactis corruptela avertitur, sed magnam irritationem solida experiuntur, lingua ruberrima fit, & pulmones exsiccati in aridam inflammationem incidunt. Urinæ etiam, quæ per se in hoc casu saturæ esse solent, rufæ evadunt. In diabete tanta est partium ariditas, tanta oritur a tenuissimo alcali animali irritatio, ut lingua fere semper inflammatoria siccitate afficiatur. Rursum hepatis in diabete sicca obstructio ut plurimum deprehenditur, hinc exsiccantia omnia huic morbo omnino contraria sunt; nam siccarum partium inflammationem efficiunt, humorumque acrimoniam phlogisticam adaugent. Ab usu aquæ calcis in diabete lingua magnopere exsiccat,

&

& moderata antea fitis intolerabilis redditur. Idem profecto accidit si in morbis vesicæ copiose administratur; continuo enim stimulo excitata vesica urinaria, non lotium modo sed naturales etiam suorum parietum mucositates sedimenti speciem præferentes emittit. Hac ratione falluntur medici, qui mucum vesicæ pro calculi comminutis particulis assumunt, & ita aquæ calcis lithontripticam facultatem se confirmare posse existimant. Sæpe etiam aquæ calcis doses copiosissimæ cum multo lacte, & per longum tempus caculosus propinantur, nullo tamen felici respondente successu; hinc ab hoc præsidio decantatæ illæ utilitates, nunquam sunt expectandæ. Vellem potius ut peculiaria instituerentur experimenta cum aqua calcis in polyfarchia, nempe obesitate, colluvie serosa, omnibusque morbis a fluidiorum præternaturali redundantia ortis. Hisce enim in casibus, stimulans, exsiccans & calefaciens aquæ calcis activitas, posset certe magnum afferre emolumentum. Chirurgi sæpissime aqua calcis, modo simplici, modo aliis remediis copulata utuntur in sordidorum ulcerum curatione sive exsiccatione. Et profecto variis in casibus simplex aqua calcis vivæ aliquam affert utilitatem, dummodo nulla in ulceribus molestæ inflammationis signa appareant. Adhibent rursus aquam phagædenicam, ita dictam quia ulcerum phagædenicorum, curationem procurat, corruptique admodum puris generationem prohibet. Componitur lotio phagædanica ab aqua calcis & mercurio sublimato

cor-

corrosivo . Verum ubi binæ substantiæ miscen-
tur, utriusque decompositio nascitur, ac proinde
nulla ab aqua phægadénica peculiaris utilitas po-
terit expectari, uti abunde aliò in loco dictum
est . Mitto usum frequentissimum aquæ calcis in
gonorrhæa, scabie fluore albo, fluxu ventrali
aliisque morbis, in quibus exsiccantia & adstrin-
gentia utilia sunt . Sæpe in gonorrhæa virulenta,
post certum tempus iniectiones ex aqua calcis
cum lacte usurpantur; atque ita relaxationi par-
tium medetur . Superest ut variæ memoratam
aquam parandi formulæ adnectantur, ut hæc tra-
ctatio absoluta videatur, & primo pro compo-
sitione aquæ calcis vivæ simplicis

℞. Calcis vivæ recentis probe vistæ unc. xij.

Patinæ terrea vitreatæ vel, ligneæ im-
mittatur, affundatur desuper sensim

Aqu. fontanæ puriss. unc. 96. ebullitione, quæ in-
de oritur, peracta, vas agitetur. Misceantur in-
terdum spathula lignea, post 12 fere horas,
vel simulac calx subsederit, aqua decantetur lim-
pida, filtretur, asservetur in vase bene clauso.
Debiliorem magisque proficuam præparationem
proposuerunt Angli nomine aquæ benedictæ com-
positæ Bateanæ.

℞. Cortic. radic Glycyrrhizæ unc. un.

Cortic. sassufas unc. sem.

Aquæ calc. simpl. unc. 72

Macera sine calore per biduum & cola.

Mitissima deinde omnium sequenti ratione
paratur.

℞.

℞. Aqu. calc. e conch. ostreor. rec. paratæ unc. duodecim.

Ceræ flavæ drachmas tres.

Post sufficientem triturationem, digere leni arenæ calore, dein coletur.

Componitur demum aqua ad cariem dicta miscendo aquæ cal. viv. unc. 2. cum aquæ fort. mercurialis drach. 1. . Hec præparatio commendatur in carie ossium & ulceribus phagedænicis.

De reliquis alcalinis causticis pauca ad materiam medicam spectantia dicenda supersunt, quandoquidem tanta penetrandi, irritandique activitate donantur, ut fere semper externis usibus addicta esse solèant. Alkali enim ammoniacale volatile, alcali ammoniacum causticum, sales omnes alcalini volatiles, aqua lûcis, adeo decantatum adversus convulsiones hystericas præsidium, & similia particulas nobis offerunt volatiles, quæ per nares susceptæ proficuam multis in casibus sternutationem movent, adeoque lypothymia affectis, mulieribus hysteria laborantibus, submersis vel fumo carbonum stupefactis temporarium levamen afferunt, languentesque nimium vitæ vires revocare valent. Descriptis usibus aptissima est præparatio illa, quæ appellatur sal ammoniacum siccum, sive anglicanum extemporaneum vel sal volatile ammoniacale. Paratur vero sequenti methodo.

℞. Sal. ammoniac. depurat. drach. 1.

Ciner. clavellat. depurat. vel sal tartar. drach. 2.

Subito invicem misceantur, & in vitris epistomiis probe munitis servantur. Olei cujusdam destil-

destillati ex. gr. Lavendulæ guttæ aliquot com-
mode, pro lubitu quoque addi possunt. Vis
valde penetrabilis, tonica, stimulans, nervina,
excitans, exhilarans, resolvens, antispasmodica,
diaphoretica, *antiseptica*. Reuss. Recentiores
medici in Gallia præsertim magnopere utuntur
spiritu salis ammoniaci lacteo, succinato, cui
aquæ luciæ nomen imposuerunt. Pro compo-
sitione:

℞. Sal. Tartar. ʒiij. Ol. succin. rectific. ʒj.

Terantur in mortario vitreo, guttatim suc-
cive instillando spirit. vin. rectific. unc. 4.

Infundantur in lagenam vitream leviter ob-
turatam. Detineantur per quadrantem horæ super
cineribus calidis. Liquor supernatans, dein pro-
vide decantetur & servetur usui, dein:

℞. Spiritus sal. ammon. cum calce viva pa-
ati unc. un. & sem.

Instillantur liquoris antea parati gutt. 60.

Usurpatur externe in omnibus morbis nervi-
nis, languore, animi deliquio, & visionis im-
becillitate, quo in casu manus aqua luciæ con-
fricata oculis appropinquatur. In hydrophobia
etiam laudatur intus assumpta ad gutt. 15. & ul-
tra. Alkali causticum externe applicatum, & multa
aqua dilutum veneni venerei contagium prohibere
contendunt multi, quia hæc substantia cum cel-
tici veneni particulis commixta novam qualitatem
causæ huic morbificæ conciliat. Adnotanda hoc in
loco; quæ in nuperrimo cl. Hunteri tractatu de Lue
venerea prostant, ubi de remediis præservativis
loquitur: *Omnia quæ cum materia venerea mi-*

sceri

ferri possunt, illamque a partibus quibus inhæret, abradere valent, præservativi remedii vires gerere possunt. Ob hanc rationem alcali causticum reliquis est anteferendum, miscetur enim cum materia morbosa, cum qua saponis speciem constituit; tunc levissima adhibita lotione veneni particulæ dissipantur. Huic indicationi mirifice favet spiritus salis ammoniaci volatilis urinosus, sive alcali fluor volatile causticum. Guttæ aliquot hujusce vehementissimi caustici multa aqua dilutæ, pro lotione & injectione post venereos concubitus utiliter adhibentur. Fortasse huic doctrinæ primario innititur usus internus potentiorum alcalinorum in curatione luis venereæ confirmatæ. Fortasse etiam ob suppositam veneni celtici aciditatem alcali commendatur, quia acidi neutralisationem sive destructionem procurat. Quidquid de memorata praxi sentiendum sit, variæ tamen observationes usum internum alcalinorum causticorum suspectum reddunt. Nam data etiam causæ aciditate, alcalina priusquam lymphaticos canales subire poterunt, gravissima reliquis partibus, præsertim stomacho & intestinis damna afferunt. Melius itaque erit tutiora & longo usu probata remedia, potius quam dubia & incerta administrare.

DE SALIBUS NEUTRIS.

S. Neutri.

DEscripta usque adhuc acida cum diverso alcali conjuncta, sive a variis alcalinis substantiis saturata Neutra gignunt salina corpora, quæ medium quasi locum tenent, & utriusque principii activitatem retinere prima facie videntur. Verum quamvis hoc verum sit, facultates neutrorum salium ab activitate præsertim acidorum omnino differre videntur; & contra virium diversitatem & salium actionem magis ab alcali, vel alio terreo aut metallico elemento, quam ab acido ipso pendere existimaverim. Ex. gr. quoad primam propositæ doctrinæ partem acidum vitriolicum simplex, & omnia alia mixtura liberum, non modo alvum non movet, immo contra adstringendi vim exercet. Alkali fossile quamvis urinam moveat, nunquam vero, nisi ad magnam dosim augeatur, purgat per inferiora. Attamen sale mirabili Glauberiano, nempe substantia acido vitriolico & alcali fossili composita uberrima ipercatharsis obtinetur. Alkali vegetabile non est catharticum nisi addito acido vitriolico, cum quo tartarum vitriolatum constituit. Idem dicendum de sale cathartico amaro, sive sale epsomienſi, aliisque salibus neutris vitriolicis. Qualitatem tamen solutivam potius ab alcali, quam ab acido esse repetendam probat primo debilis quamvis, sed tamen certa & essentialis vis cathartica alcalino.

linorum simplicium, five omni vehementiorum acidorum consortio carentium. Et sane alcali fossile, & reliqua alcalina aërata, non autem simpliciter calcarea, cremor tartari, & alia hujusmodi, alvum mediocriter movent. Sed in ipsis alcalinis aëratīs vis cathartica pendere potest ab acido aëreo cujus opera alcalina aërata in certo neutralisationis statu reperiuntur, atque in cremore tartari vehementior solutiva facultas ab acido tartari, cum alcali vegetabili combinato procul dubio oritur. Rursum a diversitate elementorum cum quibus acida copulantur, quæ inde nascuntur substantiæ minime cathartica, sed diversæ prorsus naturæ activitatem adipiscuntur. Et sane vitriolum ab acido vitriolico & ferro compositum, valde irritantem, emeticam, adstringentem, vel potius corrosivam, non vero cathartica facultatem assumit. Ab acidi muriatici combinatione cum mercurio oritur mercurius sublimatus corrosivus venenata non solutiva qualitate præditus; contra ab eodem acido cum alcali fossili copulato nascitur sal marinus vehementer catharticus. Peculiarem igitur indolem acida alcalicis, cum quibus intime conjunguntur ope neutralisationis communicant, vel potius, mea quidem sententia, cathartica alcalinorum fundamentalem proprietatem adaugent, ob manifestam quam in alcalicis mutationem inducunt.

Quomodo vero hæc mutatio eveniat, & unde qualitatis catharticæ in alcalinis incrementum oriatur, breviter explicare conabimur. Moderatæ omnes, leves, minimeque molestæ irritatio-

nes, intestinorum evacuationes gignunt, quidquid contra insigni vehementia alvum sollicitat, vel tenesmum, dysenteriam, vel absolutam stypticitatem affert, acida enim concentrata, & alcalina volatilia insuperabilem alvi silentium generant. Et contra alcali volatile, quamvis cum acido fortiori jungatur, nunquam tamen vim catharticam acquirit, uri manifeste deprehenditur in sale ammoniaco communi. Stimulum quotidianum, pro excrementorum evacuatione naturæ suppeditat principium alcalinum, cui inopportunam volatilitatem, quæ a circulationis viribus mutuatur, in intestinis aufert bilis mixtio. Alimenta quæ ob propriam indolem, aut ob nimiam quantitatem corrumpuntur, evacuationes alcalinum fæditissimum odorem emittentes gignunt. Hinc si artis opera naturam imitari contendunt medici, ad substantias alcalinas confugere debent. Sed alcalina primigenia vel aërata sunt, & ideo vel debilissimi stimuli vices gerunt & parce admodum alvum movent, vel deaërata sunt, & causticorum activitatem possident. Adhibenda igitur sunt alcalina acidis saturata, & quæ hac in forma neutrorum salium nomine distinguuntur. Alcalina hæc tempore neutralisationis debilissimum acidum aëreum amittunt, atque eodem momento acidum majori activitate præditum assumunt. Hac ratione acidi vires stimulantæ alcalinorum vires catharticas adaugent, & tamen moderate operantur; nam si acidi integra potentia intestina sollicitantur effectus erit prorsus contrarius & loco evacuationis stypticitas obtinebitur. Ex dictis
mani-

manifesto sequitur qualitates salium neutrorum magna ex parte inter se similes esse, quia alcalina eandem fere similemque inter se naturam habent. Numerosis tamen experimentis evincitur alcali minerale majorem quam reliqua alcalica, neutris activitatem communicare. Vehementius enim purgatur alvus sale glauberiano, & marino, quam sale digestivo simplici, aut tartaro vitriolato. His positis satis erit salium neutrorum enumerationem & usum generalem afferre; reliqua enim e formulis medicamentorum facile depromuntur. Ab acido itaque vitriolico cum diverso alcali, quæ obriuntur neutra sunt I. Tartarum vitriolatum ab acido vitriolico & alcali vegetabili compositum. Hujus synonymia sunt *sal enixum paracelsi*, *sal de duobus*, *arcanum duplicatum sal polychrestum*, *nitrum stibiatum*, *panacea Ducis Holsatie*, *nitrum vitriolatum*. Crystalla hexagona pyramidalia ut plurimum exhibet. Siccitatem servat in aere etiam humido. Magnam aquæ portionem requirit, ut dissolvatur. In spiritibus vinosis solubile non est. Modus præparationis ex pharmacía eruendus. Secundo locò ab acido vitriolico, & alcali fossili oritur sal Glauberi. Ejus synonymon est *sal fellie* in Calabria nativus. A D. Bergman appellatur alcali minerale vitriolatum; in aquis (scribit) interdum adest. In Siberia & Regno Astracano nonnulli lacus illud vehunt, pluresque alibi fontes. Crystalla hexagona exhibet. In aëre siccus evadit, pelluciditatem amittit. Solvitur in aquæ calidæ pondere æquali. Fusilis temperato calore;

re ; unde a sale epsomienſi discrepat , quod nullo caloris gradu fundi poteſt . Tertium occupat locum alcali volatile vitriolatum , ſive ſal ammoniacus vitriolicus , ab acido vitriolico & alcali volatili compoſitus . Salibus vitriolicis perfecte neutris ; ab acido nempe & alcali compoſitis , uſque adhuc deſcriptis adungi debet ſal catharticus amarus , ſive anglicus , vel epsomienſis , qui quamvis ad ſales medios terreſtres pertineat , nam magnesiā acido vitrioli copulatam pro baſi habet , tamen quia a vitrioli acido gignitur , & vulgatiffimum catharticum in praxi præbet , ideo hoc in loco adnotari debebat . Appellatur aptiſſima definitione a D. Bergman *Magneſia vitriolata* . In aquis Angliæ , Bohemiæ , aliarumque regionum non raro hoſpitatur . Hic ſal aquæ calciſ immerſus mox deſcomponitur ; quo ab alcali minerali vitriolato facillime diſtinguitur .

S. neutrorum me in praxi medici utuntur ob ſolutivam , in-
usus . ciſivam & reſolventem qualitatem , ab omni irritatione ſejunctam . Tartari vero vitriolati ſive ſalis polychreſti vires inciſivæ , deobſtruentes & antifebriles ; catharticæ quali-
 tati anteferuntur , quia tartarum vitriolatum ob debiliſſimum vegetabile alcali , etiam ad magnam doſim exhibitum , vix tamen alvum purgat . Doſis ideo eſt a granis viginti ; uſque ad drachmas duas ; quia hac ratione humorum ſpiſſitudinem imminuit , primarum viarum debilitatem roborat , vitioſam bilis phlogiſticationem emendat , & ſimul criticos naturæ conatus in primo & ſecundo morbo-
 rum

rum febrilium stadio, salutareſque cauſarum mor-
 bificarum coctiones minime perturbat. Moderatæ
 etiam tartari vitriolati doſes poſſunt puerperis
 & mulieribus menſtruorum defectu laborantibus,
 utiliter propinari. Juvat demum eodem neutro
 uti in puerorum cruditatibus, & præſertim in
 depravata lactis digeſtione; & tunc doſis erit a
 grans decem, uſque ad viginti. Cæterum nun-
 quam aut pro valde efficaci, aut pro eradicatione
 remedio haberi debet. Inter cathartica ſalina,
 primarium certe meretur locum ſal mirabilis
 Glauberi, quia dum mitiſſimas minimeque ſti-
 mulantes poſſidet qualitates, majori activitate
 alvum ducit, nam componitur ſubſtantia alcali-
 na magis per ſe laxativa, & quæ ideo majorem
 ab acido incidendi proprietatem mutuatur. Hoc
 neutro paſſim utimur loco ſalis eſſomienſis na-
 tivi, quamvis non ſemper ſal Glauberianus quoque
 purus obtinetur; ſed ſpecies illa, quæ poſt ſalis ma-
 rini compositionem obtinetur venalis proſtat, ne-
 que quoad effectum tutiſſima eſt. In noſtris regioni-
 bus ob abundantiam ſalis ſellix, nempe ſalis Glaube-
 riani nativi, hujus neutri uſus minime ſemper ſuſpe-
 ctus eſt. Doſis huiusce ſalis eſt a ſemuncia, uſque
 ad unciam unam & ſemis, atque reiterari poſeſt
 per intervalla, pro re nata. Non raro uncia una
 ſalis Glauberiani, copioſiſſima aqua diluta, di-
 verſis horis propinatur, ut actio medicamenti mi-
 tiſſima evadat. In acutorum principiis, poſt
 emetici adminiſtrationem ſolet adhiberi. Verum
 in primo ſeptenario ab primarum viarum reple-
 tionem, ob generalem ſolidorum corrugationem,

atque ob vehementissimam ventriculi constrictionem, etiam a salibus neutris omnibus abstinendum. Contra post absolutam coctionem, si purgare per inferiora oportebit, optimum certe consilium erit uti sale Glauberiano. Magnopere ab exteris medicis laudatur laxativa hujus neutri facultas, adversus colicam, & iliacam passionem. Sed in memoratis affectibus, qui specifica fere actiuitate olei seminum Ricini curantur, inutile profecto erit ad cathartica salina confugere. Qui aperientem & diureticam efficaciam salis Glauberiani summis extollunt laudibus, parvas doses trium vel quatuor drachmarum exhibent nephriticis, calculosis & mulieribus difficili menstruatione vexatis: neutra reliqua ab acido vitriolico parata libenter prætermittimus, quia nullum præcipuum in medicina usum habent.

Nitri usus.

Ab acido nitroso, & alcali vegetabili oritur nitrum commune, sive alcali vegetabile nitratum, de cujus origine nonnulla dicta sunt ubi de acido nitroso sermonem instituimus. Cæterum nitrum commune, uti loquitur Cl. Bergman, in superficie telluris oritur, ubi vegetabilia, præsertim partibus animalibus mixta, putrescendo destruuntur. Nitrum crystallæ prismatica hexagona assumit. Non facile deliquescit. Per phlogiston expeditissime decomponitur, atque operatio hæc appellatur proprie nitri detonatio. Est fusile modico in calore. Cum aqua maximum frigoris gradum excitat. Ab acido rursum nitroso, & alcali fossili oritur nitrum cubicum, quoad vires a nitro communi parum diversum.

Cry.

Crystallis potius rhomboideis constat. Vires nitri, juxta communem sententiam sunt primo refrigerantes dein diureticæ, ap'ientes, uterinæ; ideoque multorum medicamentorum antifebrilium basim constituit nitrum depuratum. In febribus ideo inflammatoriis passim propinantur moderatæ nitri doses cum copiosa aqua: Ad duas ex. gr. drachmas quotidie usurpatur & per intervalla. Nonnulli in mere inflammatoriis nitrum purificatum potionibus acidis, gelidæque aquæ adiiciunt, cum magno equidem ægrotantium emolumento. Facultas antiphlogistica neutri hujus in morbis mere inflammatoriis pendet ab acido nitroso, cujus particulæ propriam cum phlogisto morbooso actionem exercent, simulque præternaturalem calorem summopere imminuunt. Inflammationes ideo adhibito nitro comuni, vel acido nitroso simplici, uti supra dictum est, mitescunt quia incipienti fluidorum phlogificationi acidum nitrosus opponitur, unde phlogisti quantitatem, quam ad se attrahit, ab humoribus separat, & propositam indicationem absolvit. Caloris simul latentis evolutio, quæ phlogisti ope eveniebat, & ejusdem principii periculosa exhalatio, hoc remedio prohibetur, & ita primarium vitæ fundamentum minime a corpore secedit. Magna vero prudentia, diligentiaque opus est, ut nitri operatio in morbis inflammatoriis, intra certos limites coercetur; nam si per longum tempus, abundanterque admodum substantia phlogisti avidissima corpori committitur in quo causa ejusdem naturæ, nempe causa phlogistica, primum activitatis suæ

gra.

gradum ostendit & per stadium inflammatorium excurrit, a phlogisti incremento novaque substantiæ phlogisticantis, accessione morbus inflammatoria demissa indole, in affectum mere phlogisticum mutatur. Hinc in erysipellate & anthrace maligno nitrum potius noxium quam bonum effectum gignit; atque deleteriam prorsus activitatem ostendit in morbis omnino phlogisticis; uti sunt acutissimi malignique affectus a paludum exhalationibus activo tempore pendentes. Ubi- cumque nitrum gelidæ aquæ immixtum admini- stratur, urinas vehementer movet, & calculosis ac nephriticis efficaciter opitulatur. Hisce in casibus ad drachmam unam aut alteram quoti- die exhiberi potest cum decocto foliorum *solani*, cum sero lactis, aliisque aptioribus vehiculis. Hydropici sæpenumero sublevantur exhibito ni- tro, aut simpliciter, aut cum cremore tartari, vel sale polychresto. Sæpe *nitri drachmas duas* cum æquali salis polychresti quantitate in tres doses divisas propinare singulis diebus consuevi- mus leucophlegmaticis & asciticis. Doses ube- riores semper vitandæ, quia periculosum frigus inducunt, ob rationes superius allatas. Frigore lethali corripiebatur mulier, quæ integram nitri depurati unciam loco salis Glauberiani assumpse- rat; testante in suis doctissimis observationibus Cl. Edinburgensi medico Alexandro. Nitro pas- sim utuntur in gonorrhæa virulenta medici illi, qui fluxum morbosum in principiis semper au- gendum esse contendunt. Revera tamen nitrum in hoc casu non solum diureticam, verum- etiam

etiam antiphlogisticam facultatem exercet, nam in hac ægritudine canalis urinarii præcipua inflammatio adest. Medicamenta quæ in Ictericuratione usurpantur; sæpenumero nitrum pro basi habent; quia per urinæ vias non raro morbus judicatur; atque urinæ admodum rufæ refrigeratorium remedium postulare videntur. Pilulæ ideo saponaceæ, cum terrâ foliatâ tartari; & nitro parantur; atque potiones refrigerantes Ictericorum nitro constant, uti ex. gr. est aqua ex albo albi dicta; quæ componitur sequenti ratione:

℞. Aqu. Gramin. offic. unci quinque;
 Sapon. hispan. granâ quinque;
 Nitr. depurat. scrupulum unum,
 Sacchar. alb. drachm. duas. M.

Hæc potio refrigerans & diuretica, per plures dies Ictericis propinatur, cum aliqua certè utilitate. Remedia emmenagoga, quæ scilicet in defectu sanguinis menstrui commendantur; aperientibus vegetabilibus; simulque nitratis parantur. Nitri enim parciore doses, iterato exhibitæ sanguinem uterinum cum aliqua efficacia evocare valent. Atque hæc de nitri communis usu dicta sint satis; superest ut nonnulla adiiciamus de nitro stibiato, in recenti Neapolitanorum praxi usitatissimo certe præsidio. Aqua quæ pro repetitis antimonii diaphoretici nitrati lotionibus adhibetur, per filtrum traducta & lento igne evaporata, usque ad cuticulæ in superficie generationem, si in loco frigido detinetur crystallæ exhibet, quæ nitri stibiati nomine donantur. Nitrum stibiatum generatur a deflagratione sul-

Nitri stibiati
 ti usus.

phu-

phuris antimonii cum nitro, uti accidit in generatione salis polychresti, a quo differt tantummodo, quia aliquam calcis antimonialis proportionem continet. Passim in febribus inflammatoriis, biliosis, erysipelate, uteri valida post partum irritatione & similibus omni bihorio, aut omni quadrihorio propinantur grana decem vel quindecim nitri sibiati. Effectus admodum ambiguus videtur, quandoquidem neque urinæ multum augentur, neque sudor copiosus excitatur; nam in hac compositione basim constituit sal polychrestum: quod si calx antimonii cum nitro copulatur, a tenui admodum hujus substantiæ quantitate, nulla profecto utilitas expectari debet. Antimonium contra diaphoreticum, ab omni etiam nitro sejunctum magni certe momenti vires possidet, uti suo loco ostendimus. De nitro cubico ab acido nitroso & alcali fossili composito, de sale ammoniaco nitroso ab acido nitroso & alcali volatili facto, atque de sale digestivo sylvi, qui oritur ab acido muriatico & alcali vegetabili, nihil adjiciam, sunt enim composita salina, quæ nunquam a practicis usurpantur.

Sal communis, sive sal gemmæ, sal marinus vel muria constat acido muriatico & alcali fossili. In cubos concrescit, qui si purus sit, in nulla aëris constitutione figuram mutant. Est antisepticus; experimenta enim Pringliana cum sale culinario, multa terra referto instituta fuerunt. Sal communis a Cl. Bergman appellatur *alcali minerale salinum*, in Schiagraphia, ubi

ubi aī; uberrimum reperitur tam in terra efficiens strata, plus minus crassa (sal gemmæ) quam in Fontibus (sal fontanus) & lacubus, nec non in magno Oceano (sal marinus) solutus. Majori efficacia quam reliqua neutra alvum purgat sal marinus, ob copiosum alcali minerale. Hinc uncia decem aut duodecim aquæ marinæ copiosas evacuationes afferunt, & peculiarem etiam resolvendi qualitatem possident. Uncia una aut altera salis communis in aqua soluta feliciter purgantur rustici in morbis biliosis, & ubicumque alvum movere oportet. In alvi fluxu immodico a ciborum corruptela pendente, alvus sale præsertim marino compescitur, quia lucci gastrici vices gerit. Immo in languida admodum digestionem, vites ventriculi augentur & stomachus firmatur sale marino, cum alimentis, condimenti loco, copiosius ingurgitato. Recentiores enim observationes declararunt lucci gastrici basim sale marino constare. Ab eadem substantia in multis mineralibus aquis existente multarum thermalium fontium tonica, roborans & præsertim stomachica activitas pendet. Natura vero huic neutro resolutoriam & simul tonicam facultatem largita est; nam alimenta in ventriculo a sale marino emollita tanquam a peculiari menstruo, cujus vices gerunt particulæ alcalinæ, acidi dein activitate a vitiosa corruptione servantur. Fortasse acidi etiam marini in corpore humano existentia periculosam & sæpius lethalem phlogisti multiplicationem prohibet? Fortasse mercurii sublimati corrosivi efficacia in curatione morbi

Salis marini
usus.

venerei ab eodem principio pendet ; acidum namque marinum phlogisti avidissimum tenacem viscidam & ideo phlogisticam luis venereæ causam ad se attrahit & per urinæ vias emittit . Mercurius tunc phlogisto etiam saturatus certam revivificationem subire debet , uti nonnulli scriptores suspicari sunt . Sed de hoc argumento suo loco differendum . Insignis rursus facultas resolvens salis marini , & peculiaris efficacia , quam hoc præsidium ostendit in præternaturali humorum densitate evidenter probatur admodum proficuo aquæ marinæ usu adversus obstructions viscerum naturalium & præsertim adversus tumores scrophulosos , qui a morbosa lymphæ cohærentia oriuntur . Scrophulæ enim balneo marino , aqua marina intus assumpta & frictionibus mercurialibus feliciter curantur . Qui ob hepatis aut lienis obstructionem leucophlegmatici vel ascitici fiunt , usu interno aquæ marinæ perfecte aliquando sanantur . Mulieres , quæ ob sanguinis menstrui defectum , nempe ob adauctam particularum rubrarum spissitudinem chloroticæ fiunt epota ad uncias quotidie decem & ultra aqua marina pristinam sanitatem acquirunt . Mitto salis marini usum chirurgicum .

De sale ammoniaco .

Sal ammoniacus communis , constat acido muriatico & alcali volatili . Obtinetur ex omnibus fuliginis speciebus per sublimationem vel solutionem . Sequentes possidet proprietates . In aqua solubilis . Aeri expositus deliquescit . In aqua solutus , menstruum ita disponit , ut majorem sublimati corrosivi proportionem dissolvere valeat . Cum sale communi in aqua solutus , infi-

gne

gne generat frigus. In spiritibus vinosis est solubilis. In modico calore fusilis. Neutro hoc sale frequenter medici utuntur ob summam volatilitatem particularum alcalinarum, unde sal ammoniacus totum pervadit corpus, fluidorum nimiam cohesionem imminuit, circulationem adauget, ac proinde vel sudorem copiosum vel uberiore urinas affert. In lentis ideo febribus, intermittentibus præsertim, utiliter adhibetur a scrupulo ad drachmas duas quotidie; sæpe etiam in febribus cum cortice peruviano utiliter copulatur, & fortasse febrifugi activitatem adauget. Doses largiores alvum vehementer subducunt. Nostrates Medici sale ammoniaco communi utuntur in omnibus febribus indiscriminatim, & pauca tantum grana adhibere solent. Flores dicti salis ammoniaci, qui celeri vehementique sublimatione obtinentur, a sale ammoniaco puro nullo modo differunt. Ubi sudoris evacuatio desideratur sal ammoniacus una cum infuso calido florum Sambuci, radicis Bardanæ & similibus exhibetur. Cum potionibus contra frigidis diureticam facultatem assumit. In faucium lymphatica præsertim congestione gargarismate utimur ex eodem sale. Tumores durissimi broncocele dicti, si solutione salis ammoniaci frequenter foveantur, sæpe integre dissipantur. Qui sublimatum corrosivum interne adhibent mercurium cum sale ammoniaco conjungunt, ut medicamenti actio facilius reddatur. De ente veneris, panacea cinnabarina, floribusque salis ammoniaci martialibus alio in loco disputabimus. Ammoniaci effectus, qui in
pra-

praxi observantur nunquam aut valde sensibiles aut certi sunt; ob particulas tamen insigniter volatiles ac penetrantes, inter prælia resolventia & discutientia, non infimum meretur locum.

Tartarum regeneratum, tartarum solubile, & sal diureticus sunt synonyma ejusdem neutri ab acido vegetabili & alcali vegetabili compositi. Cum reliquis neutris omnino convenit & mirissime operatur alvum solvendo. Solubilis est in spiritibus vinosis; cum oleis gummi & resinis conjungitur; ac metalla in spiritibus vinosis solubilia reddit. Magnopere laudatur tanquam catharticum mite & validum diureticum a scrupulo uno usque ad duas drachmas exhibitum. Lenior certe actio pendere debet a minori acidi & alcali vegetabilis proportionem, unde non adeo valida oritur in corpore irritatio.

Sal Rupellensis ab acido vegetabili & alcali fossili factus idem est cum sale polychresto *de la Rochelle*, vel sale *de Seignette*. Non tam facile deliquescit ac tartarum regeneratum; atque inter mitissima cathartica collocatur. Hujusmodi tamen sales, uti tartarum regeneratum, & sal Rupellensis nunquam cum acidis aut fortioribus aut magis concentratis copulandi; in hoc enim casu integre decomponuntur.

Spiritus Min-
dereri.

Postremum inter neutra salina locum occupat sal ammoniacus vegetabilis, vulgo spiritus Mindereri dictus, atque ab acido vegetabili & alcali volatili compositus. Appellatur quoque salisago ammoniacalis acetosa. Componitur vero sequenti ratione:

R.

℞. Aceti vini distillati acerrimi unc. 2. Instilla paulatim sal. ammoniac. cum sale tartari, vel spiritus cornu cervi qu. suffic. ad satur. plenar. asserva in vitro probe clauso. Simplicior formula est:

℞. Aceti distillati quant. plac. Instilla paulatim, subinde agitando spirit. sal. ammon. cum calce viva parati quantum sufficit ad justam & perfectam saturationem. Dosis est a drachma dimidia usque ad duas, cum syrupo quodam, vel cum aliis remediis. Cl. Pingle plurimum mixtura hac salina utebatur in febribus acutis, ad resolvendam humorum tenacitatem, atque ad procurandam diaphoresim. Decantatæ adeo vires non integre observationibus confirmantur. Sæpe tamen vidi summam utilitatem spiritus Mindereri externe confricati in vehementioribus rheumaticis doloribus. Quæ nuperrime a scriptoribus memorantur circa usum hujus præsidii, breviter hoc in loco adnotari merentur. Spiritus itaque Mindereri *Asæ foetidæ vires præcipuas antispasmodicas, resolventes insigniter auget & secundat, in obstructionibus viscerum, in mensium suppressione & aliis sanguinis fluxibus: in asthmate, tussi suffocativa; morbis hystericis. Hinc consulto Millar Asæ foetidæ uncias duas in hujus spiritus uncia una solvendas suadet, & cum aliquot unciiis cujusdam aquæ distillatæ miscendas, ut infantes omni bitritorio aliquot cochlearia parva sumant, & adulti majora. Multa non adeo necessaria libenter præmittimus.*

SALES METALLICI.

S. metallici. **M**etallorum particulæ ab acidis solutæ, vel a peculiari erosione decompositæ salinas generant substantias, quæ phlogiston metallicum cum acido copulatum pro basi habent. Et quemadmodum neutri sales acutissimam & corrosivam acidorum qualitatem imminuunt, quia alcali relicto acido aëreo quo saturabatur, intime cum acido combinatur; sic contra ubi acidum, metallum phlogisto copiosissimo semper refertum offendit, phlogisticatur insigniter & corrosivam vim nanciscitur. Substantiæ illæ, quæ cum phlogisto affinitatem habent, si acido saturantur, sallem acerrimum & corrosivum constituunt, uti accidit in argilla, quæ ob affinitatem quam cum phlogisto gerit, si cum acido vitriolico combinatur, alumen acerrimum componit. Hac itaque ratione non adeo difficile erit intelligere cur ab iisdem acidis, a quibus mitissimi neutri sales exurgunt, combinatione cum alcalinis instituta, dum eadem acida metallicis corporibus adhærent, salibus corrosivis originem præbent. Hoc etiam ulterius probatur exemplo salium neutrorum, qui ab alcali volatili & acido componuntur. Hujusmodi enim sales acutissimi & pungentissimi sunt, quia alcali volatile procul dubio constat simplici sale alcalino, omni acido spoliato; componitur nempe substantia mere phlogistica, salina.

Dum

Dum opera calcis vivæ e sale ammoniaco educitur alcali volatile, particulæ alcalinæ phlogisto calcis vivæ saturatæ vehementer corrosivæ redduntur. Hæc necessaria prorsus videbantur ut differentia inter salina neutra & salina metallica quodammodo innotesceret; progrediamur modo ad historiam vitriolorum. Et primo vitriolum cæruleum, quod idem est ac vitriolum Romanum, vitriolum veneris, vitriolum cyprium, est artis ut plurimum productio, quæ constat acido vitriolico & cupro. A Cl. Bergman appellatur *cuprum vitriolatum*; reperitur omnibus in locis, in quibus pyrites cupri adest. Crystalla depressa, rhomboidea habet. Saporis est adstringentis, acris, ingratiissimi. Est fusile, & in magno caloris gradu calcinatur. Cæterum nomen genericum est cuprum vitriolatum, quia cuprum basim salinam constituit. Vitriolum viride est salinum metallicum ab acido vitriolico & ferro compositum; dici itaque debet *ferrum vitriolatum*. Synonyma ejus sunt vitriolum martis, vitriolum anglicum, & sal martis, Est nativum, sed plerumque per artem paratur. Crystalla pellucida rhomboidea exhibet. Saporis est adstringentis, subdulcis. Calcinari potest. In aqua facile solvitur, sedimentum deponens. Denique vitriolum album constat acido vitriolico & zinco; est ideo *zincum vitriolatum*. In fodinis reperitur atque saporis est subdulcis & adstringentis. Ad usum medicum vitriolorum externum aut internum quod attinet, caute omnino incedendum, omnes enim sales metallici causticam, inflammatoriam,

Vitriolum
cæruleum.

Vitriolum
album.

Usus vitrio-
lorum.

ideoque semper irritantem vim possident. Phlogisticatur enim acidum a phlogisto metallico, cum quo perfecte combinatur. Hinc essentialiter salibus metallicis stomachus perturbatur. Vitriolis vomitus excitatur; ventriculum erodit mercurius sublimatus corrosivus. Cur itaque vitriolum cupri aut ferri commendetur a recentissimis medicis, ad vomitum procurandum in Phthisi pulmonali, prorsus ignoro? A multis etiam laudatur vitriolum martis ad drachmas duas cum terebinthinæ sufficienti quantitate trituratam, ac deinde quatuor aquæ libris solutum, & quotidie copiose exhibitum in memorato pulmonis morbo. Verum loco vitrioli, tutius semper erit acidum vitriolicum subministrare. Decantatam adeo vitrioli martis ætivitatem adversus hæmorrhagias omnes, & præsertim adversus fluxum hæmorrhoidalem, diarrhæam ac dysenteriam raro iam auxilium advocari debere existimarem; nam primo sanguinis fluxus accidentaliter evenientes nullo adhibito remedio, ipsa virium debilitate compescuntur; fluxus illi, qui criticam evacuationem constituunt, nunquam fere compescendi sunt; multi denique, qui ab acri, scorbutica, vel corruptoria causa oriuntur, aliis prorsus præsidii curantur. Fluxus dysenterici, diarrhææ & similia salibus vitriolicis tractari non debent, quia irritationem, sive spasmus pro causa agnoscunt. Hujus naturæ perturbationes dulcibus, anodynis, & præsertim balneo ac lacte curantur. De stomachi debilitate, & obstructionibus viscerum naturalium nihil profecto adiciam; hisce enim in ca-

fi.

sibus semper a salibus metallicis abstinendum. In externa vero vitriolorum administratione passim chirurgi versantur; injectiones enim, collyria ophthalmica, lotiones & unguenta ex vitriolis parata usurpantur in gonorrhæa virulenta, oculorum inflammatione & ulceribus fordidis. Injectiones in urethram factæ cum vitriolo albo, aut viridi & aqua rosarum in recenti gonorrhæa plerumque noxiæ, versus finem morbi salutares redduntur, quia in vigore morbi magnum inflammationi momentum adiiciunt vitriolica, & omnia adstringentia. Subsidente inflammatione stimuloque sublato, quæ superest partium debilitas vitriolo tollitur. Neque simpliciter gonorrhæa inopportune sistitur injectionibus adstringentibus, verum frequenter in molestissimum spermatocele ægri incidunt. Hoc vero in casu videndum num simplici inflammatione testes, & potius membranæ testium afficiantur, vel hic morbus a venereo veneno ad testes delapso ortum ducat. Ut plurimum vero spermatocele, mea quidem sententia, mere inflammatorius a stimulo & per consensum ortus morbus est; neque a veneno venereo immediate excitatur. Aquarum ophthalmicarum plures extant formulæ, quæ collyria exsiccantia, detergentia, & uti vulgo dicitur, refrigerantia componunt. Celeberrima aqua ophthalmica cærulea, sive saphirina, vel famosa Taylora sequenti ratione componitur. ℞. sal. ammon. depur. drachmas duas. aqu. calc. viv. rec. unc. 12. stent ad solutionem usque in vase cupreo, vel cum bracteis aliquot cupri, donec aqua colorem saphi-

phirinum acquisiverit per 24. horas; a quo aqua colorem saphirinum nacta filtretur & servetur usui. Usus externus aquarum vitriolo saturatarum ad sistendas hæmorrhagias, & præsertim in artuum amputationibus, jam exolevit; etenim vitriolo magnis canalibus insperso sæpe periculosæ inflammationes, & magis etiam periculosæ suppurationes supervenire solebant.

Lapis infer-
nalis.

Acido nitroso & argento componitur substantia salina metallica, quæ *crystallorum lunæ*, *lapidis infernalis*, vel *caustici lunaris* nomine dignoscitur. Vim possident insigniter causticam crystallæ lunæ, & tantum externe adhibentur in curatione ulcerum sordidorum, & pro destructione carniū fungosarum, quibus ulcerum sanatio retardatur. Superficies itaque carniū flaccidarum & informium a chirurgis lapide infernali aduritur, & prima secedente lamina, renovatur operatio, usque ad integram cicatrificationem, quæ ideo acceleratur, quia non solum debilissimæ destruuntur fibræ, verum etiam quia caustici actione carnes irritatæ solidiores firmioresque redduntur. In venereis vero ulceribus, si lapide infernali utimur, ob irritationem ulceris veneni absorptio citissime accidit, & statim glandulæ inguinales in bubones intumescunt. Hoc vero non cum caustico tantum lunari, sed & cum reliquis etiam escharoticis evenire consuevit. Verrucæ demum lapide infernali tractatæ vel extirpantur, vel suppuratæ decidunt.

Mercurius
sublimatus
corrosivus.

Principem inter salina metallica locum tenet mercurius sublimatus corrosivus, ab acido muria-
ti-

tico & mercurio compositus, & insigni corrosiva & admodum venenata qualitate præditus. Colorem habet album; in spiritibus vinosis facile solvitur, parcius in aqua. Quamvis ad præparata mercurialia pertineat, qualitates tamen ejus hoc in loco recenseri debent, quia nunc proprie de salibus metallicis sermo est. Vetustiores medici mercurium sublimatum corrosivum merito venenis adnumerarunt, atque ab ejus usu interno penitus abstinerunt. Causticitate etenim suæ ventriculum primario inflammat, dein corrodit, ejusdemque naturæ damna intestinis affert. A vehementiori actione vomitus excitatur, os intumescit, fauces inflammantur, convulsiones superveniunt. Primus omnium Boerhaavius facultatem antiveneream essentialem salis huic metallo inesse suspicatus est, & pro usu interno, reliquis mercurialibus anteferendum remedium obtineri posse dubitavit. Tanti viri auctoritate permotus Swietenius specificum antivenereum suo nomine insignitum, nempe solutionem sublimati corrosivi in spiritu frumenti proposuit. Juxta Cl. viri formulam mercurii sublimati corrosivi grana 12 solvuntur in spiritus frumenti uncis 24; de qua mixtura dantur mane & vespere cochleare 1. 2. 3. superbibendo unc. 6. ad 12. decocti cujusdam demulcentis ex. gr. Hordei, Bardanæ &c. magnam copiam. Alii mercurium sublimatum non in spiritu frumenti, sed in spiritu vini, alii denique in aqua simplici solvunt. Specificum Swietenii omnes indicantur sequuti sunt medici, neque propriis ob-

servationibus aliquid novi huic praxi adicie-
 runt. Eodem specifico & ipse multis abhinc annis
 luem veneream confirmatam debellare conatus
 sum. Mercurium sublimatum spiritu vini solu-
 tum sæpe magno cum emolumento exhibui;
 criticos sudores & judicatorias urinas obtinui.
 Pilulas eodem remedio, additis simul opiatís,
 non sine optimo successu adhibui. Verum pro-
 gressu temporis non pauci se se obtulerunt ca-
 sus, in quibus post perfectam morbi venerei cu-
 rationem periculosissimi sanguinis sputus superve-
 nerunt in nonnullis; alii rursus macie confecti,
 perfectam ventriculi erosionem, & absolutam
 perforationem post mortem ostenderunt. Cum
 igitur de gravissimis a corrosiva substantia pro-
 venientibus damnis, & simul de insigni ejus an-
 tivenerea activitate serio cogitarem, usum exter-
 num ad examen revocare constitui; etenim ab
 inversa actione non modo innocuum verum
 etiam utillimum effectum expectari posse existi-
 mavi. Magni sane momenti argumentis mea
 innitebatur sententia. Mercurialia externe appli-
 cata & per cutim suscepta, quibuscumque præ-
 parationibus intus assumptis anteferenda sunt;
 juvant enim semper nec unquam nocent; quia
 per vasa lymphatica in totam cutis superficiem
 hiantia recta feruntur ad glandulas conglobatas,
 nempe lymphaticas, quæ a causa venerea prima-
 rio afficiuntur, & pro morbi sede haberi de-
 bent. Mercurialia lympham veneno venereo in-
 spissatam attenuant, & in hac actione decompo-
 nuntur propriamque naturam, magna ex parte
 amit-

emittunt. Tunc dum ad interna organa perveniunt, & sanguinem intrant, nempe ubi ad loca pertingunt omni venerea labe carentia, nullam exercere activitatem poterunt. Si enim mercurialium viam integram persentiunt partes veneno venereo destitutæ, statim essentialia exurgunt & valde periculosa incommoda; uti certe accidit ubi mercurialia per os assumuntur. Horum namque remediorum noxia efficacia internæ partes & sana organa vexantur, & quod etiam magis interest, mercurius post labefactatam perturbatamque recte valentium organorum œconomiam, majori efficacia sua, ac propria antivenerea actione spoliatus, humoribus lue venerea depravatis miscetur, sine ullo ægrotantium aut saltem parvo levamine. His ita se habentibus, ut certa vitarentur incommoda, certa que utilitas exurgeret, externum sublimati corrosivi usum instituendum curavi; aliaque aptiori excogitata methodo experimenta felicissimo cum successu institui, & post certum tempus numerosissimas observationes curationumque eventus cum publico communicavi. Simplicissima admodum ratione mercurius sublimatus corrosivus externe administratur. Unguenti primo sive linimenti formula, ita profecto se habet:

℞. Mercur. sublimat. corrosiv. drachmam unam, axung. porcinæ n. r. unciam unam m. triturentur simul in mortario vitreo vel marmoreo per hor. vi. ut f. l. a. linimentum.

Semidrachma, aut drachma una descripti modo linimenti plantis pedum tantummodo, vesp.

Ispertinis horis confricantur & per plures dies
 administratur remedium, augendo dosim usque ad
 drachmas duas pro singulis frictionibus . Balnea
 tepidiuscula tempore curationis vel quotidie, vel
 frequenter sane adhibita utillima sunt ; uti etiam
 decoctum lignis antivenereis compositum & pro
 potu quotidiano usurpatum, nimiam sæpe medi-
 camenti activitatem emendat . Mutationes quæ
 in corpore ægrotantium tempore frictionum eve-
 niunt , admodum constantes sunt ; nam fere
 semper primis diebus urinæ copiosissimæ excer-
 nuntur , postea albicantes fiunt , ac deinde uber-
 rimum cinerei coloris sedimentum deponunt ;
 & hac mediante evacuatione morbus perfecte ju-
 dicatur . Salivatio nunquam oritur , sudores raro
 excitantur , rarissime etiam alvus solvitur ; &
 ante curationis terminum nutritio augetur , &
 amissus carniū naturalis color resumitur . In
 omni confirmata vel incipienti lue , in gonor-
 rhæa , ulceribus penis , bubone inguinali , tumo-
 ribus ossium , faucium ulceribus , nocturnis dolo-
 ribus , gravissimisque aliis ejusdem morbi acci-
 dentibus tutissimum , felicissimum , jucundum &
 certe eradicativum remedium suppeditant frictio-
 nes unguento e sublimato corrosivo composito ,
 institutæ . Adversus descriptam methodum insur-
 rexerunt jam dudum vulgares medici , qui dum
 usum externum mercurii sublimati, tamquam per-
 niciosissimum pharmacum damnant , eodem re-
 medio interne utuntur , non sine magno ac cer-
 to ægrotantium periculo . Sed opinionum com-
 menta delet dies , & sophismata Neapolitanorum
 nume-

numerosis per totam Italiam institutis feliciter
 experimentis penitus evertuntur. Videndum mo-
 do cur mercurius sublimatus corrosivus activita-
 tem reliquis mercurialibus anteferendam possideat,
 per se; nam de mercurialium externorum actio-
 ne magis proficua nemo inter rationales medi-
 cos dubitare audet. Mercuriaria salina primum
 omnium efficaciora sunt, vehementiorem activi-
 tatem possident, & quam celerrime manifestum
 effectum gignunt. Calces mercuriales & inter
 reliquas *mercurius calcinatus per se, sive præcipi-
 tatus per se*, summam activitatem ostendunt. Sa-
 les mercuriales & calces mercurii tantam vim ha-
 bent ut corrosiva semper composita esse depre-
 hendantur. Sed mercurius salinus & mercurius
 calcinatus phlogisto, nempe principio inflamma-
 bili caret, illoque acidi ope vel ignis actione
 privatur, hinc mercurii major efficacia a phlogisti
 defectu pendet. Hoc confirmatur fundamentali
 observatione, nam efficacia & vis antivenerea
 mercurii sublimati corrosivi insigniter a viribus
 mercurii dulcis differt, quia sublimatus addito
 novo mercurio, ob phlogisti restitutionem valde
 corrigitur atque mitescit. Acidum etiam salis
 marini eodem principio supersaturatum, vim etiam
 pungentem magna ex parte amittit. Hinc
 mercurius salinus, nempe in statum calciformem
 ab acido marino redactus dum a lymphaticis
 cutaneis absorbetur & recta ad glandulas conglu-
 batas perducitur, lympham offendit a causa vene-
 rea principio inflammabili, sive principio tena-
 citatis refertissima præternaturaliter inquinatam.

Pro-

Propria hinc affinitate cum tenaci lymphæ philo-
 gisto saturata conjungitur, illamque fluidiorem
 ac satis meabilem reddit. Tenacissimæ profecto
 lymphæ venereæ particulæ, a sublimato corrosivo
 plantis pedum applicato, cum urina extra corpus
 feruntur; ac primis diebus urina tantum albi-
 cans & opaca, sine ullo sedimento excerni-
 tur; progrediente dein curatione albæ urinæ ad-
 modum sedimentosæ redduntur. Tanta enim co-
 pia lymphæ venereæ elementa sublimati actione
 soluta in urina suspenduntur, ut frigefacto, &
 extra corpus quiescente lotio, major horum mor-
 bificorum elementorum quantitas sedimenti for-
 ma matulæ fundum petere cogatur. Hæc vero
 sublimati corrosivi operatio tuta & eradicativam
 curationem afferens, raro aut a frictionibus sim-
 plici hydragro, aut ab internis mercurialibus
 obtinetur, ob rationes modo allatas. Immo si
 mercurialia excitato copiosissimo sudore sanita-
 tem ægris absolutam promittunt, tamen preca-
 ria fere semper emolumenta inde manare depre-
 hendi. Etenim cutaneæ evacuationes non modo
 vehementissimam postulant medicamenti actio-
 nem, verum etiam crassas viscidasque substantias
 nunquam secum ferre vel possunt vel valent.
 Non pauci itaque momenti differentiam inter
 diversas mercurii præparationes interesse existi-
 mare, quamvis contrariam sententiam Cl. Joan-
 nes Hunterus in Tractatu de lue venerea tuea-
 tur. Eruditissimus auctor triplicem mercurio vim
 tribui posse existimat; vel enim cum veneno ve-
 nereo copulatur & illud decomponit, unde actio-
 nem

nem irritandi amittit, vel extra corpus secum
 trahit, vel denique novam in animali œcono-
 mia irritationem venereæ irritationis destruc-
 tici- gignit, unde morbus curatur. Alteram dein
 mercurii proprietatem, qua nempe in humoribus
 corporis humani facile solvitur, doctè admodum
 proponit. Experimentis namque in proprio cor-
 pore institutis cum mercurii diversis præparatio-
 nibus, vel interne adhibitis, vel externe usurpa-
 tis uniformitatem actionis evincere conatur.
 Mercurius enim dulcis, sublimatus corrosivus,
 hydrargyrus communis & mercurius calcina-
 tus per se analogum semper saporem habent,
 ideoque eadem ratione uniformiterque in humo-
 ribus dissolvi debent. Quæcumque igitur evacua-
 tiones post mercurialium administrationem exci-
 tantur, mercurium semper extra corpus educunt.
 Addit tantummodo, quod mercurialia facilius in
 humoribus nostris solubilia, faciliorem morbi ve-
 nereæ curationem reddere valent. Sed omnia, quæ
 mercurii actionem, & varia præparata respiciunt
 inferius enucleanda sunt; satis erit in præsentia
 numerosis experimentis innixam sublimati corro-
 sivi activitatem adversus luis venereæ graviora
 symptomata vobis indicare. Gonorrhææ enim
 virulentæ, bubones, ulcera, dolores & alia hu-
 iusmodi, frictionibus cum sublimato corrosivo
 institutis eradicative curantur. Desinant igitur
 imperiti quas ignorant doctrinas contemnere,
 fervent suam in jacore masculam bilem invidi,
 & quæ ipsi neque attigere neque pertractare pos-
 sunt, aliis perficienda relinquunt. Post detectas
 hujus

hujus generis frictiones, inutile prorsus erit aquosis sublimati corrosivi solutionibus ulcera venerea, aut tumores inguinales fovere. Ulcera enim irritantibus remediis tractata bubones gignunt, & bubones topicis stimulantibus vel augentur, vel venenum venereum in externa sede collectum internis partibus communicant. Hinc tempore frictionum partes affectæ simplicissimis, dulcissimisque lotionibus detergi tantummodo debent, ut ulterior irritatio & principium inflammatorium avertatur. Quæ usque adhuc de sublimato corrosivo ejusque usu medico dicta sunt reliquis mercurii præparationibus, magna ex parte aptari possunt; reliqua integram hujus metallicæ substantiæ historiam medicam completuntur, & brevi a nobis debent illustrari.

Saccharum
saturni.

Postremum inter salina metallica locum occupat saccharum saturni, substantia nempe coloris albi, quæ componitur acido vegetabili & plumbi; *Acetites* hodie plumbi, juxta recentiorum chemicam nomenclaturam appellatur. Facile in aqua solvitur, saporemque habet dulcem & adstringentem. Externe solummodo commendatur, & inter exsiccantia & detergentia præsidia collocatur. Chirugi saccharo sive sale saturni frequenter utuntur in ophthalmia, ulceribus venereis & gonorrhæa virulenta. Solutionem enim instituunt pro lotionem & pro injectionibus. Internus usus valde suspectus est quia periculosissimas primo intestinorum ægrotudines, colicas saturninas & talem inducit; effectus enim gignit operationi extracti saturni, aquæ vegetabilis & Cerussæ sim-

millimos; hæc namque plumbi præparata interne assumpta valde noxia sunt.

DE SALIBUS TERREIS.

B Reviter admodum de salibus terreis differendum, quandoquidem de duobus tantum agitur nempe de sale cathartico amaro, & de alumine. Sales terrei.
Sal catharticus, anglicus & epsomienſis quoque dictus constat acido vitriolico & magnesia, ideoque magnam cum sale Glauberiano analogiam habet. Magnesia enim quamvis ab alcali fossili magnopere differat, nullam tamen in operatione salis anglici essentialem affert differentiam. Inter cathartica itaque mitiora, inter aperientia, & non parum etiam diuretica sal catharticus collocatur. Quemadmodum vero rarissime venalis reperitur, ejus loco practici Glauberiano sale utuntur, & huic vulgarissimum salis anglici nomen tribuere solent. Quæ superius de sale Glauberi dicta sunt & huic etiam aptari commode possunt.

Alumen proprie sive argilla vitriolata, substantia est sœpius ab acido vitriolico & terra argillacea composita. De alumine.
Interdum, uti scribit Cl. Bergman *sponſe generatur fatiſcentia pyrita, in argilla vel schisto argillaceo hospitantis*. Ob hanc ideo rationem frequenter occurrit in antiquissimis vulcanis, in quibus a lapidum pyriteorum decompositione quæ oritur argilla, facile aci-

acidum vitrioli assumit, & facilissima artis operatione in alumen vertitur. Alumen igne liquefcit. Decies quater aquæ pondus requirit ut solvatur; saporis est adstringentissimi. Crystalla octoædra pyramidalia exhibet. Si alumen igne vehementiori tractatur præbet spiritum vitrioli simul cum copiosa aqua & statim vertitur in substantiam acerrimam pungentem, & non leviter corrosivam, quæ in officinis dignoscitur nomine aluminis usli. Qualitas, juxta generalem sententiam, pendet a defectu aquæ crystallisationis, unde acidum valde concentratum suam actionem valde exsiccantem exercet. Ad usum medicum aluminis crudi quod attinet, inter fortiora adstringentia collocatur, atque in sanguinis fluxu immodico, atque etiam diarrhæa diuturna commendatur. Serum ideo aluminosum, aluminis grana quinque, sex, decem, & similia præparata aluminosa in supradictis morbis administrantur. Summa tamen prudentia opus est; siquidem adstringentissima aluminis qualitate alvus in stypticatam invincibilem incidit; & intestina styptico remedio insignitur irritata inflammatione corripiuntur. Falluntur itaque nostrates medici, qui alumine crudo, aut aqua aluminosa naturali vel artificiali utuntur pro curatione intermittentium immo & acutarum febrium in quibus laxantibus, & dein tonicis simplicibus remediis succurrendum nimæ humorum spissitudini. Sæpe collyria alumine & albumine ovi composita adhibentur in obstinatis ophthalmiis, ubi morbus lympham tenaciorem acerrimamque

pro

pro causa agnoscit . Ob ægritudinis quoque diuturnitatem , lymphæ circulatio per externa oculi vasa retardatur ; hinc recte collyrii aluminosi stimulo utiliter acceleratur . In inflammationis contra maximo vigore , ab adstringentibus & stimulantibus externis omnino abstinendum . Injections aquis aluminosis in gonorrhæa virulenta passim instituuntur , uti dictum est , sæpissimeque in ipso morbi vigore adhibentur . Rursum in habituali stillicidio , post inopportunam curationem perennante , ad injectiones aluminosas medici deveniunt . In primo quidem casu præmatura fluxus interruptio gravioribus affectibus & præsertim bubonibus venereis ansam præbet ; idem sæpe observatur ubi escharoticis & fortioribus irritantibus præsidii glandis penis & præputii ulcera foventur . Lymphatica enim vasa , quæ in partium genitalium superficie aperiuntur , recta ad glandulas inguinales feruntur . Hinc prohibito fluxu gonorrhœico , atque interrupta ulceris suppuratione , statim venenum venereum glandulas conglobatas proximiores adoritur , & majoris momenti morbum gignit . Aluminosa itaque hisce in casibus penitus fere ableganda sunt . Possunt tantummodo adhiberi si post absolutam morbi venerei curationem , ob persistentem affectuum partium relaxationem ac debilitatem , lymphaticus tenuissimus humor per urethram adhuc evacuatur . Tunc immediata adstringentis præsidii actione , levissima illa ægritudo curatur . Solutiones aluminosæ a Chirurgis in magnis operationibus , ex. gr. in amputationibus artuum adhiberi solebant , adver-

sus magnorum vasorum hæmorrhagias . Accurati vero nostrorum temporum Chirurghi ab hac praxi merito abstinere , quandoquidem periculosa sæpius inflammationes & gravissimæ convulsiones usum aluminis sequuntur . Ulcerum denique sordidorum consolidatio , & carniū flaccidarum destructio procuratur alumine usto ; hoc enim satis vehementi escharotico fibris carnosīs tonus conciliatur, unde corruptæ sejunctæque carnes approximantur pro efficienda cicatrice . Oportet vero ut parcius alumine usto utamur ob qualitates quas habet causticas .

DE INFLAMMABILIBUS.

HAc classe comprehenduntur substantiæ phlogisto per superabundantiam saturatæ, & quæ Inflammabilia. ignis actione, & aëris vitalis interventu attenuantur & evaporationi aptæ redduntur, flammam concipiunt, & atmosphæram noxiis vaporibus inficiunt. Huc pertinent oleosa omnia, non solum quæ e vegetabilibus, & animalibus obtinetur, verum, & corpora phlogistica fossilia, uti oleum fossile, sulphur, omnia bitumina in genere; spiritusque ardentés, ac ætheres proprie dicti. Dum de bituminosis loquitur Cl. Bergman, hujusmodi substantias eandem profecto naturam habere arbitratur, & differentiam inter gênera diversa a quantitate phlogisti repetendam esse existimat. Hanc vero doctrinam, veritati procul dubio valde affinem, non est hujus loci vel temporis ad examen revocare. Generales vero Inflammabilium proprietates sunt, primo odor in nonnullis parum, in aliis gravissimus, nauseosus & capiti infestus; uti ex. gr. observatur in oleis expressis vegetabilium, in pinguedine animali & similibus: hujusmodi enim substantiæ dum recentes sunt, odorem haud ingratum spirant. Verum vel post certum tempus, vel postquam ignis actionem expertæ sunt, ingratum ambustorum odorem emittunt; atque propriis effluviis caput tentant. Hoc accidit ob superabundantem quam

assumunt phlogisti quantitatem . Ab eodem certe principio oritur insignis illa mutatio in oleis & pinguibus corporis humani substantiis, quæ in nonnullis febrilibus morbis a principio inflammabili fere combustæ, vaporis formam assumunt, & exhalationem gignunt absolute empyreumaticam, odorem cornu cervi usti præferentem . Ab hac causa celerrime corpus macie conficitur, & paucarum horarum spatio arefcit . Simili empyreumatico odore donantur, olea empyreumatica, bitumina sive olea fossilia, multæque etiam peculiari fœtore præditæ resinæ . Sulphur tantam cum componentibus suis affinitatem habet, ut in statu concreto nullo fere odore distingui possit; verum ignis actione, dum nexus inter acidum vitriolicum & phlogiston separatur, substantiæ bituminosæ odorem sulphur adipiscitur . Alcohol, & spiritus omnes inflammabiles vegetabilium, qui fermentatione & distillatione obtinentur, dum accenduntur, bituminosum sive sulphureum odorem emittunt . Hujusmodi etiam substantiæ inflammabiles sulphuris volatilis naturam assument, dum acidis copulantur . Oriuntur hac ratione ætheres diversi, qui in perenni evaporationis statu versantur, semperque odorem bituminosum spargunt . Olea itaque expressa vegetabilium & pinguedines animalium sunt substantiæ glutinosæ, ac mucilaginosæ, quæ phlogiston retinent, & coercere conantur, dum in naturali versantur statu; & tunc principium inflammabile nullum præsefert peculiarem odorem . Acidum in genere coercentis principii vices gerit in pinguedi-

dine, sebo, & saccharo, in quo copiosa semper, uti in oleis, mucilago acidum abscondit; tunc memoratæ substantiæ dulces sunt. Acidum vi- trioli in sulphure principium inflammabile in- cludit, & tunc sulphur nullo peculiari odore di- stinguitur. Verum si ignis pinguedinem, sebum, sulphur aliæque inflammabilia adoritur, tunc de- componuntur olea, atque oleosæ particulæ ob acidi defectum, & phlogisti superabundantiam in vaporem attenuatæ odorem bituminosum, empyreumaticum exhalant, & vim summo- pere gravativam adipiscuntur. Hanc qualitatem natu- raliter possident olea fossilia universa, quæ ignis subterranei actionem experta sunt, ac proinde effluvia empyreumatica foetidissima jugiter præ- bent, coloremque etiam obscurum piceumque, uti corpora omnia combusta nanciscuntur. Idem profecto evenire consuevit in pice communi, quæ ab oleo pini ortum ducit, & ope ignis ob- tinetur. Oleum enim resinofum odorem gravem & aromaticum, colorem subflavum, & omnes substantiæ inflammabilis naturales characteres ha- bet. Verum statim ac ignis vehementia decomp- onitur pro picis compositione, vapores emittit empyreumaticos, atque quod superest substantia est coloris obscuri, & quæ indolem insigniter in- flammabilem possidet. Succini qualitates, quoad colorem & odorem, adnotatam modo doctrinam penitus confirmare videntur. Oleum quoque dul- cissimum, sive principium mucilaginosum natura semper in animalibus & vegetabilibus substantiis collocavit, ut spissitudine particularum quibus

oleum componitur, particulas alimentorum, elementa solidorum, moleculasque admodum volatiles & acutas, vitæ sustinendæ admodum necessarias, retineret, conglutinarretque. Acerrimæ seminum Ricini particulæ, oleo ejusdem plantæ involutæ dulcissimum constituunt catharticum; particulæ acres & corrosivæ Euphorbiarum, Daphnidum, Ficum, oleo destituuntur. Animalia pinguedine destituta corrosivis humoribus absumuntur. Tenuissima cutis pinguedine, valde stimulans perspirationis materia obtunditur & corrigitur. Contra si oleosa & pingua phlogisto ultra modum saturantur, exsiccantia, stupefacientia & syderantia sunt, uti de oleis empyreumaticis, de bituminosis & sulphureis verissimum est. Olea expressa, pinguedinesque recentes animalium, quemadmodum subdulcem potius saporem, ac minus ingratum odorem habent, ideo inter medicamenta demulcentia, relaxantia & antispasmodica collocantur. Sed olea interne usurpata stomachum primario afficiunt, ac deinde internis sedibus communicata, non mediocrem sanitati noxam afferunt; quandoquidem caloris animalis accessione empyreumaticam naturam acquirunt, unde varia in corpore damna exurgunt. Nausea inde orta ab eodem principio nascitur, siquidem emetica ideo suam operationem exercent, quia principio inflammabili scatent. Inflammabilia vero oleosa secretionum abundantiam imminuunt & præsertim insensibilem perspirationem retardant, uti observarunt recentiores practici, qui ab immoderato buty-
ri

ri usu imminutam perspirationem, corporumque pondus quotidie adauctum viderunt. A defectu perspirationis morbi oriuntur biliosi gravissimi, ac lethales phlogisticae ægritudines generantur. Sed de his alio in loco. Substantiæ inflammabiles e classe bituminum magnopere commendantur in morbis convulsivis, passione hysterica, motibus convulsivis infantum aliisque hujusmodi. Sunt qui tincturam oleumque succini pro specifico anti-hysterico externe atque interno habent; alii rursus oleum animale empyreumaticum, oleum animale Dippelii, oleum cornu cervi interne adhibent in gravissimis convulsionibus, atque valde inflammabili phlogisticoque remedio mirificas vires tribuunt. Sed activitas antispasmodica horum remediorum non a calida & stimulantia qualitate, sed a fluidi nervei interrupto cursu repetenda est. Substantiæ enim omnes inflammabili principio saturatæ, fluidum nerveum, scilicet omnium actionum ac sensationum instrumentum potenter attrahunt, & cum principio vitalitatis strictissime copulantur. Hoc autem evenire debet ob summam, quæ inter principium inflammabile & materiam caloris intercedit differentiam. Sed fluidum nerveum materiæ electricæ simillimum esse recentissimæ certissimæque observationes ostendunt, & scintilla electrica calorifico principio præsertim componitur, hinc inflammabilia, bitumina & olea empyreumatica fluidi nervei quantitatem imminuunt, motum retardant & efficaciam admodum inertem reddunt. Aëre inflammabili, phlogificato,

Inflammabile
lium usus.

& fixo per pulmones suscepto cordis irritabilitas amittitur, summa virium prostratio deprehenditur, caput stupore & lethargo afficitur, ac mortali pallore facies obducitur. A fumo carbonum similia nascuntur phænomena; pulmones enim statim perturbantur, pulsus parvi & admodum inæquales fiunt, homo apoplecticus redditur, ac generali frigore perturbatur. Palustris aër nostrarum regionum, qui æstivo tempore malignos morbos gignit, inflammabilibus scatet elementis, quibus calorem animale, atque ideo irritabilitatem destruit, omniaque mox allata accidentia gignit. Quæ usque adhuc de natura substantiarum inflammabilium adnotavimus, usum & vires olei animalis, olei succini & similium adversus morbos convulsivos, nobis indicare videntur. Si enim in pertinacibus convulsionibus parvissimæ horum remediorum doses propinantur, fortasse aliquam utilitatem asserere poterunt, quia celerrimam & præternaturalem fluidi nervei distributionem & actionem prohibent. Abstinentum vero a dosibus valde adauctis, nam hac ratione non minuitur modo, sed deletur omnino fibræ muscularis necessaria oscillatio. De oleo fossili, petroleo scilicet, naphtha aliisque bituminosis nihil addam, semper enim noxias, non autem salutares vires possidere existimavi. Veteres petroleo, bitumineque judaico utebantur pro balsamatione cadaverum; mortua enim corpora foetidis hisce & unguinosis substantiis obducta, a corruptione intacta servabantur. Nos picem communem pro simili objecto utiliterque semper adhi-

hibuimus. De picis qualitatibus, & præsertim de pice navali alio in loco disputavimus.

Primarium inter inflammabilia locum tenet sulphur, substantia nempe acido vitriolico & phlogisto composita, juxta celebriorum chemicorum sententiam; quamvis alia ratione oriri Galli existiment. Sulphur est vel nativum vel factitium, coloremque habet dilute luteum. Nec aqua, spiritu vini, nec acido quocumque solubile est. Oleis tam expressis quam stillatitiis, ac petroleo solvitur. Cum alcalinis fixis unitur; hinc hepar sulphuris. Igne liquefcit. Metallicorum corporum fusionem promovet. Alcalinis volatilibus dissolubile. Vimi mercurialium debilitat. Denique a suis constitutivis partibus sulphur appellatur *phlogiston acido vitriolico satiatum*. Loca vulcanica magnam sulphuris nativi copiam suppe-
ditant, aliis sæpe mineralibus mixti. Purificatione purissimum obtinetur. Officinæ exhibent flores sulphuris, balsama sulphuris diversa, nempe balsamum sulphuris simplex, crassum, Barbadenſe, Terebinthinatum, & Anisatum. Parantur etiam artis opera hepar sulphuris, lac sulphuris præcipitatum, tinctura sulphuris volatilis, aqua sulphurata, unguentum ad scabiem. Pro præparatione florum sulphuris sublimetur sulphur ex vase idoneo, & flores qui concreſcunt, reducuntur in pulverem mola lignea, vel ligneo pistillo, in mortario marmoreo. Flores sulphuris omnium purissimi pro usu interno, & pro compositione remediorum sulphureorum adhibentur. Si sulphur interne assumitur totum pervadit corpus, per-
spi-

De sulphure.

spiratio enim sulphureum odorem acquirit & instrumenta argentea corpori approximata nigra evadunt, uti semper cum sulphure accidit. Hæc simplicissimi sulphuris activitas morborum cutaneorum curationem promovet, juxta generalem sententiam, nam uti sulphure externe confricato scabies curatur, ita etiam ob insignes, quas possidet vires diaphoreticas morborum internorum causas noxiosque humores ad exteriora pellit. Balsamicam quoque, pectoralem, sive pulmonicam facultatem sulphuri tribuunt practici, & ideo balsamo sulphuris Anisato, aut Terebinthinato utuntur in phthisi pulmonali. Internus vero usus balsami sulphuris in ulcere pulmonum ob analogiam commendatur, quandoquidem eodem medicamento ulcera externa admodum sordida repurgantur. Verum activitas hæc detergens externa non solum inutilitatem, sed damna etiam, quæ a balsamo sulphuris interne administrato expectari debent, manifeste declarat. Etenim ut ulcus externum detergatur, oportet ut medicamenta huic indicationi absolvendæ necessaria ab irritantium, calidorum & stimulantium classe desumantur. Sed diversum prorsus est externi ulceris sordes & impuritates dissipare; stimulis enim carnibus, & ulceris ipsius fundo exsiccato, salutaris obtinetur cicatrix, neque ab irritatione externa ullam generalis corporis œconomia noxam experitur. Contra insigniter stimulans, inflammans atque exsiccans balsami sulphuris actio internis sedibus applicata, partibus nullo peculiari morbo affectis, & quæ nullo indigent phar-
ma-

51
maco primario inhæret, periculosasque ægritudi-
nes excitat. Et sane balsamum sulphuris, quo
ulcus pulmonis curari deberet ventriculum pri-
mo & intestina perturbat, dein universum cor-
pus pervertit. Paucae tantum guttæ, utpote de-
cem aut quindecim in phthisi commendantur a
practicis; ipse vero numquam bonos hujus præ-
sidii effectus expertus sum. Resinosa enim omnia,
bituminosa, inflammabilia pectori & pulmoni-
bus infesta sunt. Sed balsamum sulphuris inter
præsidia pulmonicis proficua collocari posse sua-
det acidi vitriolici in sulphure præsentia. Hoc
certe prima facie verum videtur, sed si res se-
rio perpendatur fallacia doctrinæ facile apparebit;
vel enim sulphur non decomponitur, & tunc nul-
la erit medicamenti operatio, vel contra in pro-
pria & distincta componentia sejungitur & tunc
insignem actionem procul dubio exercebit. Sulphu-
ream foetidissimam transpirationem exhalant cor-
pora, quæ flores sulphuris, vel balsamum sulphu-
ris assumpserunt, hinc certe hæc substantia intra
corpus decomponitur & per omnia tenuissima
etiam vasa diffunditur. Nam ut odor sulphureus
perferri possit, oportet ut ab igneo principio & ab
oleosis particulis sulphuris dissolutio perficiatur.
Oleum enim animale, & pinguedo, una cum calo-
rificis elementis, sulphuris decompositioni infer-
viunt. Sed particulae sulphuris hac ratione indo-
lem aëriformem qualitatemque acerrimam nanci-
scuntur; vapores etenim a sulphuris combustio-
ne exurgentes valde irritantes, exsiccautes vitæ-
que animali admodum infesti sunt. His positis
dum

dum sulphur acidum vitriolicum humoribus corporis communicat, acidi particulæ acerrimo phlogisto saturatæ stimulantem, inflammantem & alterantem facultatem solidis valde noxiam exercent. Neque exanthemata illa, quæ ab interno sulphuris usu in superficie corporis efflorescunt, expulsionì morbificæ causæ tribuendæ sunt; quandoquidem ab acri sanorum humorum diathesi, ope sulphuris procurata, ortum ducunt. Facultas vero specifica sulphuris in curatione scabiei, nullo modo ejusdem substantiæ efficaciam in morborum cutaneorum dissipatione probare aut confirmare videtur. Nam scabies morbus est omnino externus; quia acarus scabiei cutaneis squamulis absconditus & succis animalibus vivens pustulas efformat, atque simplici frictione liniamenti sulphurei, aut unguenti mercurialis occiditur. Falluntur sane medici illi qui scabiem a superficie corporis exturbatam & ad interna vergentem gravissimorum morborum causam esse contendunt; & ideo scabiei renovationem mediante immediato contagio commendant. Si pus in pustulis scabiosis abundat, potest aliquando a lymphaticis cum ægrotantium damno absorberi; hoc vero rarissime accidit. Tutissimum igitur semper erit linimento sulphureo quamcumque scabiem curare. Sunt qui sulphur cum pinguedine vel oleo olivarum trituratam adhibent; alii rursum una cum sulphure mercurium etiam sublimatum corrosivum triturare solent. Sed scabies etsi celtico conjuncta principio, nunquam tanto indiget remedio, quin sulphure tantum perfecte cu-

curari non possit. Usitatiorēs praestantioresque unguenti ad scabiem praeparationes sunt I. Unguentum e sulphure: R. Unguenti simplicis lib. sem. Flor. sulph. non lot. drachm. duas essent. limon. scr. un. m. & f. l. a. unguentum. Secunda prae-
paratio appellatur unguentum ad Psoram, pro quo;
R. Sulphur. drachm. unam pulv. radic. Helleb. vel sal. ammoniac. crud. unc. ij Axung. porc. drachm. duas m. f. unguentum. Ne generalis cutis obstipatio a generali frictione eveniat, quarta corporis pars unguento ad scabiem repetito confricatur nocte ingruente, usque ad perfectam curationem. Reliquae sulphuris praeparationes prorsus e materia medica eliminandae, quandoquidem aut a sulphuræ puro parum differunt, aut nullam prorsus peculiarem efficaciam possident. Denique de spiritu sulphuris suo loco differimus; etenim idem est ac spiritus vitrioli.

Materiae medicae scriptores, ipsique sagaciores De aëre sulphureo loquuntur & tamen qualitates aëris sulphureo imprægnati, a qualitatibus vitalis & respirabilis aëris omnino differunt. Loca omnia vulcanorum effluviis referta genuinum exhibent sulphureum aërem, respirationi inimicum. In hisce regionibus ægotantes phthisi pulmonali affectu celerime intereunt, quia loco purissimi aëris, vapore phlogistico insigniter noxio saturantur. Decipiuntur itaque medici dum sulphureum aërem phthisicis commendant; miselli enim hoc inspirato aëre celerime moriuntur; quemadmodum experimenta frequentissima cum aëre Puteolano instituta

patenter evincunt . Neque ulla in aliis morbis ab aëre sulphureo utilitas expectanda ; aër enim sanguini commixtus si purus ac dephlogisticatus est vitam sustentat , morboſque periculoſiſſimos ſuperat ; contra impurus & phlogisticatus , uti aër sulphureus , vitalitati opponitur novorumque morborum fundamentum ſuppeditat . Aëris itaque ſulphurei effectus valde pertimeſcendi ſunt , ſiquidem circulationem retardat , nutritionem perturbat , ob tenacitatem quam in humoribus inducit , ac proinde æſtivo tempore lethales phlogiſticos , hyberna vero tempeſtate chronicos , viſcerum præſertim naturalium , morbos gignit . Aquæ tandem acidulæ , quæ ob vaporem , aëris hepatici nomine recte inſignitum , ſulphureæ dicuntur , ſalutares , & medicamentofæ ſunt , non ob moleculas hepatis ſulphuris quas continent , ſed quia copioſiſſimo ſaluberrimoque acido aëreo ſcætant , uti alio in loco adnotatum eſt .

A ſulphure ad ſpiritus ardentés , nempe De ſpiritibus ad Alcohol tranſeundum , atque de compo-
ardentibus . ſitis a ſpiritibus huiusmodi differendum . Alcohol itaque , ſpiritus vini , & ſpiritus vinofus , unicam designant fluidam ſubſtantiam ſummopere volatilem , principio inflammabili admodum ſaturatam , oleo eſſentiali , aqua & acido vegetabili compositam . Oleum vegetabile eſſentiale , uti ex materia medica vegetabili patet , obtinetur per diſtillationem vegetabilium a foliis , floribus , ſtaminibus , lignis , corticibus , fructibus , ſeminibus , radicibus , balsamis & reſinis . Saporis eſt odorique penetrantis , unde ſubjectum a quo erat ſepa-

separatum plane declarat. Spiritibus vinosis solubile. Frigus insigne generat. Cum acido nitroso & vitriolico flammam concipit. Cum aqua per distillationem uniri potest, unde aquæ officinarum stillatitiæ. Cum alcali etiam fixo conjungitur, & saponem philosophicum vel Starkæi constituit; cum alcali vero volatili efformat spiritum volatilem aromaticum. Ab oleo essentiali modo descripto spirituum ardentium primariæ qualitates ortum ducunt, summa enim volatilitas, odor valde penetrans, sapor ardentissimus, & inflammabilitas ab oleoso principio nascitur; acidum vero vegetabile per se nunquam accenditur. Contra plantæ resinosæ, quæ oleo essentiali supra modum abundant, non solum igne admoto facile accenduntur; sed quam æstivo tempore emittunt oleosam atmosphæram accendit admota candela. Oleum itaque essentialiale valde solutum & attenuatum occurrit in spiritibus ardentibus, unde flammam statim concipiunt. Summa inflammabilis principii attenuatio spiritum vini penetrantissimum, & insigniter noxium solidis fluidisque corporis animalis reddit, uti mox demonstrabitur. Sed priusquam ad theoriam actionis spirituum ardentium veniamus, essentielles harum substantiarum proprietates adnotabimus. Spiritus itaque ardens, sive spiritus vini ab oleo essentiali, acido vegetabili & aqua compositus, liquor est pellucidus & volatilis; qui cum aqua facillime miscetur; saporem odoremque habet ardentem ac pungentem. Igne admoto protinus accenditur; resinas, balsama & olea distil-

lata

lata ex toto dissolvit ; saccharum difficiliter ; ceram imperfecte. Acidis per distillationem conjunctum dat spiritum dulcem, nempe æther ; cum alcali volatili caustico spiritum volatilem officinarum. Fluida animalia, quæ coagulabilia sunt coagulat. Fermentationem prohibet. Specificæ gravitatis est fere minimæ. Nullam inter se quoad præcipuam naturam diversi spiritus ardentes differentiam habent, nec non depurati & rectificati eandem actionem exercent ; hinc spiritus vini, frumenti, sacchari eodem genere complecti possunt. Ab enumeratione vero præcipuarum qualitatum facile eruuntur effectus, qui a spiritibus ardentibus in corpore animali oriri debent. Penetrantissimus enim, inflammabilis, pungentissimus liquor, stimulo vehementi & qualitate phlogistica, a fluidis solidisque maximam caloris copiam cum insigni damno educit ; liquores enim amisso calore concrescunt & coagulantur, fibræque solidæ ob eandem rationem rigescunt, & sicca inflammatione afficiuntur. Hoc probatur exemplo hominum, qui spiritus vinosos, spiritumque sacchari assatim bibunt ; primo tempore hebetes facti naturalium actionum promptitudinem amittunt, exquisito sensationum exercitio privantur, artuum torpore corripuntur, sanguinemque possident non solum atrum sed spissum, valde fibrosum, nempe phlogisticatum. A simplici abusu vini simillima nascuntur accidentia ; quandoquidem vinum spirituosas & inflammabiles particulas abundanter continet. Verum peculiari animadversione indigent gravissimi illi & sæpe-

nume-

numero lethales pectoris morbi, & præsertim, asthma & hydro-thorax, qui vini, & spirituum ardentium abusum proxime sequuntur. Facillimum tamen erit intelligere cur alcohol potius pulmonis & respirationis, quam aliarum partium œconomiam perturbat. Pulmonum cellulae, quæ vitiosum noxiumque phlogisticum totius corporis vaporem recipient, si ultra modum hoc fluido a spiritibus ardentibus proveniente saturantur, neque necessariam vitalis aëris proportionem suscipere possunt, a causa insigniter noxia obruuntur. Respiratio tunc cum difficultate absolvitur. Rursum spirituum vinosorum coagulans activitas sanguinem crassum, humoresque lymphaticos admodum tenaces reddit; hac ratione ob retardatam circulationem pulmonalem aqua in cavitate thoracis colligitur; obstructionesque in substantia pulmonali nascuntur. Juxta theoriam modo adnotatam & firmissimis observationibus superstructam, spiritus ardentes semper œconomiae animali noxii esse debent; nec unquam medicamentorum nomine insigniri merentur. Neque internus modo, sed externus quoque usus primâ fronte proficiuus, suspectus esse debet; nam Chirurgi qui contusis, fugillatis compressisque partibus mederi posse opinantur, frictionibus simplici spiritu vini, vel calidis & aromaticis remediis saturato, magnopere falluntur; contusæ enim dolentesque sedes, quæ nova irritatione vexantur, periculosa inflammatione & gangræna corripì poterunt, ut sæpe praxis ostendit. Attamen quamvis recta materiae medicæ intelligentia experimentis suffulta internum

spiritus vini usum improbare conatur, non desunt multi, qui spiritu vini, & præsertim spiritu sacchari interne utuntur in catarrho, tussi, & rheumatismo. Apparenti enim calore decepti, cognitionem hoc præsidio procurari existimant. Magis vero reprehendendi sunt practici illi, qui Swietenii aliorumque auctoritati innixi mercurium sublimatum corrosivum in spiritu vini, vel spiritu frumenti solutum interne adhibent in lue venerea. Gravissima ab hac praxi damna oriuntur; corpus enim urenti calore comburitur; pulmonalia vasa sæpe lacerata sanguinem emittunt, & ventriculus non ulcere tantum sed corrosione affectus sæpenumero deprehenditur. Hoc autem pendet ab actione combinata sublimati corrosivi & spiritus ardentis. Alcohol tamen quia facile dissolvit substantias resinosas & gummosas vegetabilium commode pro menstruo adhibetur. Tincturæ enim spirituosæ omnes, particulis essentialibus & peculiaribus plantarum saturæ, spiritu vini tantummodo obtinentur. Et quamvis tincturæ spirituosæ parcius prudenterque administrari debeant, quia caloris non modo, verumetiam ardoris sensationem in ventriculo excitant; possunt tamen stomachi ipsius languorem, viscerumque naturalium debilitatem dissipare. Spiritus itaque ardentes potius tamquam instrumenta pro medicamentorum præparatione, quam ut præsidia per se considerari debent, & potius damna vitare quam genuina emolumenta expectare oportet.

Æther spiritum vini pro basi habet, atque
De æthere. est productio artificialis, quæ obtinetur per distillationem.

lationem spiritus vini rectificatissimi , cum acido vitriolico , nitroso , muriatico vel vegetabili concentrato . Odor fragrantissimus est . Fluidorum omnium maxime levis , volatilis , inflammabilis , subtilis . Nec aqua , spiritu vini , nec liquoribus acidis , vel alcalinis conjungitur . Olea , resinas & balsama dissolvit . In proposita operatione prodit primo spiritus subtilissimus fragrantissimus ; qui liquoris anodynii mineralis Hoffmanni nomine insignitur . Repetita deinde distillatione prodit naphtha vitrioli ; & si residuo affunditur nova spiritus vini quantitas , denuo spiritus exurgit odoratissimus . Æther in genere inter antispasmodica , anodyna & sedativa remedia collocatur , summisque extollitur laudibus . Medici utuntur passim liquore anodyno minerali in convulsionibus hysteriis , in internis externisque doloribus , & in morbis quoque renum & vesicæ , quia vires sedativas revera possidere existimant . Multi in gravi capitis dolore embrocationes hoc remedio factas adhibent . Dosis pro usu interno est a guttis 20. ad 40. & ultra . Vulgus medicorum , qui vim anodynam cum opiata confundit , doses uberiores liquoris anodynii damnat , & ultra decem vel duodecim raro progreditur . Experientia tamen docente asserere possumus liquorem anodynum non modo non suspectas sed magni momenti vires nunquam possidere . Frustra potius , & sine apparenti saltem utilitate hujus liquoris uberrimas doses , variis in morbis , sæpiissimeque adhibuimus . Multi etiam primi subtelii prædicti de inefficacia liquoris anodynii conqueruntur .

tur . Quamvis enim in hac compositione insignis utilitas manare possit ab acido vitrioli mediante spiritu vini in vapores attenuato, nunquam tamen res bene succedit , quia acidi particulæ nullo modo intactæ servantur, immo decomponuntur, propriamque naturam omnino amittunt . Ob eandem certe rationem spiritus vitrioli simplicissimus usurpatur . Æther resinas, olea & ballama dissolvit , hinc tamquam menstruum sæpe poterit usurpari .

METALLICA .

De metallis .

CORpora metallica, quæ præcipuam constituunt classem in regno minerali, non solum valde compacta, solida ac insigniter ponderosa sunt, verum etiam ob componentium indolem, ad substantias inflammabiles proxime accedunt . Quæ metallicam formam diutius retinent, vehementiori quamvis igne tractata, perfecta magis atque nobiliora ; quæ vero, uti Cl. Bergman scribit, *sub vulgari fusione* aëri atmosphærico exposita, cito in superficie exarescunt, & terrestrem porrigunt cremorem, & in pristinum statum restitui nequeunt, nisi addito principio inflammabili, ignobilia vocantur . Historia metallorum & metallicarum substantiarum omnium ad chemiam pertinet . Medici enim neque metalla in universum, aut integra pro morborum curatione, neque omnia adhibent, sed tantum acida metallis conjuncta,

Sta, five salina metallica superius descripta, vel terras singulis metallis peculiare usurpare consueverunt. Utuntur ex.gr. calce antimonii, aut mercurii aliisque terris metallicis, quibus essentialis inest facultas medicamentosa, juxta generalem sententiam. Non pauci vero inter recentiores calces metallicas omni phlogisto orbatas, nulloque acido copulatas omnino inertes, & quacumque activitate destitutas esse contendunt. Stibium ideo diaphoreticum bene lotum, stibium fixum & similia pro frustraneis præsidiiis habent. Contrarium porro dicendum de calcibus nonnullorum metallorum, quæ non terreæ aut inertes, sed alterantes vehementerque corrosivæ sunt, quemadmodum accidit præsertim cum mercurii calcibus, etiam simplicissima methodo paratis. Nos vero quoad terras metallicas diversam a communi sententiam tuemur, uti inferius apparebit. Materia medica pauca tantum metalla inter medicamenta complectitur, nam aurum & argentum, quas vulgus imaginatur vires non possident, & potius empiricis sunt relinquenda. Tincturæ omnes aurificæ, sales ex auro parati & similia, quæ magno comparantur pretio remedia, nullam ægrotantibus utilitatem afferunt. His itaque posthabitis ad genuina e metallis comparata medicamenta describenda gradum faciamus.

DE HYDRARGYRO.

De hydrargy-
ro.

HYdrargyri sive argenti vivi nomine designatur mercurius ab omnibus metallis diversissimus, quandoquidem insignem habet fluiditatem, nec concrevit, nisi adhibito frigore graduum 380.; tunc concrevit & malleo tractari potest uti plumbum. Argentum vivum post aurum ponderosissimum est. In igne est volatile, sed actione ignis lente procedente, post longum tempus in calcem rubram vertitur, & nomen *precipitati per se*, acquirit. Metalla & semimetalla plurima, caloris vel triturationis ope solvit. Maxime dissolubile est, particulæque divisæ figuram semper sphaericam assument. Balsamis, sulphure, vel corporibus unctuosius per triturationem uniri potest. Agitatione diuturna in pulverem mutatur. In acidis mineralibus solubile est; facilius tamen in acido nitroso solvitur, & pro solutione in acido vitriolico ebullitione opus est. Color mercurii currentis splendens, vivacissimus est. Saporem nullum habet mercurius vivus non solutus; ubi vero solvitur in humani corporis humoribus gustum præbet subdulcem. In saliva humana, & fluidis lymphaticis facile solvitur, uti in substantiis gummosis, unde mercurius gummosus. Generalis, quæ in corpore humano actio a mercurio gignitur primo in pulsum elevatione & præternaturali plenitudine versatur. Post quatuor

tuor enim vel quinque frictiones arteriæ ampliores, magisque resistentes deprehenduntur; & quo major quantitas mercurii adhibetur, non solum major fit arteriarum diameter, sed pulsationes inæquales factæ undositatem & frequentiam assument. Hæc autem mutatio de critica aliqua futura evacuatione nos admonet, ac præsertim ostendit vel proximam salivationem, vel salutarem urinæ fluxum. Salivatio est primaria mercurii operatio, quæ variis conjungitur initio, variisque in progressu accidentibus copulatur. Primo enim salivæ sapor naturalis admodum dulcis redditur, densiorque antea saliva summam tenuitatem fluiditatemque nanciscitur; hujusmodi qualitates una cum quantitatis incremento observantur. Salivatione ultra modum & per plures dies adaucta saliva foetidissima quoque redditur; atque gingivæ initio tantum tumidæ ac dolentes, sordidis ulceribus & molestissimis aphthis afficiuntur. Tempore salivationis palatum & fauces excoriantur, & ob glandularum omnium intumescuntiam deglutitio difficulter absolvitur, ac respirationis integritas perturbatur. Foetida saliva, spiritus foetidus, & ulcera oris ac faucium cum generali perspirationis ac sudoris pessimo odore, nec non cum urinæ sæpius foetore conjunguntur. Memorati effectus satis manifeste ostendunt essentialem mercurii actionem in corpore humano pendere a certo corruptelæ gradu in humoribus excitato; attenuari enim atque inde evacuari lymphæ tenacissimæ elementa non possunt, nisi antea corruptorii principii vim persentiant, uti inferius

demonstrabitur. Peculiari etiam coloris defœdatione vexantur, qui mercurialem salivationem experiuntur, non solum quia generalem humorum corruptionem patiuntur, verum etiam quia hoc tempore digestio ciborum essentialiter pervertitur. Mercurius salivationem gignit, non quia post integram veneni venerei subactionem, cum hac morbosa causa conjunctus per os exitum sibi parat, verum quia peculiarem cum saliva affinitatem habet. Hinc chemica potius attractione ad glandulas salivales fertur, salivæ attenuationem & corruptionem gignit, stimuloque vehementi gingivas ac totum os penetrando salivationem copiosissimam procurat. Quæ in morbo venereo mediante mercurio accidit salivatio, in hominibus quoque perfecte valentibus & mercurio tractatis, constanter deprehenditur. Mercurius etiam extra corpus cum saliva ope triturationis perfecte miscetur, atque extinguitur. Falluntur ideo vulgares practici, qui morbum venereum absque salivatione mercuriali curari non posse existimant. Contraria prorsus doctrina locum habet, quandoquidem salivatio aut præcox, aut valde copiosa, vel diuturna morbum non solum insanatum relinquit, verum aliis incommodis, sæpe gravissimis fundamentum suppeditat. Et sane si salivatio post primas frictiones apparet, de mercurii per totum corpus rapidissimo progressu certi sumus; intacta hinc remanebit morbi causa, quia mercurius cum saliva simplici conjunctus foras egreditur. Hoc probatur frequentissimis exemplis agrotantium, qui præmatura salivatio

vatione correpti, dum perfecte se curatos esse existimant, paucis elapsis mensibus confirmatæ luis accidentibus denuo afficiuntur. Salivatio itaque mercurialis nunquam pro certo absolutæ curationis indicio haberi debet. Rursum si hæc evacuatio mercurii opera procurata per longum tempus sustinetur, non solum molesta & periculosa macie corpus conficitur, verum nova & magni momenti incommoda oriuntur. Febricula primum hæctica feбри simillima vespertinis horis exsurgit; tussis oritur primo sicca, dein humida, neque raro alvi etiam fluxus oritur periculosus. Frequenter itaque post diuturnam salivationem mercurialem ægrotantes phthisici fiunt. Ulcera etiam, quæ hoc tempore pertinaciter fauces occupant, morbis pectoris originem præbent. His positis a salivatione mercuriali, eradicativam morbi venerei curationem nunquam expectare debemus; eo magis quia tuta perfectaque curatio absque salivatione semper obtinetur. Nam si tempore frictionum unguento communi institutarum certæ in usum revocantur regulæ, & præsertim si balnea tepidiuscula administrantur, ad præcavendam salivationem, morbus omnino curatur. Si unguentum mercurio sublimato corrosivo paratur, morbi causa medicamento attenuata, & lymphæ venerea ad certum corruptionis gradum perducta, lues venerea urinæ sedimentosæ profluvio eradicative curatur. Hæc breviter, arrepta occasione, de salivationis natura, effectu & causis lubenter adnotavimus, ut essentialis circa operationem mercurii doctrina illustraretur. Qua vero ratione perti-

pertinax & noxia salivatio coerceri possit, hoc
 in loco videndum, ut hujus theoriæ historia,
 quantum fieri possit, perfecta evadat. Ex dictis
 eruitur balneorum usum salivationem arcere; hinc
 in salivæ fluxu immodico eodem præsidio utendum.
 Lotiones deinde dulcibus medicamentis, uti solutio-
 ne gummi arabici in aqua rosarum & similibus
 factæ, admodum utiles esse solent. In genere vero
 copiosissimus aquæ usus optimum in hoc casu ef-
 fectum gignit. Sunt qui alvum frequenter pur-
 gantibus pharmacis laxare solent, ad avertendam
 salivationem; verum qui hac ægritudine laborant,
 sunt valde extenuati, ideoque numquam sine pe-
 riculo purgantur; immo diarrhæa sæpe in mor-
 bo gallico diuturno suspecta est. Ab opiatīs in
 eodem casu non mediocris certe obinetur utili-
 tas; imminuto enim generali stimulo, ac retar-
 dato circulationis impetu, minor semper erit ver-
 sus partes superiores humorum affluxus. Pilulæ
 itaque e cynoglossa, aut styrace, ad grana quin-
 que vel sex quotidie exhibitæ proficuae sunt;
 immo in universum mercurialia cum opiatīs
 utiliter semper copulantur. Ubi tempore fri-
 ctionum, vel salivatio exoritur, vel alii
 effectus deprehenduntur, ab aëre frigido cave-
 re debent ægrotantes; quæ enim in atmos-
 phæra eveniunt mutationes actionem medicamen-
 ti penitus evertere possunt. Veteres medici aërem
 externum frigidiusculum omnino vitandum esse
 clamabant; ægrotos angustissimo & perfecte clau-
 so conclavi detinebant, puriorisque externi aëris
 accessum arcere conabantur portis, fenestris, vitrisque
 per-

perpetuo firmiterque occulis. Igne assiduo aër artificialiter incalescebat, indusium ægrotantes unicum ab initio ad finem curationis retinebant, neque unquam lectuli linthea mutabantur. Mephiticum aërem alcalicis, phlogisticisque effluviis saturatum ægri spirabant, & dum medici morbum venereum debellare nitebantur, putridarum magni momenti ægritudinum fundamentum statuebant. Ab aëris vitiosa, & phlogistica indole coloris defædatio, macies lentæque febriculæ, cum maximo ægrotantium detrimento oriebantur. Nostra vero ætate contraria prorsus methodo frictiones mercuriales administrantur; omnia enim, quæ ægro inserviunt purissima ut sint a medicis imperantur; aër frequenter renovatur, balnea sæpe usurpantur, ut copiosa eveniat perspiratio, atque ut mercurius facile intus suscipiatur. Certe circa numerum frictionum, & circa quantitatem unguenti, quod adhiberi debet, regulæ constitui nequeunt; nam juxta morbi accidentia, tempus, corporis habitum, anni tempestatem, aliaque non pauca vel diuturnius progrediendum vel maturius abstinendum. In genere vero ab una tantum drachma initium facere oportet pro singula frictione, & dosis ad duas usque drachmas quotidie augeri potest. Primo enim parciore doses salivationem, fere semper noxiam, prohibent. Secundum mercurius ob operationis suæ tarditatem, per satis longum tempus intra corpus retinetur, unde venenum venereum integre decomponere, & penitus evacuare potest. Contrarium profecto accidit si affatim intus suscipitur medicamentum; non

motu circulationis insigniter accelerato, non solum celerrime versus glandulas fertur, sed statim extra corpus eliminatur mercurius, causa morbi ex parte tantum subacta. Hinc imperfectæ illæ curationes, & tantum temporariæ utilitates, quæ luis venereæ regenerationi nullo modo opponuntur. Nunquam ideo a curatione cessandum, nisi prius accidentia morbosa omnia, mediante sensibili aliqua evacuatione penitus evanuerint; quod enim relinquitur in morbis, recidivas facere consuevit. Plethorici & biliosi homines lentam curationem, & tenues medicamenti doses adhibere debent, nam vehementiori actione, & quacumque nimis valida irritatione summopere perturbantur. Eadem prudentia cum melancholicis, aridis frigosisque incedendum, atque in hujusmodi subjectis, magis quam in aliis humectantia, diluentia, aquosa & demulcentia, immo & opiata etiam cum frictionibus mercurialibus sunt copulanda; ne aut ultra modum incalescant, aut insigniter corrugata & irritata corpora omnino exarescant. Liberalius ac largiori manu administrantur frictiones in phlegmaticis, humidis ac pituitosis, in quibus calor corporis impune augetur, & lenti viscidique humores, a validiori actione mercurii promptius attenuati, facile evacuantur. Varia morbi venerei accidentia, diversum prorsus in administratione mercurii methodum postulant; atque ipsius morbi diversa tempora absolutam in curatione mutationem requirunt. Inter dogmata tamen fundamentalia statuendum primo, quod recens morbus nulla interposita

mo.

mora nulloque palliativo præsidio præmissa, frictionibus tractandus sit, ut eradicative curetur. Gonorrhæa igitur aut benigna sit, aut virulenta, ulcera, bubones, spermatocele a gonorrhæa proveniens, & alia hujusmodi, diluentibus internis & frictionibus tractari debent. Nam parvi quamvis momenti ægritudines venereæ apparenter curatæ, diuturni morbi firmissima fundamenta constituunt. Inter symptomata vero majoris notæ, & quæ morbum jam confirmatum esse significant, sunt ulcera penis aut præputii, quæ non solum in tumorem inguinalem desinunt, sed causam morbi humoribus omnibus & glandulis lymphaticis præsertim, jam communicatam esse declarant. In ulcere venereo & in tumore inguinis, statim ad frictiones confugiendum, ne integra fluidorum, ac progressu temporis solidorum etiam & organorum œconomia pervertatur. Cavendum vero ne mercurio inungantur, aut alio medicamento foveantur partes affectæ; suppuratio enim omni modo, totisque viribus prohibenda est; magis operationes chirurgicæ ferro, magisque caustico remedio institutæ ablegandæ sunt a tumoribus inguinalibus. Suppuratio quantumvis copiosa ac diuturna nunquam corpus a veneno venereo repurgare valet; post longum enim puris fluxum gravissima morbi symptomata, dolores, pustulæ, nodi & similia superveniunt. Si emplastrum causticum crudo atque immaturo tumori applicatur, ut nulum resorptioni causæ morbificæ tempus relinquatur, juxta vulgare medicorum sententiam, non

non pertinacissimæ modo suppurationes, & sinuositates oriuntur, non solum sanguinis fluxus immodici, & mortificationes nascuntur, sed tetanus, insanabilis ac lethalis morbus exoritur, uti practicæ observationes quotidie nos admonent. Methodus inungendi mercurium, sive ipsa topica confricationis operatio suas quoque peculiare regulas, & differentias habet. Qui unguento mercuriali communi utuntur initio a plantis pedum factis, tibiis, femoribus, brachiis humerisque in progressu mercurium confricare consueverunt; alia enim ratione remedium per omnia ferri, omnesque partes subire non posse contendunt. Hoc vero minime verum est, nam si pedibus tantum confricatur, salivatio sæpissime excitatur, adeoque de generali remedii actione dubitari non potest. Generaliter tamen mercurio partes omnes simul inungere noxium profecto est; nam a pinguedine excalescitur & a metallico principio in urentem substantiam penitus mutata, varia cutis loca irritantur inflammantur, pustulisque acerrimis eroduntur. Rursum insignis & superflua mercurii quantitas, cito exitum quærens, nondum absoluta veneni venerei subactione sive decompositione, extra corpus fertur, sanorumque etiam humorum particulas secum trahit. Hac methodo inopportuna damnoaque eveniunt salivationes, quæ morbum venereum palliative curant, dum novas diversi generis ægrotudines in corpore excitant. Hunterus meliori consilio unguento internas femorum regiones confricandas monet, quia externa

na horum locorum lymphatica proxime ad organa sexus glandulasque inguinales feruntur. Mercurialia vero linimenta delicatioribus partibus dum insigni, & necessaria semper vehementia confricantur, præternaturalem calorem ac superficiei saepe inflammationem afferunt. Hæc itaque accidentia omnia avertuntur, neque remediis efficaciam ullo modo minuitur, si tantummodo pedum plantis unguentum applicatur. Ab extremo pede, per suras & femora lymphatica numerosissima ad genitalia progrediuntur & glandulas conglobatas subeunt; ac proinde mercurius recta ad affectas sedes perducitur, nimioque immo noxio carens impetu, lentam actionem cum magna utilitate exercet. Tumores inguinales, ulcera, irritationes gonorrhoeicæ, & nunquam irritandæ testiculorum intumescentiæ, quæ spermatocele constituunt, tarda mercurii activitate, evitata irritatione & inflammatione ad resolutionem per gradus feruntur. Ob memoratas igitur potissimas rationes, nostram methodum reliquis anteferendam esse existimamus. Ut curatio rite procedat operatoris manus sacculo ex corio, pinguedine sive axungia communi saturato & emolito tegenda, dein absque linimento per octo aut decem horarum minuta planta utriusque pedis confricanda, usque ad mediocrem incalescentiam. Unguenti dein mercurialis dosis illa, quæ morbofis accidentibus, ægroti temperamento, atque ætati convenientior existimabitur blandiori prius, dein celeriori fortiorique frictione adhibita, sedulo & repetito inungi debet, ut facile ac magnopere attenuata a lym-

lymphaticis suscipiatur. Operatio vero protrahenda usque ad integram linimenti evanescentiam, quæ nunquam a sensibili pedum calore disjungitur. Vespertinis horis frictiones utiles instituuntur, nam relaxato æquabiliterque tempore somni perspirante corpore, majori cum facilitate secretiones mercurii actione promoveri possunt; hac etenim via morbosæ etiam causæ facilior evacuatio procuratur. Urinæ post somnum ubiores magisque concoctæ, veneni venerei particulis copiosius saturantur, & abundantior etiam perspiratio nocturna & matutina curationem accelerat. Tandem mercurii operatio, quæ multis post prandium horis incipit, a ventriculi actione, & digestionem ciborum, minime perturbatur. Frictionum numerus eradicativæ curationi necessarius exacte determinari nullo modo potest; pender enim a natura morbi, atque a promptiori tardiorique medicamenti effectu; nunquam vero celeriter agendum, immo semper cunctando, diligenterque observando sanitati consulendum, præsertim in morbo venereo. Judicatur vero morbus evacuationibus a mercurio procuratis; hinc quo citius criticæ separationes, atque quo copiosius eveniunt, & majorem aut minorem utilitatem afferunt, absolvenda vel longius protrahenda est frictionum administratio. Si urinæ uberrimæ, crassæ, albicantes copiosoque sedimento refertæ apparent, nunquam de optimo medicamenti effectu dubitandum. Hæc vero urinary qualitas non modo curationis tempore deprehendi solet, sed ad plures etiam

etiam menses superest, semperque beneficam mercurii activitatem declarat. Sudores qui aliquando mercurii opera excitantur in lue venerea, etsi sæpe salutare & palliati, raro tamen eradicativi evadunt; quia cito attenuata & vehementiori medicamento actione volatilem naturam adepta causa morbifica, ex parte tantum eliminatur, tenaciorque, quæ relinquitur, post certum tempus multiplicata recidivam affert. Hinc mercurius dum per urinæ vias fertur, perfectam semper curationem promittit. Cavendum magnopere ne diarrhæa a mercurialibus excitetur; ob hanc enim evacuationem æger in languorem incidit, humores vix superabilem corruptionem nanciscuntur, atque tunc organa interna, ob generalem corporis imbecillitatem in essentielles morbos incidunt. Non omnes anni tempestates pro frictionibus opportunas esse medici docent; ideoque vere & autumnio frictiones instituunt; uti fieri solet in aliorum etiam medicamentorum administratione. Hyemali etenim tempore non solum a perspirationis impedimento plura oriri possunt essentialia damna; verum ob solidorum rigiditatem, ac retardatam simul fluidorum circulationem, magna medicamento obstacula opponuntur. Particulæ liquidæ metallicæ ægre suscipiuntur difficulterque angustioribus canalibus communicantur; ideoque curatio imperfecta semper evadit. Æstas contra statum corporis oppositum affert; nam ob generalem solidorum relaxationem, nimis facile mercurius per omnia ducitur, nullaque retardatus oppositione sive reactione, im-

H

mu-

mutatus foras egreditur. Intensus etiam atmos-
phære calor salutarem attenuationem, nempe ne-
cessariam corruptionem a mercurio procuratam, in
pessimam scorbuticam resolutionem putredinem-
que vertit. Bina vitantur extrema, ubi pro
frictione mercuriali media anni tempora seligun-
tur. Ipse vernam tempestatem autumnali an-
teferendam semper esse existimarem; nam po-
stremum curationis tempus æstate excipitur, at-
que ideo faciliori perspiratione, ac moderata
vasorum relaxatione medicamenti effectus adju-
vantur. Autumno contra aer semper frigidior
factus minime opportunam totius animalis œco-
nomiæ constrictionem rigiditatemque gignit.
Attamen quamvis hæc omnia verissima esse vi-
deantur, nos qui frictionibus sublimati corrosi-
vi utimur, curationes quocunque anni tempore,
cum æquali semper utilitate instituere solemus;
quia a mitissima operatione, & quæ prudentis me-
dici industria, non ultra votum suas exerit vi-
res, nulla a nimio calore nimioque frigore damna
sunt pertimescenda. Frictionum mercurialium
historiam, indolem & usum peculiariter illustra-
re conati sumus, quia hoc tantum præsidio mul-
tiplices a lue venerea pendentes ægitudines pe-
nitus profligantur. Reliquæ præparationes mer-
curiales, & præsertim illæ, quæ interne usurpan-
tur, raro eradicativæ, sæpe palliativæ, sæpissi-
me vero damnosæ esse solent. Hujusmodi sunt
Pilulæ Bellostianæ, Pilulæ Rufferi a Gallis ce-
lebratæ, mercurius gummosus D. Plenck, syru-
pus mercurialis, mercurius præcipitatus, sive cal-

calcinatus per se, solutiones mercurii sublimati corrosivi, sive specificum antivenereum D. Swietenii, Panacea mercurialis, Panacea D. Thompson, Æthiops mineralis, Æthiops alkalifatus, Cinnabaris nativa, mercurius dulcis sive Calomelanus, innumeræque aliæ præparationes a vulgaribus medicis ultimarissimæ. De omnibus modo adnotatis mercurialibus nihil addendum, nam internæ præparationes improbandæ semper sunt; magis vero illæ, quæ nudam acutamque metalli actionem valde irritabilibus simulque sanis sedibus commueant, uti mercurius gummosus, sublimatus corrosivus & mercurius alkalifatus; hisce enim præparatis magnæ perturbationes, periculosique morbi in corpore excitantur. Mercurius contra cum sulphure conjunctus in cinnabare & æthiope minerali propria inutilitate distinguitur; quia a sulphure admodum difficulter separatur, ideoque suam activitatem exercere nequit. Frustra igitur remedia cinnabarina prædicantur tanquam summæ activitatis præsidia in capitis nervorumque morbis; omnes etiam medici in apoplexia, epilepsia, paralyti, convulsionibus hysteris, cinnabare nativæ vel factitiæ a granis quatuor usque ad decem utuntur, sæpissimeque etiam cinnabarinis pulverem valerianæ sylvestris adiciunt. Multiplici diuturna praxi edocti ab hujusmodi modo remediis semper abstinemus. Tandem quid de mercurio dulci, nempe de substantia salina mercuriali a medicis, ultimarissima sentiendum? non modo enim adultis, sed puerulis etiam passim propinatur: alvum mediocri-

ter subducit, & inter remedia anthelmintica principem locum tenet. Nec desunt qui moderato attamen diuturno hujus remedii usu, confirmatæ luis venereæ curationem aggrediuntur; immo non quidem spernenda præparatio, quæ pulveris alterantis plummeriani nomine in officinis distinguitur, mercurio dulci & cerussa stibii præsertim componitur. In gonorrhæa denique usurpatur: non solum interne verum etiam externe, quandoquidem injectiones frequenter aquis vitriolicis & mercurio dulci parantur. Vim anthelminticam aliquando ostendit, quia mercurialia omnia, magis quæ salina sunt, parva animalia & vermes occidunt. Rursum mediocris illa irritatio, quæ mercurium salinum catharticum reddit, dum alvum purgat, vermes etiam intestinales educit. Parcius vero calomelano utendum magis in ætate infantili, quippe non raro longam & periculosam salivationem affert. Dosis est a granis quatuor usque ad quindecim in adultis. Atque hæc de mercurialibus satis; si enim cum nostris de sublimato corrosivo superius expositis doctrinis junguntur, satis accuratam hujus metalli historiam medicam constituere posse videntur.

DE ANTIMONIO.

Antimonium vulgo stibium, ultimum in De Antimo-
 ter imperfecta metalla occupat locum; nio.
 attamen quamvis nobilitate sua & pretio reli-
 quis comparari nequeat, insignes vero possidet
 qualitates medicamentosas, magnæque admodum
 utilitatis præparata nobis exhibet. Componitur
 substantia ponderosa, attamen friabili, partibus-
 que constat tenuibus, acutis, splendentibus, quibus
 miscetur obscurior plumboque similis materia.
 Reperitur frequenter in Germania, Hungaria,
 Gallia & Anglia, & ignis ope ab heterogeneis
 corporibus sejungitur & in massas conicas redi-
 gitur. Optima species illa est, quæ majori pon-
 dere & densitate, striisque amplioribus distin-
 guitur, atque vehementi adhibito igne integre
 evaporatur. Substantia hæc mineralis constat es-
 sentialiter metallo sive parte regulina, cum sul-
 phure intime combinata; tunc purissima obti-
 neri potest eadem ratione ac reliqua metalla.
 Antimonium in aqua regia solubile est; in aci-
 dis aliis & alcalinis difficulter & imperfecte.
 Igne sublimatur in flores. Sulphure conjunctum,
 vel cum nitro ex parte calcinatum, activitatem
 suam virulentam magnopere deponit. Calcina-
 tione fortiori, phlogisto in integrum spoliatum,
 in calcem mutatur inertem ponderis incremen-
 tum acquirentem. Veteres antimonium inter

venena collocabant illoque externe tantum utebantur pro collyrio antiphlogistico in morbis oculorum. Præparationes nonnullæ antimoniales etiam a recentioribus lethales esse pronunciantur. Calces denique inertissimis substantiis adnumerantur. Crudi antimonii nullam esse activitatem doctiores chemici merito contendunt, quia principio inflammabili copiosissimo particularum metallicarum actio integre coercetur. Hinc pro frustranea habetur antimonii crudi additio in Ptila is purgantibus antivenereis; multique etiam inutilem esse pulverem antimonii interne assuptionem in morbis cutaneis, asserunt. Verum quæ praxis nobis suppeditavit observata, ostenderunt pulverem antimonii per certum tempus usurpatum, gravissimas sæpe attulisse ægritudines. Insignis enim internus externusque ab hoc remedio oritur calor, macies supervenit, ulcera sicca igneam ardorem afferentia, integram sæpe corporis superficiem infestant; nec deest incommoda & periculosa febricula. Quomodo hoc evenire possit, non adeo facile erit explicare. Fortasse partes sulphuris antimonii cum oleosis & pinguibus animalibus elementis conjunctæ acerrimam salinam substantiam, caloris etiam accessione constituunt, & hac ratione scorbuticæ gravioris ægritudinis modo descripta species oritur. Summa igitur prudentia opus est etiam in antimonii crudi administratione. Qui morbos a scabiei retropulsionem antimonii pulvere curare nituntur imaginariæ ægritudinis curationem, cum genuini novique morbi generatione commutant. Quemadmodum in

crudo antimonio sulphuris intima cum metallicis elementis combinatio, substantiam hanc fere inactivam reddit, sic contra dissipato sulphure vel integre vel ex parte, quæ supersunt particulæ metallicæ, & quæ regulum antimonii componunt vehementissimum gignunt effectum; purgant enim per superiora & inferiora, sudorem excitant, validissimasque sæpe afferunt convulsiones, cum frigidis sudoribus, animi deliquiis, pulsuque interno conjunctas. Adnotatas proprietates regulus antimonii, cum omnibus perfecte phlogisticis substantiis communes habet. Si abundanti quo scater inflammabili principio regulus calcinationis ope privatur, suam activitatem suamque virulentiam amittit, uti accidit in stibio diaphoretico, fixo, aliisque hujusmodi. Calx vero antimonii vehementiori igne tractata abit in vitrum, & sub hac forma amissas proprietates denuo resumit. Hac posita antimonii indole, præparationes omnes, quæ ab hoc semimetallo obtinentur suam efficaciam majorem aut minorem, a minori, aut majori sulphuris quantitate accipiunt. Quo enim partes regulinæ majori sulphuris proportionem privantur, magis activæ redduntur; ac rursus si regulus calore calcinationis principium inflammabile amittit, suas vires omnino deponit. Sulphur facillime mediante nitro, nempe deflagratione, ab antimonio separatur; atque dum varia adhibetur nitri proportio, diversæ activitatis regulus efformatur. Nonnullas tantum, & quidem usitatiores præparationes indicabimus, reliquæ ex libris mate-

riæ medicinalis erui poterunt. Et primo crocus antimonii medicinalis, crocus antimonii mitior, & crocus metallorum sunt præparata antimonialia, quæ fiunt ab antimonio crudo & nitro, in crucibulum immixtis & post deflagrationem in pulverem reductis. Crocus antimonii medicinalis fit cum antimonii partibus octo, & nitri parte una; hinc mitissime operatur, & exhiberi potest usque ad grana viginti, quia regulus non paucas sulphuris particulas adhuc continet. Crocus antimonii mitior duabus componitur antimonii partibus & una parte nitri, majoremque habet efficaciam quam descripta modo præparatio. Crocus deinde metallorum constat antimonii & nitri partibus æqualibus, ac proinde sulphur omnino absumitur, regulinæ particulæ tunc nudæ, activitatis suæ vehementiam ostendunt. Quamvis vero tenuissimæ admodum doses, utpote unius vel duorum granorum croci metallorum incredibili vehementia operentur, a prudenti tamen medico hoc antimoniale præsidium in multis gravissimis casibus summo cum emolumento posset adhiberi. In acutis enim morbis a nimia humorum tenacitate, atque ab actionum pigritia pendentibus, medicamenta quæ parva dosi propinata, omnium functionum œconomiam perturbare, retardatos motus excitare, & deficientes evacuationes renovare valent, inter heroica habenda sunt. Idem de diuturnis quoque morbis, ac præsertim de congestionibus lymphaticis & glandularibus dicendum; medicamenta enim alterantia principem locum occupare merentur, ut infese-

ferius apparebit. Sed præparationes antimonii distinguendæ sunt in duas classes, prior includit calces antimoniales vel simplices vel ferro etiam copulatas, uti est ex. gr. Cerussa martialis: altera continet præparationes regulinas, nempe particulis metallicis magis minusque refertas, uti sunt crocus antimonii, tartarum emeticum & similia. Quacumque ratione antimonii & nitri ope insignis conflagratio instituitur, juxta nitri proportionem, magis perfecta aut imperfecta antimonii calx obtinetur. Quo vero major ad antimonium nitri proportio adhibetur, antimonium amisso sulphure in albam vertitur terream substantiam, odoris saporisque omnino expertem. Hujus naturæ sunt præparationes illæ, quæ apud nos nomine stibii fixi vel diaphoretici dignoscuntur, atque ab omnibus simplici calcis antimonii appellatione designantur. Memorata calx metallica paratur ab antimonii parte una & tribus nitri partibus, & dum genuina est dicitur peculiariter antimonium sive stibium diaphoreticum nitratum, vel non lotum. Aqua pro repetitis calcis antimonii lotionibus usurpata, post filtrationem & evaporationem exhibet Nitrum stibiatum, vulgatissimum nempe nostratum medicorum febrifugum, diureticum & diaphoreticum præsidium. Calces antimoniales primo inter heroica medicamenta, & ideo summa prudentia administranda, collocabantur; in desperatis gravissimisque morbis sudores critici a stibio, calidissima metallica substantia expectabantur. Recentiores vero chemicis imbuti doctrinis contrariam sen-

sententiam propoluerunt, ac stibiata terris inertissimis, nulloque effectu distinctis adnumeranda esse contenderunt. Hanc prima facie veritati maxime consonam doctrinam fallacissimam esse suspicatus sum; nam ipsis chemicorum principiis innixus dubitare cæpi de jactata terrarum metallicarum inactivitate. Et sane dum calces metallicas tanquam peculiâres terras, quæ ob phlogisti privationem naturam metallicam amittunt habendas esse existimabam, & simplici addito principio inflammabili metalla peculiaria repræsentari cum memoratis terris certus essem, calces tamen metallicas in morbis a causa mere phlogistica ortis, principii inflammabilis elementa propria affinitate resumere posse credidi. Hac eveniente mutatione corpus a causæ morbificæ insigni activitate facile liberari poterat. In morbis itaque febrilibus acutis, in quibus summa deprehendebatur humorum spissitudo, congestionisque ob lentescentiam in sedibus organicis aderant; in lethalibus febribus ab aëre palustri, nempe phlogificato ortis, doses stibii diaphoretici uberiores, utpote viginti ac triginta granorum, singulis diebus cum magno ægrotantium emolumento adhibui. Secretionum defectus, urinarum suppressio, cutis ariditas, caloris absentia, coloris defœdario, & alia magni momenti accidentia penitus dissipabantur. Calor enim naturalis superveniebat; cutis madefacta sudore copiosissimo calidoque disfluebat, urinæ copiosæ obtinebantur. Criticæ hujus naturæ evacuationes a calce antimonii oriebantur; phlogisti enim morboşi particulæ, quæ periculo-

sissi.

siſſimam humoribus tenacitatem conciliant, calci metallicæ ſtatim adhærent, unde morbi graviffimi cauſa decomponitur, ut itam dicam, ſuamque naturam omnino mutat. Sed ſi mediante hac operatione terra antimonii in corpore animali cum phlogiſto conjungitur, facillimum erit determinare maximam hujus calcis utilitatem in morbis modo adnotatis. Nil igitur mirum ſi calx antimonii imperfecta, quæ procul dubio præſtantiffimum D. James pulverem febrifugum conſtituit, tantam in deſperatis etiam febrilibus morbis afferre utilitatem ſoleat. Nonnullæ enim in hac remedio regulinæ partes ſuperſunt, quæ neceſſariam in corpore criticam perturbationem excitant, dum moleculæ calcis præſtito muneri incumbunt. Quamvis inter incognitas formulas colloceſur, nūperſſimi Scriptores ſequenti ratione pulverem D. James componi aſſerunt.

R. Antimonii ad vitrum conficiendum calcinati,

Nitri pondera æqualia.

Commixta & in crucibulo indita terantur, ita ut per horam rubeat materia; quæ demum e crucibulo exempta, conteratur, & aqua calida ſæpius lavetur, donec ſaporis expers ſit. Multi ſunt etiam qui pulverem febrifugum D. James pulveri antimoniali Pharm. Londinenſis ſimilem eſſe credunt. In hac compoſitione cum antimonio copulatur raſura cornu cervi, cujus terra poſt calcinationem cum calce antimonii conjuncta ſervatur. Proceſſum pulveris antimonialis adnotavimus in noſtris *formulis medicamentorum*. Calx
hæc

hæc antimonij nitrata admodum salutare in morbis febrilibus effectus gignit ; quandoquidem sæpe vomitum , alvum & sudorem movet, sæpiusque copiosissimas urinas educit . In biliosis , rheumaticis , lymphaticisque morbis, in quibus nulla in organo aliquo peculiaris congestio aut inflammatio deprehenditur, magnum affert emolumentum ; & ubi alia, etsi decantata præsidia, incassum adhibita fuerunt , solo hoc remedio felicissimæ obtinentur curationes . Non raro evacuationes non apparent & ægroti in eodem permanent statu; symptomatum tamen vehementia nullo modo augeatur . Aliquo dein temporis spatio elapso criticæ evacuationes beneficam morbi judicium afferunt . Dosis a granis duobus vel tribus in infantibus, usque ad scrupulum unum , omni sexhorio propinatur usque ad manifestam operationem . Frigidæ potiones penitus vitandæ, neque æger frigidæ aëri exponendus, ne corporis primo relaxatio, dein perspirationis evacuatio prohibeatur ; nam ut crises eveniant , oportet ut omnia laxa & perfecte pervia sint . Criticæ evacuationes , quæ per diaphoresim aut urinæ fluxum perficiuntur , cæteris paribus, alvi fluxibus & anacatharsi præferendæ sunt ; hac enim ratione de majori materiæ morbificæ attenuatione certi sumus . Juscula ideo tenuissima cum pulvere febrifugo abundanter propinantur , neque ullis aliis præsidiiis a sua operatione natura perturbatur . Non raro post secundam aut tertiam medicamenti dosim, & post profusum sudorem alvinæ evacuationes necessariae sunt ; tunc commode repetitis dosibus olei semi-

num

num Ricini alvus repurgatur . Hæc ab observationibus practicis immediate deprompta de pulvere D. James adnotare potui . Reliqua remedia quæ calcem antimonii perfectam pro basi habent, & peculiariter in pharmacopœis reperiuntur libenter prætermittam , alterantem enim semper , attenuantem & deobstruentem facultatem possident, & a granis quatuor vel quinque usque ad decem vel duodecim administrari possunt . Kermes mineralis est sulphuris aurati antimonii species, quæ componitur antimonio crudo & sale aliquo alcalino fixo , sive lixivio alcalino . Post longam coctionem & filtrationem, dum refrigeratur liquor , Kermes mineralis forma pulveris obscure-rubri fundum petit . In hac compositione, quæ etiam *pulveris carthusianorum* nomine dignoscitur , non solum sulphureæ , sed regulinæ etiam particulæ reperiuntur . Hinc non raro vomitus hoc remedio gignitur . Sed si sulphuri tantum fidendum esset , frustranea Kermes administratio evaderet . Ob hanc igitur qualitatem repetitæ paucorum, utpote duorum vel trium granorum doses utilissimæ sunt in morbis lymphaticis lentis , congestionibus pituitosis, ac præsertim in catharro diuturno, asthmate, & hydro-thorace . Acuti pectoris & suppuratorii simul morbi , uti pleuritides ac peripneumonix hoc remedio ad grana decem vel quindecim quotidie utiliter tractantur ; nam Kermes aliquando sudorem , sæpe urinam , sæpiusque etiam expectorationem promovet . Qui magna a largioribus dosibus damna reformidant , dubitabunt semper dum materiæ medicæ fundamenta ignorent .

De tartaro
emetico.

Primaria atque omnium utillima pro praxi medica antimonii præparatio appellatur propriè tartarum emeticum vel sibiæatum, quia facultatem insigniter emeticam habet. Varia ratione paratur, nempe cum croco antimonii loto & crystallis tartari, vel cum cremore tartari & vitro antimonii, vel cum pulvere Algarotti, juxta methodum a Cl. Bergman indicatam. In omnibus vero præparationibus partes regulinæ a salinis substantiis solutæ mitiores redduntur, & vehementissima nudi reguli actione spoliantur. Quo vera elementa metallica puriora pro compositione tartari reperiuntur, laudatus Bergman loco croci antimonii, vel vitri, pulverem Algarotti, sive mercurium vitæ adhibuit; hæc enim pulvis obtinetur solutione butyri antimonii in aqua pura, atque post repetitam lotionem cum tartaro conjungitur. Summa principii metallici puritas differentiam facit. Tartaro emetico vomitus procuratur; sudor gignitur, & alvus solvitur; hæc merito in acutorum principiiis, cum maximo ægrotantium emolumento propinatur. Dum enim materia turget, natura ipsa monstrante viam, tartari granum unum, aut alterum purgat per superiora & inferiora, sapissimeque sudorem affert. Non unico tamen haustu tartarum assumere necesse est, siquidem doses solutionis per intervalla exhibentur, usque quo manifesta medicamenti operatio animadvertitur. Vomitu namque superveniente diluentia tantum affatim ingurgitanda, uti aqua tepida, juscula tenuia, & decoctiones chamæmeli theiformes. Si operatio diuturnior ac juxta vehement-

mentior erit, jusculis pinguioribus, atque opiatis moderanda. In acutorum principio si lingua tartaro crasso tegitur, si nausea adest, ac vires ob viscerum vitiosam repletionem languent, repetito ad tartarum emeticum deveniendum est, etiam contra vulgarium medicorum sententiam, qui assiduis vociferationibus de tartari venenata qualitate, & de gravissimis ægrotantium damnis loquuntur. Etenim revera unico hoc remedio opportuno tempore administrato, morborum gravissimorum initiis opponi potest medicorum industria; frequenterque periculosa accidentia, quæ supervenire solent omnino prohibentur. In chronicis quoque febrilibus morbis, qui plerumque a lymphæ præternaturali tenacitate, & a secretionum impedimento oriuntur, ipse tenuissimas tartari emetici doses quotidie adhibui, & nunquam eradicatione ægri frustrabantur. Eadem methodo debellare constanter soleo pertinaces nervorum morbos, & præsertim paralysem artuum, emiplegias, & epilepsias; dato enim quotidie tartari emetici grano dimidio, una cum infuso aliquo diaphoretico, curationes absolvuntur spatio duorum mensium. Hæc de antimonio dixisse satis, reliqua ex libris hauriri poterunt.

Inter metallica, quæ a medicis pro morborum curatione usurpantur non infimum certe locum tenet ferrum, five mars chemicorum vel chalybs, unde medicamenta, quæ ab hoc metallo parantur vulgo chalybeata aut martialia nuncupantur. Qualitates chemicas ferri longum sane esset enumerare in præsentis temporis angustia; hinc satis

De Ferro.

ris erit animadvertere ejus colorem ex nigro-purpureum & quandoque violaceum esse, præsertim dum igne tractatur. In statu vero calciformi, & postquam æris atmosphærici actionem sustinuit, in rufum & proprie ferrugineum colorem, nempe in veram æruginem sive rubiginem mutatur. Ubicumque ferrum rubigine inducitur, uti accidit si humido ac magis si maritimo aëri exponitur, particulæ metallicæ propria natura relicta, nempe phlogisto spoliatae in calcem rufam, sive mineram ferri calciformem vertuntur. Hæc autem mutatio, quæ pro vera ferri decompositione haberi debet, magni faciendæ ac peculiariter a medicis intelligendæ est; nam ferri proprietates medicinales ab hac proprietate tantummodo pendent, uti mox elucescet, Medicamenta roborantia nempe tonica, emmenagoga in chloroticis mulieribus & in cachecticis valde laudata, sæpissime vel purum ferrum, vel præparata ex hoc metallo pro basi habent. A sapore styptico particularum hujus metalli, ab incremento virium ventriculi, atque a generali robore, quo mediante, ferro partes antea debiles firmanantur, præcipuas vires præctici deduxerunt. Ideo varia usurpare consueverunt martialia, inter quæ vulgatissima sunt limatura ferri vel chalybis, dulcedo martis, syrupus chalybeatus, tinctura martis in spiritu salis, sal martis, vinum chalybeatum, & innumeræ aliæ ex eodem metallo factæ compositiones. In stomachi debilitate, ventris fluxu diuturno, lyenteria, chlorosis, mensium defectu, confirmata cachexia, morbisque

bisque omnibus a solidorum debilitate & lymphæ tenacioris congestionibus & aliis hujusmodi, chalybeatis quotidie utimur, quia amissus solidorum tonus hisce præsiidiis denuo restituitur. Sed memoratæ ægritudines, quæ semper cum secretionum retardato munere, ac vitalis principii inertia, ac proinde cum generali frigoris sensatione conjunguntur, pro morbis phlogisticis haberi debent. Metallica & medicamenta a perfectis metallis deprompta nullam utilitatem, immo potius detrimentum afferre possunt, quia metalla perfecta principium inflammabile copiosissimum & insigniter noxium corpori communicant. Verum ferri præparata, quamvis metallicam penitus naturam habere existimentur, ab inferioris ordinis medicis, sunt tamen substantiæ calciformes, quæ vel aëris actione, vel acidorum activitate proprium amiserunt phlogiston. Rubigo etenim ferri utillimum reddit in adnotatis morbis vinum chalybeatum rubiginosis ferri fluctuans, & ferro, vini, nempe acidi vegetabilis actione decomposito, paratum. Syrupus martialis oritur a solutione ferri in acido vegetabili, saccharo deinde sive syrupo communi edulcorata. Idem dicendum de omnibus fere medicamentis cum ferro compositis. Calces itaque ferri, quæ magna ex parte principio inflammabili privantur, dephlogisticantes esse procul dubio debent; ideoque in morbis a nimia tenacitate, nempe a phlogisti redundantia ortis summam utilitatem afferunt. Ferri rursus activitas sæpe insignis redditur ubi metallum a tenuissimo acido dissolvitur, uti ac-

cidit in aquis nostris chalybeatis acidulis, in quibus ferrum ab acido aëreo solutum existit; ideoque ob tenuitatem & dephlogisticationem suam, majorem semper activitatem habet. Attrahunt igitur particulæ calciformes ferri tenacissima humorum elementa, & fluidis lymphaticis naturalem tenacitatem restituunt. Reddit post chalybeatorum usum digestionis vigor, muscoli roborantur, secretiones fluunt liberæ, defædatus faciei color in naturalem floridumque transit. Atque hac ratione martialium operatio in corpore humano facile intelligitur. Præparationes quoad titulum diversæ, magnam tamen inter se analogiam habent; quæ fluidæ sunt, cæteris paribus, anteferendæ, quia particulæ medicamentosæ facilius penetrare, faciliusque humoribus misceri, solidisque aptari possunt. Vinum chalybeatum cum incredibili emolumento ad uncias quinque vel sex, ante prandium exhibere solemus in cachexia, & menstruorum defectu. Eodem cum successu administratur quotidie syrupus chalybeatus ad unciam unam, in decocto graminis officinalis. Remedia hæc rectius usurpantur vere vel autumnò, quam hyeme aut æstate, quia hisce tempestatibus corpora humana laxiora, magisque pervia sunt. Cum moderata exercitatione martialia conjungenda sunt, quia hujus naturæ medicamenta, quæ debili plerumque stomacho committuntur difficulter digeruntur. Omnia denique ferri præparata a parva dosi incipienda, utpote a quinque vel sex granis, atque ad scrupulum unum augenda. Exci-

pi tantum debet mars solubilis, sive tartarum solubile martiale. Hoc remedium inter omnia calybeata utilissimum, sequenti ratione paratur:

R. Limatur. ferr. &

Crystall. tartar. singulorum part. æqual.

Aqu. pluv. qu. su. ut redig. in mass. calore arenæ exsiccand. f. dein pulv. humect. & denuo exsiccetur. Hoc per plures vices facto, materia redigatur in pulverem impalpabilem.

In hac præparatione crystalla tartari ferrum in humoribus corporis humani solubilem reddunt; hinc majorem semper ac reliqua martialia utilitatem affert. Dosis est a granis quinque usque ad drachmam unam.

De plumbo, stanno, zinco & bismutho in calce materiæ medicæ mineralis disputare frustraneum profecto est; externas plumbi qualitates alio in loco recensuimus; vires stanni anthelminticæ incertæ sunt; atque florum zinci facultatem antiepilepticam imaginariam esse experimenta practicum ostenderunt. Heroica remedia indicavimus, actionem veram a componentibus, ab analogia, ab effectu investigare conati sumus, magnam molem oculis vestris subjecimus, nunc vestrum erit utiliora seligere, adhibere, experiri, & philosophica temeritate imperitorum turbam funditus evertere.

F I N I S.

IN.

I N D E X

R E R U M.

<i>Substantiæ salinæ</i>	pag. 3
<i>Salium characteres generales</i>	5
<i>Sales acidi & alcalini</i>	7
<i>Acidum vitriolicum</i>	9
<i>Acidum vitriolicum phlogisticatum</i>	10
<i>Acidi vitriolici usus</i>	12
<i>Inflammationis causa</i>	16
<i>Ratio administrandi acidum vitrioli</i>	18
<i>Acidum nitrosum</i>	21
<i>Usus Acidi Nitrosi</i>	22
<i>Acidum muriaticum</i>	25
<i>Usus acidi muriatici</i>	ivi
<i>Aër muriaticus</i>	27
<i>Novæ acidorum species</i>	ivi
<i>Acidum arsenicale</i>	28
<i>Acidum aëreum</i>	29
<i>Acidum succini</i>	33
<i>Sales alcalini</i>	35
<i>Alcalinorum usus</i>	37
<i>Aqua calcis</i>	42
<i>De Salibus Neutri</i>	50
<i>Salium neutrorum usus</i>	54
<i>Nitri usus</i>	56
<i>Nitri stibiati usus</i>	59
<i>Sal marinus</i>	60
<i>Salis marini usus</i>	61
	De

	133
<i>De sale ammoniaco</i>	62
<i>Spiritus Mindereri</i>	64
<i>Sales metallici</i>	66
<i>Vitriolum ceruleum</i>	67
<i>Vitriolum album</i>	ivi
<i>Usus vitriolorum</i>	ivi
<i>Lapis infernalis</i>	70
<i>Mercurius sublimatus corrosivus</i>	ivi
<i>Saccharum saturni</i>	78
<i>Sales terrei</i>	79
<i>De alumine</i>	ivi
<i>Inflammabilia</i>	83
<i>Inflammabilium usus</i>	87
<i>De sulphure</i>	89
<i>De aëre sulphureo</i>	93
<i>De spiritibus ardentibus</i>	94
<i>De æthere</i>	98
<i>De metallicis</i>	100
<i>De hydrargyro</i>	102
<i>De Antimonio</i>	117
<i>De tartaro emetico</i>	126
<i>De Ferro</i>	127



AVIS AU PUBLIC.

LE Docteur Cirillo Professeur de Medicine dans l'Université de Naples vient de publier les trois premiers Cahiers d'un Ouvrage d'Histoire Naturelle, qui a pour titre: *Entomologia Neapolitana specimen primum &c.* in fol. grand papier. L'Ouvrage regarde les insectes rares du Royaume de Naples, qui ont été décrits & non gravés par les Auteurs, ou les especes inconnues jusqu'à present. Ces trois Cahiers consistent chacun de quatres planches de différentes insectes dessinés & colorés d'après nature par l'Auteur lui meme, & enluminées avec le plus grand soin. Tout l'Ouvrage, frontispice, preface, descriptions &c. est gravé avec beaucoup d'attention. Le prix de chaque Cahier est de six ducats, monnoie de Naples, & sera toujours le meme pour la suite de l'Ouvrage,

ducats 6

Le quatrieme Cahier sera publié vers la fin de l'année 1792.

O P E R E

DEL DOTT. DOMENICO CIRILLO.

I.	Osservazioni pratiche intorno alla Lue Venerea in 8.	duc. gr. I
II.	Nosologiæ Method. rudimenta in 8.	60
III.	De essentialibus nonnullarum Plantarum characteribus in 8.	I
IV.	Riflessioni intorno all' acque adoperate per la Concia de' Cuoi; seconda edizione in 8.	20
V.	Fundamenta Botanica, sive Philosophiæ Botaniciæ explicatio, in 8. Vol. 2. Pars secunda complectitur materiam Medicam Regni Vegetabilis.	2
VI.	Oratio pro Studiorum Instauracione, in 4.	10
VII.	Plantarum rariorum Regni Neapolitani Fasciculus primus, & secundus, in fol. cum Tab. 12.	4
	Idem cum figuris ad naturam coloratis. Fasciculus tertius sub prælo.	12
VIII.	Entomologiæ Neapolitanæ specimen primum, fol. maj. cum Tab. 12. ad viv. colorat. & explicationibus ære incisis.	18
IX.	Discorsi Accademici, in 12. Napoli 1789.	60
X.	Tabulæ Botaniciæ Elementares quatuor primæ, in 4.	I. 20
	Reliquæ diverso tempore lucem videbunt.	

PROPEDIEM EVULGARI DEBENT.

XI.	Cyperus Papyrus. Monographia fol. maj. cum tabulis duobus, typis Bodonianis	
XII.	Formulæ Medicamentorum usitatiores &c. in 8.	I. 20
XIII.	Materia Medica Regni Mineralis in 8. 1792. Jam evulgata est	50

